

KOZIPOLAMA YA NZAMBE



Tótíkala ya kotelema mwa moke, wana togumbi mitó mpo na libondeli.

² Nkolo na biso ya Ngolu, tozali kozongisa mpenza na matondi lelo mpo na litomba oyo tozui ya koyangana elongo na mabelé, liboso ya Boyei na Nkolo. Tika ete tótala-tala mitema na biso malamumu lelo, na nzela na Liloba na Yo, mpe komona soki tozali kati na Kondima, mpo tókoka komilengela, mpo na ngonga ya Komonana na Ye. Mpo tókóma ndenge Makomi elobaki ete ekozala: “Tokonétolama elongo, ná baoyo balali, mpo na kokutana na Nkolo na mipepe, mpe kozala ná Ye mpo na libela.”

³ Totondi Yo mpo na Molimo ya Boklisto ya solo oyo ezali naino na mokili, katikati na bato, baoyo bazali naino kondima Yo mpe Liloba na Yo. Boye, tosenji mapamboli na Yo likoló na biso lelo, ete Ósopa likoló na moko moko na biso makambo oyo tozali na bosenga na yango, ete tókoka komwangisama na mai ya Liloba, mpe tókoka kokóla mpo na kokóma bisálelo na maboko na Yo, mpo na ntango ya nsuka oyo. Mpo tosenji yango na Nkombo na Nkolo Yesu Klisto, Mobateli-mpate na biso monene, oyo biso tozali kozela komonana. Amen.

Bokoki kofanda.

⁴ Nalingi koloba ete oyo ezali litómba monene mpo na ngai ya kozala awa na ntongo oyo lisusu. Bólimbisa biso ndenge tozangi mpenza bisika ya kofandisa oyo esengeli. Mpe tokomeka, na mpokwa ya lelo, kobondela mpo na babeli; lelo, na ntongo oyo, ekozala mwa mpasi.

⁵ Mpe—mpe nalingaki kotia Liteya oyo ya lelo na bande. Na . . . Emonanaki lokola Nkolo alingaki kolobela ngai na ntina na yango, oh, eleki sanza moko to mibale, mpe ezali molai. Nazalaka na ntango mingi te kuna na mayangani, mpo topesaka yango miníti ntuku misato, to ntuku minei na liyangani. Na bongo biso . . . Lokola bato basengeli kokende na mosala mpe nyonso wana, namonaki ezalaka malamumu soki nayeisi Mateya na ngai mikuse. Mpe kuna bazalaki na ntango te mpo na kotia yango na bande, boye, namilobelaki ete nakozela kino ntango nakokóma awa na tabernacle, bongo nakotiá yango na bande awa. Ezali mwa molai, mpe nayeibi ete bozali ya kotelema, mpe na—nakosala noki, na lombangu nyonso mpenza. Mpe, sikawa, ekotungisa ngai mpenza te, soki bokotikelana bisika ya kofanda, bamoko na bamosusu, to ézala soko nini mosusu, eko—ekozala mpenza malamumu mingi be mpo na ngai, mpo oyo ezali mokolo ya ndenge mosusu, oyo tokosala ba-bande oyo.

⁶ Na bongo, tozuaki matatoli minene na makambo oyo Nkolo asalaki kuna na elanga, kasi ntango mosusu tokolobela yango

mingi koleka lelo na mpokwa, ntango tokoki kopesa mwa ntango koleka na yango, tokozala na ntango mingi koleka ya kopesa.

⁷ Sikawa tozali kolikia ete Nkolo akopambola moko na moko na bino. Nayebi ete mitema na bino etondi na esengo, wana bozali kozela Boyei na Nkolo. Oyo ya ngai mpe, ezali kopunja-punja, komona ndenge makambo ezali kosalema. Mpe—mpe kowelana kati na bikólo, ná ndenge lolenge oyo lingomba ekómi, mpe komona bilembo ya Boyei na Ye, ézala na nzoto mpe na molimo, mpe koyeba ete ntango oyo ya Komonana na Ye ekómi mpenza pene, ezali mpenza kotondisa mitema na biso na esengo ya koyeba ete tokobóngwana moko na mikolo oyo. Tokobóngwana, kolongwa na bikelamu oyo tozali.

⁸ Sikawa, nabanzi, soki nasosoli, na bisika mosusu, bato bazali kolanda biso na nzela ya telephone, ete Liteya oyo ezali kokende kino na Phoenix mpe na—mpe na bisika ndenge na ndenge, na nzela ya telefóne. Boye, sikawa, tozali kolikia ete soki ezali bongo. . . nayebi te; bauti koyebisa ngai yango liboso nákota awa. Mpe—mpe bato nyonso kuna bazali mpenza na nzoto kólóngónú mpe—mpe Nkembo na Nkolo ezali likoló na bango.

⁹ Sikawa—sikawa tokofungola Liloba ya Nkolo. Mpe likambo oyo biso nyonso toyéli awa, ezali mpo na kosepela mpe kosala keba na oyo tozali. . . To—toyáka awa ata moke te, mpe tozalaka. . . Ezali na moto moko te awa oyo ayebi ete moto ata nani akofanda kati na molunge ndenge oyo, kaka mpo na likanisi ya kozala awa. Tozali awa na ntina bobele moko, mpe yango ezali, “kotambola pene na Nzambe koleka.” Nde nyonso oyo tokoki kosala, ezali kondima ete Nkolo Yesu azali elongo ná biso. Mpe tozali awa mpo na—mpe na kotambola pene na Ye koleka.

¹⁰ Sikawa molunge oyo ezali mwa makasi mpo na ngai. Nameseni mwa moke na molunge ya kokauka oyo ezalaka kuna na Tucson, oyo ezali. . . Awa, mopepe ya mwa maimai; molunge na biso kuna eleki oyo mingi, kasi ekaúká. Mopepe na biso ya mamai mbala ezalaka mosusu moko likoló na ntuku mibale ya moko likoló na mokama, ntango mosusu, eloko moko ya ndenge wana, ezali lokola kobika na nsé ya bombóne. Kasi awa, ezalaka na—na—na mwa mai na kati na yango, mpe esalaka lokola komiyoka ete “pema esili yo,” ndenge tozaláká kobenga yango. Boye, ezali mpasi mpo na bino, mpe nayebi yango, mpe bino bamama oyo bozali ná bana mike ná bino baoyo botelemi, mibange mpe bilenge, bokangani-kangani ndenge wana. Sikawa tozali—tozali kolikia ete Nzambe akozongisela bino mingi koleka, mpo na komipesa mbeka na bino.

¹¹ Nasosoli ete Ndeko Roy Borders azali awa esika moko. Nayokaki ntango batángaki nkombo na ye, kasi nabanzi ete ntango mosusu akokaki kokóta te. Malamu. Wana nde monyangeli ya mayangani.

¹² Boye, sikawa tolingi mpe koyebisa ete ndeko moko oyo azalaki katikati na biso auti kokende epai na Nkolo na ntongo ya lelo, mobali moko, Ndeko Jackson ya Sturgis, na Michigan. Moto moko te ayebi ndenge akei to nini yango ekomaki. Azalaki na ye malam, mpe bobele . . . Nakanisi ete bakutaki ye asili kokufa, to eloko moko bongo. Na—nayoki likambo yango na bolai nyonso te. Mpe tozali kozongisa matondi mingi na Nzambe ndenge Ndeko Jackson azalaki Moklisto. Natikali komona ye te mibu ebele, kasi afandaki katikati na biso mpe azali moko na biso. Tika ete Nzambe ápemisa molimo na ye ya motuya! Kokende ndenge wana, tondimi ete ntango mosusu ezalaki eloko moko, ete ezalaki ntango mpo na ye kokende. Nkolo atikálá kokébisa biso te na ntina na yango, to ye na ntina na yango, akendekei na ye kaka. Ndenge wana nde esalemaki. Mpe nakobenga mwasi na ye ntango nakokoka kosala yango, mpo na kotalisa ye mawa na biso. Mpe biso nyonso tolingi kotonda Nzambe mpo na bomoi na ye ya motuya lokola Moklisto, mpe na ntina oyo ye azalaki awa na mokili, koleka mingi mpo na biso awa na losambo oyo.

¹³ Sikawa na mpokwa ya lelo, napesaki liyebisi ete ekozala na mabondeli mpo na babeli na mpokwa ya lelo, mpe nakoloba mingi koleka na ntina na babeli na mpokwa ya lelo.

¹⁴ Kasi mpo na mbala oyo, tókota mbala moko na Liloba sikawa, mpo bato baleki mingi ná molunge. Tokokende mbala moko na Liloba. Nalingi kotánga biteni mibale ya Makomi na ntongo oyo, ezali molai mpenza, mpo épesa ngai mwa mobóko ya makambo oyo nalingi koloba.

¹⁵ Mpe, sikawa, nalingi ete báhimisa naino bande yango te, Ndeko Sothmann ná bamosusu, liboso ya kotéka yango, soki ekoki kosalema, na—nalingi koyoka yango liboso tó . . . liboso ékenda epai na bato nyonso.

¹⁶ Sikawa na . . . Nalingi kotánga na Bafilipi, mokapo ya 2, 1 kino 8; mpe na Bakolinti ya Mibale mokapo ya 3, kobanda na 6, mpe tokotánga kino na mokapo ya 4 ya Bakolinti ya Mibale, bobele kotia mobóko. Sikawa, nakotánga liboso na Bafilipi, mokapo ya 2.

Liboso ya kotánga, tóbondela.

¹⁷ Nkolo Yesu, Liloba na Yo ezali Solo. Mpe na ngonga ya mobulu oyo tozali kobika na yango, ekólo kotelemela ekólo, ba-maládi mabe, koningana ya mabelé na bisika ndenge na ndenge, mitema na bato kosénzwa na nsómo, tozali komona loboko kokomá na etutú. Sikawa, oyo wana ezali na ngámbo ya mokili, ete mokili mobimba esengeli komóna yango. Kasi sikawa, ngámbo ya molimo mpe ezali, tozali komona makambo minene kosalema, mpe tolingi kolobela yango lelo.

¹⁸ Pambola Liloba na Yo na mitema na biso. Toyebi ete ata moto moko te na Likoló to na mokili azali na makoki ya kozua Buku oyo, kofungola Bilembo, to ata, kotala Yango. Kasi Moko

amonanaki, Mwana-mpate oyo abomamaki mpe azalaki kotanga makila, nde ayaki mpe azuaki Buku yango, alóngóbanaki mpe azalaki na makoki ya kofungola Yango. E Mwana-mpate ya Nzambe, fungola Liloba na Yo na mitema na biso lelo, mpo tóbondisama. Tozali basali na Yo. Limbisa masumu na biso, Nkolo. Mpe nyonso oyo ekoki kopekisa ete Liloba épésama na nguya mpe makasi monene na bomoi na biso lelo, longola yango, Nkolo, epekiselo nyonso, mpo tókoka kozua nzela polele na mapamboli nyonso oyo elakamaki mpo na biso na nzela na Liloba na Yo. Tosengi yango na Nkombo na Yesu. Amen.

19 Bafilipi 2:

Boye soki elendiseli kati na Klisto ezali, soki libondisi ya bolingo ezali, soki boyokani ya Molimo ezali, soki bokaboli mawa ezali,

Bótondisa esengo na ngai, ete bózala na likanisi moko, bózala na bolingo moko, bózala na boyokani moko, na— na lobanzo moko.

Bósala eloko moko te na kowelana to mpo na koluka lokumu ya mpamba; kasi na komikitisa bómona ete bamosusu bazali malamú koleka bino.

Moto na moto átala bobele na makambo na ye moko te, kasi moto nyonso átalaka makambo ya bamosusu lokola.

Bókanisa na kati na bino yango ekanisaki Klisto Yesu mpe lokola:

Oyo, ata azalaki na lolenge na Nzambe, atalaki kokokana na Nzambe lokola eloko ya kobotola te,

Kasi amiyeisaki mpamba, akamataki motindo na moombo, akomaki na lolenge na moto:

Mpe wana ejuamaki ye na lolenge ya moto, amikitisaki mpe atosaki kino na kufa, ee, kino kufa na ekulusu.

20 Sikawa, soki tokoki kofungola sikawa Bakolinti ya Mibale, mokapo ya 3, tokobanda na molongo ya 6, mpe kotánga yango kino na 18, ná eteni ya mokapo ya 4.

Ye mpe asili kobongisa biso ete tojala basali ya kondimana na sika; oyo na mibeko mikomami te, kasi oyo na molimo: mpo likomi ekobomaka, nde molimo ekopesaka bomoi.

Lisusu, soki mosala ya kufa, oyo ekomami na bilembo na mabanga, eyaki na nkembo, na lolenge ete bana ya Yisalaele bakokaki kotala mpenza elongi ya Mose te, mpo na nkembo ya elongi na ye; atako nkembo yango esengelaki koleka:

Mpo na nini mosala ya molimo ekojala na nkembo na koleka te?

Mpo soko mosala ya bikweli ezalaki na nkembo, mosala ya boyengebene eleki na nkembo mingi.

Mpo ete eloko oyo ezalaki na nkembo ezangi nkembo liboso na nkembo mosusu oyo eleki yango.

Mpo soki eloko oyo esengelaki koleka ezalaki na nkembo, nde...oyo ezali koumela ezali na nkembo mingi koleka.

Na yango, lokola tozali na elikia oyo, tosengeli mingi mpenza...tozali koloba polele mpenza mpe na bosembo nyonso.

Mpe tozali kosala te lokola Mose, oyo azalaki kozipa elongi na ye, mpo bana ya Yisalaele bakoka kotála na bokebi te nsuka ya eloko oyo eleká:

Kasi makanisi na bango ebomamáki miso: mpo ete kino lelo oyo, ezipelo yango ezali kaka, ntango batángaka kondimana na kala; mpo elongolamaka na nzela na Klisto.

Kino lelo oyo, ntango batángaka Mose, ezipelo ezali na mitema na bango.

Kasi soki moto abongwani epai na Nkolo, ezipelo yango ekolongwa.

Nzokande Nkolo azali Molimo: mpe esika Molimo ya Nkolo...bonsomi ezali wana.

Biso nyonso, ná bilongi oyo ezipolami, tozali kongengisa nkembo ya Nkolo lokola na talatála, tobongwani kino na elilingi na ye longwa na nkembo kino na nkembo, oyo euti na Molimo ya Nkolo.

Yango wana, lokola tozali na mosala oyo, kokokana na mawa oyo tozui, tozali kotika te;

Tosili koboya makambo ya kobombama mpe ya nsoni, tozali kotambola na mayele mabe te, tozali mpe kobebisa liloba na Nzambe te; kasi na nzela na kosakola makambo ya sembo polele, tozali komeka komisembola epai na lisosoli ya moto na moto liboso na Nzambe.

Soki Nsango Malamu na biso ezipami, ezipami nde epai na baoyo bazali kokufa:

²¹ Tika ete Nkolo ábakisa mapamboli na Ye na litángi ya Liloba na Ye!

²² Sikawa, liteya na ngai ya ntongo oyo, natii motema ete Nzambe akomonisa yango. Mpe mbala nyonso, soki bino baoyo bozuaka ba-bande mpe boyokaka yango, nazali kolikia mpe kotia motema ete—ete bozali na lisosoli ya molimo na makambo oyo Nzambe azali koluka kotalisa na Lingomba, kozanga koloba yango polele. Bomoni? Ezali likambo moko oyo, mbala mosusu, tosengeli koloba makambo na lolenge oyo motango

ekoki kokóma moke, ekoki ntango mosusu kosala ete bamosusu bábima, bamosusu bákende, mpe bamosusu bá—bá—bákanisa malamamu. Kasi yango esalemaka na nko mpenza. Esengeli kosalema ndenge wana.

²³ Na bongo ekoki kosalema ete bamosusu bákoka koloba: “Olingi koloba ete Nzambe akoki kosala na nko mpenza likambo ya boye?” Asalaki yango mpenza. Azali naino kosala yango.

²⁴ Alobaki mokolo moko, ntango Azalaki ná bato nkoto na nkoto zingazinga na Ye, Alobaki: “Soki bolei Mosuni ya Mwana na Nzambe te, to ya Mwana na moto te, mpe bomeli Makila na Ye te, bozali mpe na Bomoi kati na bino te.”

²⁵ Maloba ya ndenge nini bokanisi ete monganga to infirmière, to moto moko ya mayele mingi, akokaki kokanisa na maloba ya boye, kouta na Moto oyo azalaki na lotomo lokola Ye? Ee, akoloba: “Kolia mosuni? Wana eza kozala molei-bato! Kemela makila ya moto? Wana eza kozala momeli-makila-ya-bato! Na elobeli mosusu, Alingi kokómisa biso balei-bato ná bameli-makila-ya-bato.” Mpe eyanganelo mobimba yango batikaki Ye.

²⁶ Lisanga moko ya batei ezalaki wana elongo na Ye, bato ntuku nsambo, oyo basilaki koponama. Abalukaki epai na bango, mpe Alobaki: “Bokokanisa nini ntango bokomona Mwana na moto komata likoló esika Aútáki?” Sikawa, Alimbolaki yango te. Atikalá kolimbola te *ndenge nini*; Polo moto alimbolaki yango na nsima. Alobaki Yango kaka. Bomoni? Na bongo, na ntango yango, Alobaki: “Bokoloba nini,” na batei yango, “ntango bokomona Mwana na moto komata likoló esika Aútáki?”

²⁷ Na ntembe te bato yango balobaki: “Sikawa, zela naino. Oh, toliaka elongo ná Ye. Tolóboko mbisi elongo ná Ye. Toláláka elongo ná Ye. To—toyebi esika Abotámá. Tomonaki mbeto ya bobebé, oyo A—Atiamaki kati na yango. Bongo ndenge nini Moto oyo. . . Oyo ezali maloba makasi.”

²⁸ Mpe Biblia elobi: “Batambolaki lisusu elongo ná Ye te.” Batikaki Ye.

²⁹ Bongo Atikalaki na zomi na mibale. Aponaki zomi na mibale, mpe moko na bango azalaki molimo mabe, ndenge Alobaki. Boye, Abalukaki epai na bango.

Mpe moto moko te akokaki kolimbola likambo oyo Autaki koloba. “Ndenge nini bakolia Mosuni na Ye mpe komela Makila na Ye? Mpe Akitaki ndenge nini, na ntango oyo Abotamaki awa na mokili oyo?” Bomoni? Bazalaki kososola Yango te.

Na bongo Abalukaki epai ya bantoma, mpe Alobaki: “Bino mpe bolingi kokende na bino?”

³⁰ Mpe na ntango wana nde Ntoma Petelo alobaki maloba ya motuya oyo: “Nkolo, tokokende epai ya nani?” Bomoni? “Mpamba te biso tondimisami. Toyebi mpenza ete Yo, bobele Yo, nde ozali na Liloba ya Bomoi ya eleko oyo.” Bomoni? “Mpe biso

tondimisami mpenza na yango.” Bomoni, bakokaki kolimbola Yango te. Bango. . .

Okoki kolimbola kondima te. Ezali eloko oyo ondimi, mpe etelemi mpenza ngwi na lolenge ete eloko mosusu ekoki kozua esika na yango te.

Na yango, bayebaki ete Liloba oyo ekomamaki mpo na eleko wana oyo bazalaki kobika kati na yango, eleko ya Masiya, ete Alongobanaki mpenza na esika yango. Bongo bakokaki kosala nini, bázonga na mangomba ya malili, ya momesano, oyo babimaki na yango? Balobaki: “Tokokende wapi?” Bomoni? “Tondimisami mpenza ete Ozali na Liloba ya Bomoi.” Bomoni? Ba—bakokaki kolimbola Yango te, kasi bandimaki Yango. Bomoni?

³¹ Yesu alobaki bongo mpo na kokitisa motango ya ebele ya bato na Ye, bomoni, mpo Ákoka kosangisa elongo etonga yango. Mpe kati na bato nyonso wana, bango, bobele bato zomi na moko kati na bango nde basósolaki mpenza Nani Ye azalaki. Bayebaki ete Azalaki Nzambe, mpe Nzambe kaka moko. Sikawa, yango. . .

³² Liteya na ngai na ntongo oyo ezali komonisa, to kozipola Nzambe yango.

³³ Nzambe amíbómbaka ntango nyonso, na eleko nyonso, nsima na ezipelo moko, na bileko nyonso, kasi Azalaka ntango nyonso Nzambe. Bomoni? Kasi Amibombaka mpo na mokili, mpe Amimonisaka na Baponami na Ye, lokola bantoma na eleko wana. Sikawa, wana ezalaki Nzambe kolobáká kati na Klisto.

³⁴ Sikawa, moto, ntango nyonso, ezalaka lolenge ya moto, alukaka komona (na nzoto) Nzambe yango. Azalaka ntango nyonso na mposa ya komona Yango. Moto asálá bikelamo oyo ezali lokola Ye. Bakanisaka na ntina na . . . Ba—Indien bazalaki kosambela mói. Mpe—mpe tomonaka, na Afrika, banyama ya ndenge na ndenge, mpe bongo na bongo. Mpe kuna . . . bikeko oyo eyemámá na makonzi na Alaska, mpe—mpe bililingi ndenge na ndenge oyo bakanisaka ete Nzambe oyo azalaka kati na yango. Ndenge Polo alobaki kuna na Athènes, na ntango wana, na Aelopaji, ayebisaki bango ete bazalaki bato na kobanza-banza na ntina na Nzambe oyo ayebani te, bayebaki ete Azalaki wana kasi ata bongo bayebaki Ye te.

³⁵ Na bongo tomoni tokoki kutu kozonga teee kino na eleko ya Yobo. Yobo ayebaki ete Nzambe moko azalaki. Ayebaki yango. Mpe ata mo—mo—moto moko te, oyo azali na mayele nyonso, azangi koyeba ete Eloko moko esengeli kozala na esika moko. Mpe, sikawa, Yobo azalaki na mposa ya kosolola na Ye.

Mpe nalingi ete bótala malamumu lolenge oyo Nzambe aponaki mpo na kosolola na Yobo. Nzambe azipamaki, ntango asololaki na Yobo. Azipamaki kati na ekumbaki, Akitaki kati

na ekumbaki. Bondimi ete Nzambe ayaka kino lelo kati na ekumbaki, oyo ekoki koya na esika oyo bokomona?

³⁶ Mingi bafandi awa, mwa motango, baoyo bazalaki elongo na biso mokolo mosusu, ntango Ayaki kati na ekumbaki. Ayebisaki biso, mokolo moko liboso na yango, Ndeko Banks Wood ná bamosusu, ntango Alobaki: “Lokóta libanga oyo, bwaka yango likoló, mpe loba: ‘YANGO ELOBI NKOLO! Bokomona yango mbala moko.’” Mpe nalokótaki libanga yango, na sǒngé ya ngomba, nabwakaki yango likoló, mpe . . . na ntembe te, ntango ezalaki kokita, ebandisaki ekumbaki, bomoni, ebendaki mopepe.

³⁷ Osengeli kosala likambo moko mpo likambo mosusu élanda yango. Yesu azuaki eteni ya lipa mpe abukaki yango, na nsima ayikanisaki yango longwa na eteni ya lipa wana. Azuaki mai, asopaki yango na kati ya mbeki. Eliya azuaki mungwa, atiaki yango na kati ya sani; abukaki etape ya nzete, abwakaki yango likoló na mai. Ezali eloko moko lokola elembo.

Ngai nalokotaki libanga yango mpe nabwakaki yango na mopepe, mpe ntango ezalaki kokita, ebandisaki ekumbaki.

³⁸ Na mokolo elandaki, ee, motei moko azalaki elongo ná biso na mobembo ya bokila. Azalaki pembeni na ngai, mpe alobaki na ngai: “Nkolo apesaka mamono na libanda, na bisika ya boye, Ndeko Branham?”

³⁹ Nalobaki: “Iyo, kasi mbala mingi, nayaka awa mpo na kopema.” Na mbala moko, emononeli eyaki.

⁴⁰ Mpe Ndeko Borders, nakanisi azali libanda sikawa, azalaki wana. Ndeko Banks Wood, nakanisi, ná, oh, bandeko ebele bazalaki kuna, mwambe to zomi. Mpe Ndeko Banks Wood azalaki kolandela yango. Likoló na ngomba mpenza, na ngámbo mosusu ya, mpenza, pene na ntaka ya mètre nkama mwambe kolongwa na esika oyo Banje nsambo bamonanaki, ntango nalongwaki awa mpo na kokende kuna na ntina na yango, nazongaki mpe nalobaki. . . na ntina na Bilembo Nsambo. Bobele pene na mètre nkama mwambe longwa na esika yango.

⁴¹ Na bongo, na mokolo oyo elandaki, ntango likambo oyo ezalaki kosalema, ee. . . Nalobaki na ndeko, ndeko oyo, nalobaki: “Likambo na yo, ezali ete ozali na allergie na liso na yo. Minganga bamekaki kosalisa yango na mibu mibale to misato oyo, kasi bakoki te. Balobi ete oko. . . ekoboma liso na yo.” Mpe nalobaki: “Kasi komitungisa te, Nkolo Yesu asepeli na kondima na yo.” Mpe akweisaki bondóki na ye na nsé. Mpe nalobaki: “Mama na yo,” makambo na ye mpe mpasi oyo azalaki na yango.

Mpe alobaki: “Ezali solo.”

⁴² Ndeko Roy Roberson ya losambo oyo, azalaki wana, nabanzi bino nyonso boyebi ye. Lokola azaláká ancien combattant, mpe nayebaki oyo elingaki kosalema, nasimbaki ye na lipeka;

nalobaki: “Ndeko Roberson, sala keba, kengela, likambo moko elingi kosalema.”

⁴³ Nazongaki esika oyo nasengelaki kotelema, mpe ekumbaki moko eutaki na mopepe, ekitaki mpe elekaki na lobwakú moko, kouta na likoló, ezalaki makasi mingi na lolenge ete epasolaki mabanga, na bozindo ya centimètre ntuku mibale to ntuku mibale na mitano, na sóngé ya ngomba, mpe ebwakaki yango na ntaka ya mètre nkama mibale. Esalaki makelele makasi mbala misato boye, mpe Mongongo moko eutaki na kati na yango. Bomoni?

⁴⁴ Mpe bango nyonso bazalaki wana. Ndeko Banks, azali awa sikawa, apusanaki mpe alobaki: “Yango nde oyebisaki ngai lobi?”

Nalobaki: “Iyo, mesie, yango nde.”

Alobaki: “Sikawa, Elobi nini?”

⁴⁵ Nalobaki: “Sikawa, kaka ngai nde nasengeli koyeba yango, Ndeko Banks, omoni, mpo ezalaki . . . Elingaki kobangisa bato.”

⁴⁶ Kasi Ekobaki bongo, esalemaki bobele mwa . . . kokendéké ngambo ya nordi. Mwa moke, nsima na mwa mikolo, Ebetaki mai na mbu, mpe bomonaki oyo esalemaki na etuka ya Fairbanks. Ezalaki elembo ya kosambisama. Sikawa tomoni ete—ete kino lelo, Nzambe azali . . . Bomoni, elingaki kokotisa bato na kati ya nsomo. Na bongo, basengelaki . . . Esengelaki kosalema, bomoni. Esengeli kaka kosalema. Makambo oyo esengeli kosalema, esengeli kosalema, ata ndenge nini. Bomoni, ekosalema, ata ndenge nini.

⁴⁷ Na ntango, Mose azalaki na mposa ya komona Nzambe, mpe Nzambe ayebisaki ye átelema likoló na libanga. Mpe, likoló na libanga yango, Mose atelemaki mpe amonaki Nzambe koleka, mpe mokongo na Ye ezalaki lokola mokongo ya moto. Nzambe azalaki kati na ekumbaki, mpe Nzambe . . . wana Mose atelemaki likoló na libanga.

⁴⁸ Nabanzi bino nyonso bomonaki fotó yango kuna, mokolo wana, totelemaki pembeni na libanga yango. Mpe yango oyo Pole yango, Mwanje na Nkolo, na esika oyo Epasukaki mpenza. Etelemi . . . Ezali naino mpenza kuna, na etánda ya mayebisi, sikawa.

⁴⁹ Bótala, Yahwe ya Kondimana na Kala azali Yesu ya Kondimana na Sika. Bomoni? Azali Nzambe yango moko, kobongoláká kaka lolenge na Ye.

⁵⁰ Sikawa, moto moko alobaki mokolo mosusu, mo—mo—motei ya ba-Batiste, kuna na Tucson: “Ndenge nini okoki koloba ete—ete Yesu ná Nzambe bazali kaka Moto moko?”

⁵¹ Nalobaki: “Ee, ezali mpenza pete, soki okoki kotia pembeni lisosoli na yo moko, mpe kososola elobeli ya Biblia. Bazali Ezàli bobele moko. Nzambe azali Molimo; Yesu azali nzoto oyo Ye

azipamaki kati na yango. Omoni?” Nalobaki: “Ndakisa, na libota na ngai. Mpo na mwasi na ngai, nazali mobali na ye. Mpe nazali na elenge mwana mwasi moko, Rebekah, nazali tata na ye. Mpe nazali na nkoko ya mobali, nkombo na ye Paul, nazali nkoko na ye. Nazali mobali, tata mpe nkoko. Mwasi na ngai azali na makoki moko te likoló na ngai lokola tata to nkoko; azali na makoki likoló na ngai bobele lokola mobali. Mpe mwana na ngai ya mwasi azali na makoki moko te likoló na ngai lokola mobali to nkoko; azali mwana na ngai. Bomoni? Ata bongo, bato nyonso misato yango bazali bobele moto moko. Bomoni? Yango nde Nzambe; Tata, Mwana, mpe Molimo Mosanto, ezali kaka makoki ya eleko ya mosala.” Nzambe azali ndenge moko, Nzambe yango moko.

⁵² Nzambe Amibongolaki, abongolaki lolenge na Ye. Soki botali awa na Bafilipi, Alobaki: “Atalaki yango lokola eloko ya kobotola te, kasi azuaki *lolenge* ya moto.”

⁵³ Sikawa, na lokóta ya Greki, liloba oyo *lolenge*, mokolo mobimba ya lobi nazalaki koyekola yango, koluka kososola yango, namonaki, nakómaki na liloba oyo *en morphe*. Batángaka yango e-n m-o-r-p-h-e. Nalukaki na lokóta ya Greki, mpo námona ndimbola ya *en morphe*. . . Nakoki koloba yango malamau te, kasi yango wana natángaka yango nkoma moko moko, mpo ntango bande yango ekobima, bato, bato ya mayele mingi, báyebe eloko nini na—nalingi kolobela. Ye, ntango *en morphe*, elingi koloba ete Amibongolaki Ye moko. Ye, Ye akitaki na nse. Sikawa, na lokóta ya Greki, elingi koloba ete “Eloko oyo ekokaki komonana te, kasi ezali wana, na nsima ebongwani mpe liso ekoki komona yango.” Bomoni?

⁵⁴ Lokola Eliya, na Dotana. Bomoni, mo—mosali akokaki komona Banje nyonso oyo bazalaki zinga-zinga wana te, mpe Nzambe abongolaki yango; Akitisaki Banje te, kasi Abongolaki emoneli ya mosali yango. Mpe bangomba etondaki na Banje, ná móto, mpe bampunda ya móto, ná makálo ya móto, zinga-zinga ya mosakoli na Ye. Bomoni, bango, Abongolaki emoneli. E—eloko yango esili kozala wana.

⁵⁵ Na bongo, oyo nazoluka koloba ezali ete Nzambe, oyo azalaka ntango nyonso, azali awa. Likambo kaka moko oyo Asalaki ntango Akómaki moto, ezali ete Abongolaki ezipelo na Ye. Bomoni? Ye—Ye, *en morphe* oyo, A—Amibongolaki Ye moko, longwa na oyo Ye azalaki mpo na kokóma oyo Ye azali, to ezipelo na Ye, mosala mosusu.

⁵⁶ Ndakisa, na lisano monene ya théâtre. Ndenge nazalaki koloba na ntongo oyo, nazalaki koluka kotalisa yango na lisolo ya Shakespeare. Esili koleka ntango molai. Kasi ntango Shakespeare akomaki lisano ya—ya—ya théâtre yango. . . mpo na Roi Jacques ya Angleterre, ntango a. . . moto ya Macbeth. Bomoni, Shakespeare azalaki kondima bondoki te; kasi na

lisano yango, lokola mokonzi azalaki kondima bondoki, boye asengelaki kokótisa bondoki. Bomoni? Sikawa, mpo na kosala yango, babongolaki misala.

⁵⁷ Becky, awa, na lisano ya *Carmen*, basalaki yango na—na eteyelo epai auti kosilisa kelasi, eleki mwa bampóso. Sikawa, moto moko akokaki kosala misala ya bato misato to minei. Mpo na kosala yango, a—azalaki kobongola ezipelo na ye. Mbala mosusu, abimi, azali moto *songolo*; na mbala ya nsima ntango abimi, akómi moto mosusu. Kasi ezali bobele moto yango moko ntango nyonso.

⁵⁸ Ezali mpe bongo mpo na Nzambe. Amibongolaki Ye moko longwa—longwa na Likonzi na Móto, mpo na kokóma Moto. Na nsima Amibongolaki longwa na yango, mpo na kozonga na lolenge ya Molimo, mpo Ákoka kofanda kati na moto. Nzambe kosaláká kati na moto mpo na kotalisa oyo Ye azalaki mpenza. Yesu Klisto, azalaki Nzambe kosaláká kati na Moto, kati na Moto *moko*. Kati na Moto moko, yango nde oyo Ye azalaki. Autaki kobongwana longwa na Likonzi na Móto, na nsima Akótáki; ezalaki ezipelo na kati ya lisobe, oyo ezalaki kobomba Nzambe na miso ya Yisraele. Mose amonaki lolenge ya nzoto na Ye, kasi na bosóló, Azalaki ntango nyonso komibomba nsima na Likonzi na Móto, elingi koloba Logos oyo eutaki na Nzambe.

⁵⁹ Sikawa tomoni awa ete kobanda na Pantekote, Nzambe azali kosala na *kati na* moto te, to kosala . . . sikawa Azali kosala *na nzela na* moto. Bomoni? Na ntango wana, Azalaki kosala na *kati na* Moto, Yesu. Sikawa Azali kosala *na nzela na* moto oyo Asili kopona na ntina oyo. Nzambe, na lolenge ya moto, Amibongolaki longwa na lolenge ya—ya . . . ya Nzambe, kino na lolenge ya moto.

⁶⁰ Ayaki na nkombo misato, na nkombo misato ya mwana. Ayaki na Mwana . . . na nkombo ya Mwana na—na moto, Mwana na Dawidi, mpe Mwana na Nzambe; nkombo misato ya mwana.

⁶¹ Sikawa, Ayaki liboso na nkombo ya Mwana na Da- . . . Mwana na moto, mpo Azalaki Mosakoli. Sikawa, Jehovah Ye moko azalaki kobenga Ezekiele ná basakoli: “Mwana na moto, ozali komona nini?” Yesu atikalá komibenga Ye moko Mwana na Nzambe te; Azalaki komibenga Ye moko Mwana na moto, mpamba te—mpamba te Makomi ekoki kobukana te.

Eloko moko te ekoki kobukana, na kati ya Makomi. Liloba moko na moko esengeli kozala bongo. Nde lolenge oyo ngai nandimaka yango. Nde lolenge Esengeli kozala, ezali te mpo ngai nandimaka bongo, kasi mpo Ezali Liloba na Nzambe.

⁶² Sikawa soki botali malamumu na ebandeli, Liloba moko, na lokasa ya liboso na Biblia, na Genese 1, tomoni ete nyonso . . . Maladi nyonso, mawa nyonso, mpasi nyonso ya mitema, mpe nyonso oyo esilá kokómela bato, eyaki mpo moto *moko* azangaki kondima Liloba *moko*, yango nde ebotali nyonso oyo. Oyo wana ezali na ebandeli ya Biblia. Na nsuka ya Biblia, Emoniseli 22,

Nzambe yango moko alobaki: “Moto nionso oyo akolongola Liloba moko na Oyo, to akobakisa liloba moko likoló na Yango.” Bomoni, esengeli kozala Liloba likoló na Liloba, kaka ndenge Ezali.

⁶³ Boye, yango wana, mpe bózua kaka, ndakisa, likambo moke oyo ngai. . .moto moko alandelaka ngai ntango nyonso mpo na likambo ya basi kokátaka suki na bango. Sikawa, mpo na ngai, na ntango nyonso oyo mwasi asalaka bongo, ata azali mosanto ndenge nini, mpe ata azali na boyebi ya ndenge nini, azali kaka na libunga. Alataka ba-kupé ná bilamba ya ndenge wana; ata asalaka nini, ata ayembaka ndenge nini, ata ateyaka malamú ndenge nini, nyonso oyo akoki kosala, ata abikaka bomoi ya ndenge nini, ata bongo, ezali bobele Liloba moko wana nde ebukani. Bomoni? Bomoni, esengeli kozala Liloba moko na moko. Lisakola te; Liloba moko, Liloba se moko! Boye, Biblia ezalaka na ndimbola ya moto moko te. Esengeli kozala Liloba likoló na Liloba, ndenge Ekomámi. Tosengeli kondima Yango.

⁶⁴ Mpe bobele kondima Yango te, kasi kobikela Yango. Soki tobikeli Yango te, boye tondimi Yango te; tozoloba kaka ete tondimi. Ndenge ngai. . .Na moboko ya oyo nalobaki, bayekoli yango bakokaki kolimbola Yango te, kasi bandimaki Yango, ata bongo, mpe bazalaki kotatola yango mpe kobikela yango. Na ntango oyo bamosusu nyonso batangwaki mosika na Yango, bango bakangamaki na Yango! Bandimaki Yango! Lolenge wana nde biso tosalaka. Lolenge wana nde bosengeli kosala. Ata moto mosusu asalaka nini, biso tondimaka Yango mpe, na nsima, tosalelaka Yango. Soki osalaka bongo te, boye ondimaka Yango te.

⁶⁵ Sikawa bótala, sikawa, ntango Ayaki, Asengelaki koya lokola Mwana na moto, mpo Makomi Mosanto elobaki ete Akosala bongo, “Nzambe akopesa bango Mosakoli moko.” Boye, Akokaki Ye moko komibenga Mwana na Nzambe te, mpo ezalaki eleko ya mosala wana te. Azalaki Mwana na moto azosakoláká, mpo na kokokisa, mpe kopesáká bango emoniseli ya makambo nyonso oyo esilaki kosalema, mpe atalisaki oyo Ye azalaki. Na bongo, Azalaki na mokili lokola Mwana na moto.

⁶⁶ Bótala mwasi ya Silofenisia wana, oyo ayaki mbangu epai na Ye, alobaki: “Yo Mwana na Dawidi, yokela ngai mawa!” Atikálá ata kotombola motó na Ye te. Azalaki na makoki moko te likoló na Ye lokola Mwana na Dawidi. Azalaki mwasi ya Mabota.

Kaka lokola mwana na ngai ya mwasi, azali na makoki moko te likoló na ngai lokola mobali na ye; to mwasi na ngai, lokola mwana na ngai ya mwasi. Ata bongo, azali mwana na ngai mpe mwasi na ngai, azali mwana na ngai na Nsango-malamu. Kasi, na ndenge ya mokili, azali na makoki moko te ya kobenga ngai ta—tata. Bomoni?

Sikawa bótala, mwasi ya Mabota oyo azalaki na makoki moko te likoló na Ye lokola Mwana na Dawidi. Kasi mokufi-miso Balatimai azalaki na yango, bomoni, azalaki Moyuda. Sikawa, Ayaki lokola Mwana na moto.

⁶⁷ Bosengeli koyeba maloba oyo mpe makambo oyo. Bótala Hattie Wright ntango wana, na ntango ya Pull ya Misato. Bomikaniseli yango. Na makambo yango nyonso, mwasi wana alobaki likambo esengeli. Bosengeli koloba liloba oyo esengeli, likambo oyo esengeli epai na Nzambe.

⁶⁸ Bótala sikawa, Ayaki liboso lokola Mosakoli, mpe babakaki Ye na ekulusu. Baoyo ya Ye moko babakaki Ye na ekulusu. Ayaki lokola Mwana na moto.

⁶⁹ Bongo nsima na koya ya Molimo Mosanto, Akómaki Mwana na Nzambe. Nzambe azali Molimo. Azalaki Molimo Mosanto, Mwana na Nzambe. Abikaki kati na bileko ya lingomba lokola Mwana na Nzambe.

⁷⁰ Sikawa, na Millenium, Akozala Mwana na Dawidi, Akofanda na Ngwende ya Tata na Ye, Dawidi. Azali Mwana na Dawidi.

⁷¹ Sikawa, mpe, bomikasela, kati na Mwana na Nzambe. . . Na eleko ya lingomba ya Laodikia, babimisaki Ye libanda. Mpe na Luka, Alobaki ete Akomonisama lisusu lokola Mwana na moto, Mosakoli, mpo na kokokisa oyo etikalaki. Bomoni? Makomi esanganaka malamumu be mpenza. Mwana na moto, Mwana na Nzambe, Mwana na Dawidi. Ezalaki nini? Ezali Nzambe moko yango ntango nyonso, Azali kaka kobongola lolenge na Ye, *en morphe*. Azali kaka kobongola yango. Mpo na Ye, ezali lisano monene ya theatre. Azali kosala misala yango.

⁷² Ayaki lokola Mwana na moto, Mosakoli. Asalaki mpenza-mpenza. Ata mwasi wana, ná masumu na ye nyonso, kuna ná libulu ya mai, ayebaki Ye. Alobaki: “Toyebi ete Masiya akoya, oyo babengaka Klisto, yango nde makambo oyo Akosala.” Bomoni, asósolaki mpo azalaki Momboto mophonámá. Na bongo ye. . .

Nzokande bamosusu kati na bango basosolaki Yango te. Bazalaki na eloko moko te mpo na kosósolisa bango. Bazalaki kati na masumu, mpo na kobanda.

⁷³ Mpo, mpo na misala na Ye, Abóngolaka lolenge na Ye. Na nsima, Ayaki na lolenge ya Mwana na moto.

Mpo na eleko ya ba-reformateur, Wesley, Luther, kolandana ná bango nyonso, bongo tomoni ete babulunganisaki yango mingi, kaka ndenge bana ya Yisraele basaláká, na lolenge ete ntango Amonani mpenza na mikolo ya nsuka, na eleko ya ba-Pantekotiste, lokola Molimo Mosanto, baboyaki Yango. Basalaki likambo moko oyo Yisraele basaláká.

Mpe sikawa Asali nini? Ayei lisusu lokola Mwana na moto. Na nsima, longwa na yango, Mwana na Dawidi. Bomoni ndenge tokómi pene? Mwana na moto, Mwana na Dawidi, Mwana na Nzambe. Amonisami na mikolo ya nsuka lokola Mwana na moto, kokokana na Malaki 4, mpe masakoli mosusu nyonso, oyo etali ngonga oyo. Azali lisusu kosala ná lingomba te nsima na Ye. . . Babimísáki Ye; libanda, Azali kobeta na ekuke. Mimboto mosusu oyo eponámá ezali naino kuna. Asengeli kokómela bango.

⁷⁴ Mpe Nzambe amisopaki Ye moko kati na moto. Na Yoele 2:28, tomoni ete Alobaki: “Nakosopa, na mikolo ya nsuka, Molimo na Ngai.” Sikawa, soki botali malamú liloba yango wana, na lokóta ya Greki. Ekoki kosala ete námikosa, kasi oyo nakokaki komona. . .

⁷⁵ Bosengeli kokebaka na maloba. Na Anglais, mbala mosusu, ezalaka na ndimbola mibale. Ndakisa, liloba oyo tolobaka “nzambe.” “Nzambe akelaki likoló mpe mabelé,” Genese 1. Kasi sikawa, na Biblia, Elobami: “Na ebandeli, Elohim.” Sikawa, Elohim, na Anglais balobaka “nzambe,” kasi ezalaki mpenza yango te. . . *Elohim*. . . Eloko nyonso ekoki kozala nzambe, mpo na liloba oyo *nzambe*, okoki kokómisa ekeko nzambe, okoki kokómisa piano wana nzambe, okoki kokómisa eloko nyonso nzambe.

⁷⁶ Kasi ezali bongo te mpo na liloba oyo *Elohim*. Elingi koloba “Oyo azalaka na Ye moko.” Bomoni? Piano wana ekoki kozala na yango moko te, eloko moko te ekoki kozala na yango moko. Boye, liloba oyo *Elohim* elingi koloba “Oyo azalaka ntango nyonso.” *Nzambe*, ekoki koloba eloko ata nini. Bomoni bokesene kati na liloba yango?

⁷⁷ Sikawa, ntango Elobaki awa ete Ye *amisilisaki* Ye moko, to *amisopaki*, sikawa, biso tokoki kokanisa boye, ete “Asanzaki,” liloba yango na Anglais, *kosilisa*, to *kosopa* eloko oyo euti na Ye, eloko moko, oyo ekeseni na Ye, ebimaki kati na Ye. Kasi liloba oyo *kenos*, na Greki, elingi koloba te ete “Asanzaki,” to nini. . . Loboko na Ye elongwaki, to liso na Ye elongwaki, moto mosusu.

⁷⁸ Elingi koloba, Ye moko Amibongolaki, “Amisopaki Ye moko kati na,” (Amen!), na kati ya ezipelo mosusu, na kati ya lolenge mosusu. Ezali te ete moto mosusu abimaki kati na Ye, oyo babengaki Molimo Mosanto, kasi Ezalaki Ye Moko. Bososoli yango? Ye Moko nde Amisopaki kati na bato. “Klisto kati na bino!” Ezali kitoko mingi, malamú mingi mpenza, kokanisa ete Nzambe Ye moko ákomisopáká kati na moto, kati na mondimi. “Kosopa!” Kosala bongo, ezalaki eteni na Ye na lisano ya théâtre.

Nzambe, litondi mobimba, Bonzambe mobimba, kati na nzoto, ezalaki na kati na Moto oyo, Yesu Klisto. Azalaki Nzambe, mpe Nzambe bobele. Moto ya misato to moto ya mibale te, to moto ya liboso te; kasi Moto *yangó*, Nzambe azipamaki kati na mosuni na moto.

79 Timote ya Liboso 3:16: “Na ntembe te, libombami ya bonzambe ezali monene; mpamba te N-z-a-m-b-e, Elohim,” N ya monene-z-a-m-b-e, na Biblia. Bolukaluka yango, moto nyonso. Ezolobela, na oyo ebandeli, Elobaki: “Elohim.” “Na ebandeli, Elohim.” Bomoni? “Mpe, Elohim, na ntembe te, libombami ya Elohim ezali monene; mpamba te Elohim akómaki mosuni, mpe tosimbaki Ye.” Elohim, azipamaki na mosuni na moto! Jehovah monene, oyo azalaki kotondisa etando mobimba, ntango, mpe bisika nyonso, akómaki moto. Tosimbaki Ye, Elohim. “Na ebandeli, Elohim. Mpe Elohim akomaki mosuni, afandaki elongo ná biso.”

80 Nini? Oyo nde lolenge na Ye ya kosala, biteni ya lisano yango. Yango nde lolenge Asengeli kosala misala yango, nde lolenge na Ye ya komimonisa epai na biso, lokola moto mosusu. Bisó tozali bobele bato, mpe Ye ayebi yango. Mpe tosósolaka bobele lokola bato. Toyebaka bobele lokola bato. Toyebaka bobele makambo biyokeli na biso epesaka biso nzela ya koyeba, mpe oyo etikali, tosengeli kondima yango na kondima. Tosengeli koloba ete Nzambe moko azali; tómóna Ye, to te, tondimaka yango, ata bongo. Bomoni? Ázala to te, tondimaka yango kaka, mpo Nzambe nde alobaki bongo.

81 Lokola Abraham, azalaki komona mwana yango te, bilembo moko te, zemi moko te na—na Sara, ata mpe sanza ya bomwasi moko te to nini, kasi ata bongo, Nzambe alobaki yango. Elikia nyonso, ata libumu na—na ye esilaki kokufa, mpe bomoi ya ye mobali, kati na ye, ezalaki lisusu te, mpe mo—mosisa ya bomoi ya mobali esilaki kokauka, mpe bomoi ya—ya bomwasi esilaki kokauka kati na mwasi na ye. “Kasi ata bongo, atengá-tengaki te, na kozanga kondima, mpo na elaka ya Nzambe, kasi akómaki na makasi, azalaki kopesa nkembo, ayebaki ete Nzambe azalaki na makoki ya kokokisa nyonso oyo Alobaki ete Akosala.”

Ndenge wana nde tosengeli kondima Liloba yango lelo. Ekosalema ndenge nini? Nayebi te. Nzambe alobaki ete ekosalema lolenge wana, mpe yango ekati likambo.

82 Moto monene oyo amonanaka te, ezali Nani? Ye oyo Abraham amonaki na bimononeli, ezali Nani? Kasi, na nsuka mpenza, Amonisamaki na mosuni, liboso mwana yango áya. Nzambe Ye moko ayaki epai ya Abraham na lolenge ya moto, na ntango ya nsuka. Amonisami polele! Amonáká Ye na kati ya Pole ya moke, mokolo moko; amonáká Ye na bimononeli; ayókáká Mongongo na Ye; bimoniseli mingi. Kasi liboso mpenza ya mwana oyo alakamaki, amonaki Ye na lolenge ya moto, asololaki na Ye, mpe apesaki Ye mosuni ya kolia ná eloko ya komela. Bomoni? Bótala, Nzambe Ye moko azipamaki kati na mosuni na moto.

83 Ezali eteni ya lolenge na Ye ya kosala. Lolenge oyo nde Amimonisaka Ye moko epai na biso, amonisaka polele Liloba ya Seko, Nzambe, Jehovah akomi mosuni. Ndakisa, na Santu

Yoane 1: “Na ebandeli Liloba azalaki, mpe Liloba azalaki elongo na Nzambe, mpe. . . Na ebandeli Elohim azalaki, mpe Elohim azalaki. . . akómaki Liloba, mpe Liloba ezalaki Elohim. Mpe Liloba ekómaki Elohim.” Bomoni? Ezali ndenge moko, ezali kaka kozipolama.

⁸⁴ Ndakisa, likoki, bomoni, ezali kati na Nzambe. Likoki ezali likanisi na yo. Nzambe, na ebandeli, Oyo-ya-seko, Azalaki ata Nzambe te. Azalaki Oyo-ya-seko. Azalaki ata Nzambe te; *Nzambe* ezali “eloko oyo basambelaka,” to eloko moko. Bomoni? Boye, Azalaki ata yango te. Azalaki Elohim, Oyo-ya-seko. Kasi kati na Ye, ezalaki makanisi. Alingaki komitalisa polele. Bongo, Asalaki nini? Na bongo Alobaki Liloba moko, mpe Liloba yango elati nzoto. Ezali bongo na mobimba, kobanda na Genese kino na Emoniseli. Ezali na eloko ya mabe ata moko te. Ezali nde Elohim kolátaká nzoto, mpo Ákoka kosimbama, koyoka yango. Mpe na Millenium, ezali Elohim afandi Ngwende, bomoni, ya solo, elongo ná bato na Ye nyonso zinga-zinga na Ye, baoyo Abongisaki liboso na kozalisama ya mokili.

⁸⁵ Lokola moto oyo atongaka bangonga ya mike-mike to asalaka bangonga ya mike-mike, motúli. Ngonga moko na moko esengeli kobeta kokesene na mosusu. Bisalelo yango moko, kasi ndambo ya ebende, ndambo ya cuivre, ndambo ya motáko, mpo ékoka kolela “ting.”

⁸⁶ Ndenge wana nde Nzambe asalaki. Asangisaki eloko oyo ná oyo kuna, oyo ná oyo kuna, oyo ná oyo kuna, kino ntango Azuaki mpenza eloko oyo Alingaki kozua. Ezali lolenge wana nde Akitaki. Nzambe amizipolaki kati na Likonzi na Móto, na nzela ya basakoli, na nsima, na kati na Mwana na Nzambe, oyo Azalaki Nzambe. Bomoni, kaka Nzambe yango moko komifungola mpenza, longwa na kobonga be kino na kobonga be, longwa na nkembo kino na nkembo. Ezali lolenge wana nde Lingomba etámbolaka.

⁸⁷ Bótala, na kati ya bileko, ezalaki ndenge moko, na nzela ya basakoli na Ye, Asili komimonisa Ye moko. Bango bazalaki mpenza basakoli te, bazalaki banzambe. Ye nde alobaki bongo. Mpamba te, oyo bazalaki koloba ezalaki Liloba na Nzambe. Bazalaki mosuni oyo Nzambe azalaki komizipa kati na yango. Bazalaki banzambe. Yesu alobaki, Ye moko, alobaki: “Ndenge nini bokoki kokweisa Ngai ntango Nalobi ete Nazali Mwana na Nzambe, nzokande mobeko na bino moko elobi ete baoyo Liloba na Nkolo eyaki epai na bango bazalaki banzambe?” Bomoni?

⁸⁸ Boye ezalaki Nzambe nde komisala kati na moto oyo abengami mosakoli. Bomoni? Mpe Liloba na Nkolo eyaki epai ya moto oyo, boye, ezalaki mosakoli te; mosakoli azalaki ezipelo, kasi Liloba ezalaki Nzambe. Liloba ya moto ekoki kosala bongo te. Bososoli oyo nalingi koloba? Ekoki kosala bongo te. Kasi na

moke na yango, ezalaki Nzambe. Bomoni, Azalaki Liloba na Nzambe na lolenge ya moto, abengami “moto.”

Bótala, Atikálá kobongola ezaleli na Ye te, bobele lolenge na Ye. Baebele 13:8 elobi: “Azali motindo moko lobi, lelo, mpe libela.” Boye, Abongolaki ezaleli na Ye te ntango Ayaki. Azali ntango nyonso Mosakoli yango, na bileko nyonso, ndenge moko: Liloba, Liloba, Liloba, Liloba. Bomoni? Akokaki kobongola ezaleli na Ye te, kasi Abongolaki lolenge na Ye. Baebele 13:8 elobi “Azali motindo moko lobi, lelo, mpe libela.” Abongolaki bobele ezipelo na Ye.

⁸⁹ Ndakisa, nabongwanaki longwa na mobali, ntango mwana na ngai abotamaki, na bongo nakómi tata. Ntango nkoko na ngai abotami, nakómi nkoko. Bomoni? Kasi, ngai nabongwani te; ezali kaka—kaka ngai. Bomoni? (Ezali mpe bongo ná Nzambe.) Ezali ete nabongoli kaka. . . Bomoni, ebongolaka kaka lolenge ya moto. Bomoni?

Bótala. Mpe ezaleli ebongolaka moto longwa na elenge mobali kino mobali oyo akóli, kino na oyo akómi mobange. Mpe yango mpenza, bomoni, kaka lolenge ya moto nde ebongwanaka.

⁹⁰ Sikawa, okoki koloba te ete elenge mobali oyo ateleme awa, ya mibu zomi na motoba, ete azali nkoko. Akoki kozala nkoko te. Lolenge na ye esengeli kobongwana. Ndambo ya mibu nde ekobongola ye, na nsima, akokóma nkoko. Bomoni oyo nalingi koloba?

⁹¹ Kasi ezali kaka Moto yango moko ntango nyonso, Moto yango moko, Nzambe ntango nyonso. Na lolenge oyo nde Ye moko Amimonisaka na bato na Ye, na kosaláká bongo. Bótala, na eleko mobimba ya Likonzi na Móto, Amimonisaki Ye moko na bato na Ye. Na eleko ya—ya Yesu, Amimonisaki Ye moko na bato na Ye. Na eleko ya Molimo Mosanto, lokola Mwana na Nzambe. Mwana na Dawidi. . . Amimonisaka Ye moko ntango nyonso na ndenge wana na bato na Ye, kosala ete bato báyeba Ye. Azipamaka na nsima ya eloko moko, bótala, na ndenge moko, to ezaleli moko, mbala nyonso.

⁹² Nzambe azipamaki kati na Yesu, mpo na kosala mosala ya lisíko na ekulusu. Nzambe, lokola Molimo, akokaki kokufa te. Azali Seko. Kasi Asengelaki kolata ezipelo mpo na kosala mosala ya kufa. Akufaki, kasi Akokaki kokufa te na lolenge na Ye ya Nzambe. Asengelaki kosala yango na lolenge ya Mwana, lokola Mwana na moto, na mokili. Bomoni? Asengelaki kozala na lolenge ya Mwana. Na nsima, ntango Ayaki lisusu na Pantekote, Akómaki lisusu Mwana na Nzambe. Bososoli oyo nalingi koloba? Bozui likanisi yango? Azalaki. . .

⁹³ Asengelaki koya na kati ya mosuni na moto, mpo. . . mpe, moto moko te, na mposa ya nzoto te. Mpamba te wana ezali kotalisa lisusu polele makambo oyo tolobaka mpo na momboto na nyoka, bomoni, “koyebana nzoto,” koyebana nzoto

mpenza. Bambuma ya pomme te; koyebana nzoto! Ya solo. Esengelaki kozala yango. Bótala awa, bomoni, mpo na moto malamunyonso. . . Bótala basakoli wana kuna, kasi Asengelaki kozala koleka mosakoli. Bomoni? Mpo na kosala yango, Asengelaki kobotamba na mongondo, kolakisáká ete mbotama na mongondo etalisaki polele. . . Asengelaki kobotama na nzela na mongondo, mpo na kolongola elakeli mabe, Monó. Bomoni likambo nalingi koloba? Boye, esengelaki kozala koyebana nzoto. Atalisaki yango polele na boyei na Ye Moko; Ayaki na mposa ya nzoto te, kasi na nzela na mbotama na mongondo. Mpe Abongolaki ezipelo na Ye longwa na Jehovah kino na Yesu, mpo na kosala mosala ya lisíko, na lisano ya théatre oyo Azalaki kosala, Nzambe na ekulusu.

⁹⁴ Ba-Greki balingaki komona Ye. Na Santu Yoane 12:20, bato mingi kati na bino basilá koyóká ngai koteya likoló na yango, koloba: “Misie, tolingi komona Yesu.” Bomonaki yango?

⁹⁵ Sikawa, ba-Greki bazalaki bato ya mayele mingi, bazalaki bato minene. Mpe bazalaki na—bazalaki na—na mposa makasi ya Nzambe, ndenge Polo ateyaki bango na Aleopaji. Mpe bazalaki, ba—bakambaki—bakambaki mokili na makambo ya science mpe—mpe koyekola mingi, bazalaki bato minene. Kasi bazalaki kosambela mpe kondimela mythologie mpe nyonso wana, babúku ya ntóki mpe ntóki ya kokámwa, mpe bongo na bongo.

⁹⁶ Kasi ba—ba—bamitungisaki mingi na ntina na Moto Oyo akokaki kobikisa babeli mpe kosakola makambo oyo ezalaki kokokisama bongo mpenza. Bamitungisaki mingi, na bongo bayaki mpo na komona Ye. Sikawa, bótala malamunyonso sikawa, bózanga likambo oyo te. Bomoni? Bayaki mpe balobaki na Filipi, moto ya Bethsaída: “Misie, tolingi komona Yesu.” Mpe Filipi ná moyekoli mosusu bamemaki ye epai na Yesu, mpo bámona Yesu.

⁹⁷ Sikawa bótala maloba mpenza oyo Yesu azongiselaki bango, mpamba te bayaki mpo na komona Nani Ye azalaki, mpe bakokaki komona Ye te. Bamonaki lolenge, kasi Azalaki kati na tempelo na Ye. Nzambe azalaki kati na tempelo na Ye, Azipamaki na nzoto na moto. Bótala maloba oyo Alobaki: “Soki mbuma ya lisangu ekwei na mabelé te, bomoni, mpe ekufi te, ekotikala yango moko.” Bomoni? “Ngonga ekoki, etikali moke, oyo Mwana na moto akokembisama, bomoni, Asengeli kotika mokili oyo. Mpe soki ngonga yango ekoki te, bokotikalákak kozala na makoki ya komona Yango te.” Bomoni?

⁹⁸ Bótala, mpo na nini bakokaki komona Yesu te? Azipamaki. Nzambe azipamaki. Ba-Greki bazalaki na mposa ya Nzambe moko, mpe Azalaki wana, kasi bakokaki komona Ye te mpo na ezipelo. Ezali mpe bongo lelo, bakoki komona Ye te mpo na ezipelo. Ezipi elongi na bango. Ba-Greki yango bazipamaki, to Yesu azipamaki mpo na ba-Greki yango.

⁹⁹ Bótala, Alobaki na bango: “Soki mbuma na lisangu ekwei na mabelé te, ekotikala yango moko.”

¹⁰⁰ Bango, bakokaki kososola te lolenge nini, mpo na nini bakokaki komona Ye te. Moto moko azalaki wana. Bayaki mpo bámona Nzambe, kasi bamonaki moto moko. Bomoni? Bakokaki komona Nzambe te mpo Nzambe azipamaki mpo na bango. Sikawa bóbosana yango te, Nzambe azipamaki kati na moto. Bakokaki koloba: “Moto moko te akoki kosala misala oyo, bobele Nzambe. Moto moko te akoki kosala yango, mpe tala moto moko atelemi wana, mpe tala, misala ya Nzambe ezali komonisama polele na nzela na Ye!” Bomoni, bakokaki kososola te ete Nzambe azipamaki.

¹⁰¹ Azipamaki kati na moto, ndenge Azipamáká ntango nyonso. Kasi, Azipamaki mpo na bango, Azalaki kati na tempelo na Ye ya moto. Nzambe azalaki kati na tempelo ya moto. Sikawa, bózála na bokébi mpenza, sikawa Azali ndenge moko lobi, lelo, mpe libela. Bomoni? Nzambe azipami, Amibombi na miso ya mokili, Azipami kati na moto. Bomoni? Nzambe azalaki wana! Ba-Greki wana balobaki: “Tolingi komona Ye.”

¹⁰² Mpe Yesu alobaki: “Mbuma ya lisangu esengeli kokweya mpe kokufa.” Osengeli kokufa na makanisi na yo nyonso. Osengeli kobima libanda na makanisi na yo moko.

Lokola bayekoli wana, bakokaki kolimbola te likambo ya kolia nzoto na Ye mpe—mpe komela Makila na Ye, kasi, bomoni, basilaki kokufa mpenza na makambo yango. Bakufaki na Mobeko moko, bakufaki mpo na Klisto. Ata ndenge nini, to ata emonanaki lokola Alongamaki, bango bakobaki kaka kondima Yango. Bomoni? Bakokaki komona kati na Moto yango; Moto oyo azalaki kolia, komela, kolóbo mbisi, kolala, mpe makambo nyonso mosusu, abotamaki awa na mokili, mpe azalaki kotambola elongo na bango, kosolola na bango, koláta bilamba lokola bango nyonso, kasi ezalaki Nzambe.

¹⁰³ Boye, ba-Greki bakokaki komona Ye te, mpo Abombamaki na miso na bango, kati na moto. Bótala Liloba na Ye epai na bango: “Soki mbuma ya lisangu ekwei na mabelé te.”

¹⁰⁴ Nzambe azipamaki kati na lolenge ya moto, Amibombaki na miso na bango. Bango bakokaki bobele komona moto. Kasi Baponami wana bamonaki Nzambe. Moto moko amonaki moto, mosusu amonaki Nzambe. Bomoni? Mpe ezalaki Nzambe nde azipamaki kati na moto, bango mibale balobaki solo, kasi ezali kondima na yo na eloko oyo ozali komona te. Ondimi yango kaka. Nzambe azipami kati na moto. Azalaki kati na mosuni yango, mpe mosuni yango ezalaki ezipelo na Ye. Ezipelo yango epasukaki, bomoni, mpo Nzambe ámonisama polele.

¹⁰⁵ Na Kondimana na Kala, Nzambe abombamaki, ntango Afandaki na ebóngá na Ye ya mawa; na ebóngá ya mawa, na nzela ya ezipelo. Na Kondimana na Kala, Nzambe azalaki kati

na tempelo na Ye. Kasi bato bazalaki kokota mpe kokumbamela boye, kasi, bómikanisela, ezipelo ezalaki wana (amen) oyo ezalaki kobomba Nzambe. Bayebaki ete Nzambe azalaki wana. Bakokaki komona Ye te. Kuna, Likonzi na Móto wana etikálá komonana lisusu kuna te. Bomonaki yango? Ata mbala moko te, kati na Makomi, kobanda ntango Likonzi na Móto yango ekotaki nsima ya ezipelo wana, Ete etikálá komonana lisusu te, kino ntango Eyaki na nzela na Yesu Klisto. Nzambe azipamaki!

¹⁰⁶ Ntango Azalaki na mokili, Alobaki: “Nauti na Nzambe mpe Nakozonga na Nzambe.”

¹⁰⁷ Na nsima Polo, (nsima na Ye kokufa, kokundama, mpe kosekwa), na nzela na Damaseke, Likonzi na Móto yango emonanaki lisusu. Ezalaki nini? Eutaki na nsima ya ezipelo! Nkembo na Nzambe!

¹⁰⁸ Azalaki na nsima ya ezipelo. Sikawa Azalaki na nsima ya nini? Ezipelo ya mposo. Bomoni, “bamposo ya gambala,” nsima ya ezipelo. Mpe ntango ezipelo yango epasukaki mokolo ya kobakama na ekulusu, ntango ezipelo oyo Azipamaki na yango epasukaki mokolo ya kobakama na ekulusu, ebóngá mobimba ya mawa emonanaki polele.

¹⁰⁹ Sikawa, Bayuda bakokaki kososola te ndenge nini Nzambe akokaki koyokela bato ya masumu mawa, bato mabe lokola biso. Kasi bakokaki komona te Moto Oyo azalaki koyokela bato mawa, mpo Abombamaki. Azalaki nsima na ebóngá ya mawa, na kati, bamposo ya gambala kodiembeláká, ezipaki Ye. Liboso. . .

¹¹⁰ Liboso, soki moto akotaki na nsima ya ezipelo, ezalaki liwa ya mpwasa. Amen. Oh, na miniti moke, tokoyekola likambo moko awa, bomoni, soki bokoki—bokoki koyamba Yango. Koleka na nsima ya bamposo yango. . . Ata moko na bana mibali ya nganganzambe amekaki kosala yango ntango moko, mpe akufaki. “Koleka nsima ya ezipelo wana te.” Moto oyo alekaki nsima na. . . Mpo na nini? Lisiko ezalaki naino te, kati na yango. Ezalaki na moke na yango. Ezalaki kaka na moke na yango. Mpe eloko nyonso *ya moke* ezali naino eloko ya solo mpenza te, bomoni, kaka na moke na yango. Ezalaki lisiko. . . Masumu ezalaki kozipama, kolongolama te. . . kolimbisama, kútu, kolimbisama te. *Kolimbisama* ezali “kokabola mpe kotia pembeni.” Na boye makila ya bampate ná bantaba ekokaki kosala yango te, boye Jehovah abombamaki na nsima ya ezipelo. Sikawa, kuna na nsima ya ezipelo oyo, esika Abombamaki, kokota kuna, moto azalaki kokufa na mbala moko, komeka kokota Kuna.

¹¹¹ Kasi kobanda na Pantekote, kobanda na kobakama na Ekulusu, ntango ezipelo yango epasukaki longwa na likoló kino na nse, mpo na ekeke wana. . . Yesu azalaki Nzambe oyo azipami. mpe ntango Akufaki na Kalvari, Nzambe atindaki móto mpe mikalikali, mpe apasolaki ezipelo yango longwa na likoló

kino na nse, mpe ebóngá ya mawa mobimba emonanaki polele. Kasi bango bakufaki mpenza miso, bakokaki komona Yango te. Ndenge Mose alobaki awa, ata bongo, to... Polo alobaki, ezalaki bango kotángá Mose: “Ntango batángaka Mose, kino lelo, ezipelo yango ezali naino likoló na mitema na bango.” Oh, ndeko mobali, ndeko mwasi, yango nde Bayuda basalaki ntango ezipelo epasukaki mpe Nzambe amonanaki polele, likoló na ekulusu. Amonanaki polele, kasi bango bakokaki komona Yango te.

112 Ekoki mpe kosalema ete bato na Mabota basili kosala ndenge moko? E Nzambe! Nzokande bazali na bileko ya lingomba, Mwana na Nzambe; kasi lokola ezipelo ya ba-denomination oyo mpe nyonso wana, ezipelo ya mimesano oyo tozali na yango kobanda na Pantekote, wana mimesano ya lingomba esilá kopasuka, makambo oyo bato bazalaki koloba: “Ntango ya bikamwa esilá koleka, ná makambo wana,” Nzambe asili kolongola ezipelo likoló na Yango, mpe kotalisa Yango mpenza polele, kasi babelemi mpo na kobaka Yango lisusu na ekulusu, kaka ndenge moko.

113 Nzambe oyo azipolami mpe atalisami, basengelaki komona ndenge Atelemaki wana. Kasi Azalaki mpenza lokola bato nyonso, Azalaki moto lokola bato nyonso. Bakokaki komona Yango te. Bomoni, moto moko azalaki wana. “Ee,” balobaki, “mobali oyo, Atángá na eteyelo nini?” Kasi, bomikanisela, ntango likonga wana ekotaki na nzoto na Ye, Molimo etikaki Ye, tempelo... bamesa ya kobomela mbeka ekweyaki, nkake ebetaki tempelo lokola fímbo mpe epasolaki ezipelo. Ezalaki nini? Nzambe na bango azalaki wana, abakami na Kalvari, kasi bakufaki mpenza miso, bakufaki mpenza miso mpo na komona yango.

114 Yango etalisaki Ye mpenza polele, kasi bazali kaka komona Yango te! Babomami miso. Nzambe azipami kati na moto!

115 Bomikanisela, na nsima Ayaki epai ya Polo nsima na yango, mpe epai ya Petelo na kati ya Boloko, lokola Likonzi na Móto. Bozali koyeba lisusu yango?

116 Kasi na mikolo ya nsuka Asengeli kozonga lisusu, kasi Likonzi na Móto moko esengeli koya lisusu mpo na komonisa polele Mwana na moto, bomoni, mpo na kotalisa Liloba, Pole. Mimesano oyo ezalaki, ekosila nye. Eloko moko te ekopekisa Yango; ekosalema, ata ndenge nini. Nzambe akobuka ba-denomination mpe mimesano yango.

Akosala yango na Molimo ya lolenge nini? Ndenge Asalaki mbala ya liboso. Bótala makambo oyo Asalaki na mikolo ya Eliya, na mikolo ya Yoane. “Bókanisa koloba kati na bino te ete bino ‘bozali na Abraham lokola tata,’ mpo Nzambe azali na makoki ya kotelemisa longwa na mabanga oyo bana mpo na Abraham.” Bomoni? Bókanisa te ete: “Lokola nazali moto ya oyo

mpe nazali moto ya *oyo kuna*.” Bomoni? Nzambe azali kopasola ezipelo, bomoni, mpo na kotalisa Nani Ye azali. Bomoni, bótala ezipelo, ntango ezali kopasuka awa sikawa, tozali komoni yango sikawa.

¹¹⁷ Bongo, na ntango moko, soki moto alekaki na ezipelo yango, ezalaki liwa ya mbalakaka. Sikawa, kozanga koleka na Yango ezali liwa! Amen. Soki okoki kobuka ezipelo wana ya mimesano te, kodusola etutu oyo ya denomination, mpo na komona Nzambe na nguya na Ye, ezali liwa. Kala, kokota ezaláká liwa, sikoyo ezali liwa kotikala libanda. Ebóngá mobimba ya Mawa ezali komonana polele, moto nyonso akoki komona Yango, ezipelo epasuki. Nkembo na Nzambe! Ebóngá mobimba ya Mawa emonani polele.

¹¹⁸ Ndenge nini Nzambe akokaki koyokela basumuki ya mabe lokola biso mawa, na ntango Azalaki komibomba Ye moko, yango ezalaki libombami. Mpe sikawa Ezali komonana polele, to komonana na mobimba, emonisami na nzela na Liloba na Ye. Ezalaka ntango nyonso Liloba, mbala na mbala, elingi koloba Nzambe. Liloba nde efungolaka yango. Soki bato yango báyebaka Liloba na Nzambe mokolo wana ntango Yesu akufaki, balingaki komona Ebóngá ya Mawa, balingaki komona Nani Ye azalaki.

¹¹⁹ “Ezalaki Nani kasi? Mpo na nini ezipelo epasukaki?” Bómikanisela, kokota Kuna ezalaki liwa. Moto moko te akokaki komona Yango. Mose amonaki Yango na lolenge moko, Ezalaki ekumb... ezalaki mo—mokongo ya Moto. Ee, Yango oyo, mokongo moko ezali kotanga makila, Moto yango moko! Ezalaki nini? Nzambe alingaki kolakisa bango Ebóngá ya Mawa. Nzambe alingaki kolakisa bango Nani Ye azalaki. Bongo, ezipelo yango kati na tempelo, na loboko ya Nzambe, longwa na likoló, epasukaki longwa likoló kino na nsé, mpe etalisaki Nzambe polele. Yesu Klisto likoló na ekulusu, Ebóngá ya Mawa. Mpe ezalaki nini? Bato bakufaki mpenza miso mpo na komona Yango.

¹²⁰ Sikawa, esalemi lisusu, mimesano na bango! Na bongo, ndenge, na Mokolo ya Pantekote, Liloba eyaki mpe ezalaki na lolenge ya “Mwana na Nzambe.” Mpe babandaki kokómisa yango ebongiseli na Nicée, na Roma. Mpe, eloko ya liboso, bakómaki ba-Methodiste, ba-Batiste, ba-Presbiterien, ba-Pantekotiste, mpe bongo na bongo. Esili kokóma mimesano oyo ebongisami na lolenge ete moto ayebi lisusu esika azali te.

Kasi, nkembo na Nzambe, Alakaki oyo Akosala na ntango ya nsuka. Akotalisa Liloba na Ye polele, kofungola lisusu liboso na biso, bomoni, kofungola Yango.

¹²¹ Soki báyebaka Liloba, balingaki koyeba Nani Yesu azalaki. Soki moto áyebaka kaka Liloba na Nzambe, alingaki koyeba ngonga oyo tozali kobika kati na yango mpe makambo oyo ezali kosalema. Bazali kaka koboya koyoka Liloba yango. Mimesano

na bango! Eloko nini esalaki ete Bayuda wana bámona yango? Eloko nini? Emonanaki lokola bakokaki mpenza komona, mpo eloko yango epasolamaki. Epasolamaki na ntina.

¹²² Mpo na nini kolamuka oyo ezali kokoba sikawa? Ndenge nini yango ezali se kofuluka? Ndenge nini yango ezali se kopambolama? Ata ezali na bamekoli boni, to nini, yango. . . Ntango Mose abimaki, bato ya ndenge na ndenge babimaki elongo ná ye. Kasi esalemaki mpo na nini? Jehovah Ye moko nde azali kolongola ezipelo likoló na Nzambe, mpo na kotalisa bokeseni kati na solo mpe lokuta. Kati na ba-Methodiste, ba-Batiste, ba-Presbiterien, to banani, banani bazali na solo? Liloba na Nzambe ezali solo! “Tika ete liloba ya moto nyonso ézala lokuta, mpe oyo ya Ngai ézala Solo.” Nzambe azali na ntina ya molimboli te. Asalaka ndimbola na Ye moko. Amonisaka Yango polele, mpe. . . epesaka ndimbola. Nzambe komizipoláká Ye moko. Oh, la la! Katikati na biso mpenza, tozali komona loboko na Ye monene kolobela makambo yango, kosala makambo yango.

¹²³ Nazali na eloko moko mpo na yango na mpokwa ya lelo, bomoni, ndenge ya kolandela loboko ya Nzambe, oyo Yango esalaka, ndenge Emifungolaka. Bomoni?

¹²⁴ Mpe bato balobaka: “Oh, Ezali boléma. Ezali bilandá-landa. Ezali na ntina moko te. Ezali boléma. Ezali Bezezebula. Ezali molimo mabe. Ezali kisoloka. Ezali *oyo*.” Bomoni, likambo yango moko balobaki na ntina na Ye.

¹²⁵ E lingomba, soki bande oyo ebimi, bokoki komona te, batei ya Nsango-malamu, esika nini bozali kobika? Bokoki komona te ngonga nini oyo tokómi? Nzambe azali komitalisa, kotia pembeni. . . Bótala, Azuaki ezipelo ya tempelo wana mpe Apasolaki yango, mpo bámona Nzambe polele, kasi bakufaki mpenza miso mpe bamonaki Yango te. Mpe Asili kosala likambo yango moko lelo, kotalisáká Liloba na Ye polele liboso na bato, makambo oyo Ye Alakaki. Bilaka nyonso na Liloba, etandisami liboso na biso, polele!

¹²⁶ Boyebi oyo lingomba ya Mabota ezali kosala? Kaka ndenge lingomba ya Bayuda esalaki, bakufi mpenza miso mpo na komona Yango. Esili. Ekozipa mitema na bango ndenge esalemaki na eleko wana.

¹²⁷ Bótala, kufa, soki otikali mosika na Yango lelo. Osengeli kokota kati na Yango na nzela na ezipelo oyo, soki te, okokota te. Nzambe ayokelaki bango mawa, kasi bómikanisela eloko nini yango ezalaki, ete Nzambe azali komonisa polele eloko oyo ezalaki nsima na ezipelo wana. Bótala oyo ezalaki nsima na ezipelo, Liloba! Ezalaki kozipa nini? Liloba! Ezalaki nini? Ezalaki na kati ya sanduku. Ezalaki Liloba nde oyo ezipelo ebombaki. Bomoni? Yesu nde azalaki Liloba yango, mpe Ye ezali Liloba yango, kasi ezipelo ya mosuni na Ye ezipaki Yango.

¹²⁸ Mpe lelo, ezipelo ya mimesano ezobómba lisusu Liloba, bazali koloba: “Ezali bongo te.” Kasi Ezali bongo! Nzambe azali kotatola Yango, koyula oyo Ye moko azali, kongenga lokola moi, liboso na bato nyonso, kasi bazangi komona Yango. E Nzambe, yokela biso mawa.

¹²⁹ Na elilingi, Mose autaki Liboso na Nzambe, ná Liloba na Nzambe mpo na eleko wana. Sikawa bótala, tozali sikawa na Esode 19. Bózanga oyo te sikawa. Esode 19, Mose azali koya, longwa na Liboso na Nzambe, to 20 mpe 21, 19:20 mpe 21. Mose azali koya longwa na Liboso na Nzambe. Azalaki na kati ya Liloba. Liloba esilaki kokomama. Mpe ye, Liboso na Nzambe, ná Liloba, azalaki na Liloba mpo na eleko wana. Liloba moko ezali mpo na eleko moko na moko. Mpe wana eyaki Mose, elongi na ye ezalaki kongenga mpenza! Bomoni? Liloba ezalaki kati na ye, ebelemaki mpo na komonisama polele, kopesama epai na bato.

¹³⁰ Liloba ya solo, Nzambe asilaki kokoma Yango, mpe Ezalaki elongo ná Mose. Bótala, Ezalaki elongo na Mose mpe ebelemaki mpo na komonisama polele. Akómaki Liloba mpo na bango, akómaki Liloba na bomoi, ebombami. Amizipaki ye moko, Mose asengelaki kotia ezipelo likoló na elongi na ye moko. Mpo na nini? Akómaki Liloba yango. Amen. Liboso Liloba yango éyebana, Mose asengelaki komizipa ye moko. Amen!

Bomoni Yango? Bisika nyonso Liloba ezalaka, Ezipamaka.

¹³¹ Mose azalaki na Liloba. Sikawa bómikanisela, nsima na Liloba komonisama polele, Mose azongaki Mose. Bomoni? Kasi na ntango oyo Liloba yango ezalaki kati na ye, mpo na kopesama, azalaki Nzambe; ee, azalaki lisusu Mose te. Azalaki na Liloba na Nzambe mpo na eleko wana. Eloko moko te ekokaki kosimba ye, kino yango ésila; azalaki na Liloba yango elongo ná ye. Boye, yango wana, ntango ayaki, bato bazalaki kobalola bilongi; bakokaki kososola te. Bautaki kobongwana. Akómaki moto mosusu. Ayaki ná Liloba yango. “Mpe azalaki kotia ezipelo,” ndenge Biblia elobi, “na elongi na ye,” mpo azalaki na Liloba. Mpe akómaki Liloba mpo na bango.

¹³² Sikawa bótala, soki Mose. . . E ndeko, oyo ekozala kotúka. Kasi soki Mose. . . Ndenge Polo alobaki awa na Bakolinti ya Mibale, mokapo ya 3. Soki Mose asengelaki kozipa elongi na ye, ná Nkembo ya lolenge wana likoló na ye. . . bomoni, mpamba te wana ezalaki nkembo ya mokili, wana ezalaki mobeko ya mokili. Mpe soki Mose, koyeba ete mobeko yango esengelaki kokufa, kasi Nkembo yango ezalaki monene mingi na lolenge ete ebomaki bato miso, bongo, basengelaki kotia ezipelo na elongi na ye, koleka boni Oyo ekoleka monene? Bakúfi miso ya molimo! Iyo. Nkembo wana esengelaki koleka, kasi Nkembo oyo ekoleka te. Bomoni? Mose azalaki na mibeko ya nzoto, kokweisama, ngolu te, eloko moko te; ezalaki kaka kokweisa bino. Kasi Oyo

tozali kolobela. . . Oyo wana ezalaki na bolimbisi te, ezalaki kaka koyebisa yo oyo yo ozalaki. Oyo epesi yo nzela ya kobimela.

¹³³ Mpe ntango Liloba yango ezipolami, oh! la la, Ekozala elongi ya ndenge nini? Ekosengela kozipama. Esengeli kozipama. Sikawa bótala. Boye, Molimo ezipami kati na tempelo ya moto, bomoni, mpo Ye asengeli koloba maloba ya mokili na nzela na ezipelo ya mokili.

¹³⁴ Sikawa, Polo moto azali koloba awa sikawa, na e—eyokeli oyo, Liloba-Molimo: “Tozali batei, ya mokanda te, ya mobeko te; kasi topesameli makoki ya kozala batei ya Molimo,” elingi koloba Molimo ezuaka mokanda mpe emonisaka Yango polele.

¹³⁵ Oyo wana ezalaki bobele mobeko, bato basengelaki kokende kotala yango, elobi: “Okosala ekobo te. Okoyiba te. Okokosa te. Okosala *boye, boye*, na *boye* te.” Bomoni? Bosengelaki kotala yango.

¹³⁶ Kasi oyo nde Molimo oyo eyei likoló na Liloba oyo elakamaki mpo na eleko *oyo*, mpe eboti mpe emonisi polele, bitánda mibale ya mabanga te, kasi Bozali ya Nzambe na bomoi. Likanisi ya masapo te, oyo moto moko amisaleli, to Houdini moko *boye*, na mayele mabe; kasi elaka mpenza ya Nzambe, oyo emonisami mpe etalisami polele liboso na biso. Ekozala nsima na ezipelo ya ndenge nini? Mpe ko—kobungisa yango. . .

¹³⁷ Bomoni, wana ezalaki monene mingi na lolenge ete ata bato balobaki, balobaki, ntango bamonaki Jehovah kokita kati na Likonzi na Móto yango, mpe kobanda koningisa mabelé, ná—ná makambo oyo Asalaki, ná ngomba kopela móto. Mpe ata soki moto nyonso oyo amekaki kopusana pene na ngomba yango akufaki. Ezalaki monene mingi na lolenge ete ata Mose ye moko abangaki koningana yango. Bongo, soki na ntango wana Aningisaki kaka ngomba, na mbala oyo Akoningisa likoló mpe mabelé.

¹³⁸ Bongo ekozala boni mpo na Nkembo Oyo? Soki oyo wana ezipamaki na ezipelo ya mokili, oyo ezali mpenza. . . ezipami na ezipelo ya molimo. Boye, bóluka kotala oyo ya mokili te; bókota na Molimo mpo bóyeba esika nini bozali, bóyeba ntango nini tozali kobika na yango.

¹³⁹ Ezali kopesa ntina mpo na bino? Bomoni, Yango Ezali nde Ezipelo ya molimo likoló na bato, balobaka: “Nazali Metodiste. Nazali moto malamú lokola bato nyonso. Nazali Batiste. Mpe nazali Pantekotiste.” Bozali kososola te ete eloko yango ezali ezipelo ya mimesano? Ezali kopekisa bino komóna Nzambe. Yango nde makambo oyo ezali kopekisa bino kosepela na nyonso. . .

Oh, bokoloba: “Nagángaka mpe napumbwaka.”

¹⁴⁰ Alobaki: “Liloba mobimba!” Eva andimaki Liloba nyonso, longola kaka moko. Bomoni? Ezali Liloba mobimba ya Nzambe, elaka ya eleko oyo emonisami polele. Bomoni?

¹⁴¹ Bótala sikawa, wana tozali kokoba. Nazali na mingi ya kolobela awa, kasi nazali na nkasa pene na ntuku mibale, kasi yango . . . ya—ya nkomá, kasi na—nakolobela yango nyonso te. Bomoni, nakosala noki.

¹⁴² Azipami na ezipelo ya mokili, liboso ya koloba Liloba epai na bato. Sikawa, Nzambe asengeli komizipa, ndenge Alakaki, kati na nzoto ya moto. Nzambe! Bozali kososola Yango? Nzambe asengeli komizipa kati na mosuni na moto, mpe kotia ezipelo ya molimo likoló na bango, (koloba: “Ee, nazali *oyo* mpe nazali *oyo kuna*”), mpo na koloba epai na bato. Soki ezipelo yango, oyo ezali ezipelo ya mimesano, epasuki, nde . . . bango balobaka: “Ee, ntango ya bikamwa esilá koleka.”

¹⁴³ Mobali moko alobaki na ngai mokolo mosusu, mwa motei moko—moko ya Batiste, kuna, ayaki epai na ngai, Ndeko Green, alobaki: “Ndeko Branham, likambo bobele moko oyo natelemelaka yo, yango oyo.” Alobaki: “Ozali koluka kosala ete bato . . .” Esalemaki na Ramada Inn, ntango toyanganaki kuna. Alobaki: “Ozali koluka kosala ete bato bándimela eleko ya bantóma, kobika lelo lokola bazalaki na eleko ya bantóma.” Alobaki: “Eleko ya bantóma esilaki elongo ná bantóma.”

Nalobaki: “Ya solo?”

“Iyo.”

Nalobaki: “Nani azalaki molobeli na eleko ya bantóma?”

Alobaki: “Bantóma zomi na mibale na eteni-ya-ndako ya likoló.”

¹⁴⁴ Nalobaki: “Na bongo, Polo azalaki te.” Nalobaki: “Molobeli ezalaki Petelo. Mpe Petelo alobaki, na Mokolo ya Pantekote, ntango bamonaki makambo nyonso oyo ezalaki kosalema, mpe misala ya Molimo Mosanto, alobaki: ‘Elaka yango ezali mpo na bino, mpo na bana na bino, mpe mpo na baoyo bazali mosika, kutu na baoyo nyonso Nkolo Nzambe na biso akobenga.’ Soki Azali naino kobenga, boye Likambo yango moko ezali awa. Eleko ya bantóma esilaki ntango nini, kasi? Eleko ya bantóma ekosila ntango Nzambe akosilisa kobenga.” Atikálá koloba lisusu liloba moko te kasi akamataki ekoti na ye mpe akendeki.

¹⁴⁵ Esengaka Liloba, mpo na kosala yango. Ezali nde Liloba. Yesu alobaki na Satana: “Ekomami.” Bomoni? Yango mpenza: “Ekomami.”

¹⁴⁶ Nalobaki: “Petelo alobaki ete ekosuka ata moke te. Baoyo nyonso Nkolo akobenga, Lipamboli oyo ezalaki mpo na bango. Sikawa bokoloba: ‘Asukisaki.’ Ntango nini?”

“Na likanisi ya mabe te?”

Nalobaki: “Te, misie, ata moke te. Kende liboso.” Ah-ha. Yango mpenza. Bomoni?

¹⁴⁷ Petelo alobaki ete ezali mpo na moto nyonso oyo Nzambe akobenga, akozua Lipamboli yango moko ya bantóma. Yango nde—yango nde Liloba ya Nkolo. Bomoni?

¹⁴⁸ Sikawa, ezipelo ya mokili. Nzambe, Liloba, azipami na mosuni na moto. Ezalaki nini? Nzambe azipamaki kati na Mose. Nzambe azalaki kati na Mose, azipamaki, mpe Bozali ya Nzambe ezalaki kati na ye. Abongaki be mpenza ná Liloba yango kati na ye, ndenge wana, na lolenge ete asengelaki kozipa elongi na ye. Azalaki mosakoli oyo atitolami, oyo azipolaki Liloba mpe alobaki na bango: “Okosala boye te! Okosala nde boye! Mpe okosala boye te!” Bomoni?

¹⁴⁹ Mpo Ápesa Liloba na ye na ekeke wana, Amizipaki Ye moko kati na moto moko, soki te, Liloba elingaki mpe koboma ata miso ya baoyo babengamaki mpo na kobima. Bomoni? Ata baoyo bazalaki kuna, bakokaki koyika mpiko te mpo na komona yango. Na—na Esode, tomoni yango, balobaki: “Tika ete Mose áloba, Nzambe te.” Bomoni ntina nini Likonzi na Móto emonanaka mingi-mingi te? Bomoni?

¹⁵⁰ Nzambe alobaki: “Na—Na—Nakosala yango. Nakotelemisela bango Mosakoli moko.” Amen! “Nakotelemisela bango moko.” Mpe Ayaki mpenza. “Nakotelemisa, mpe Akozala na, Akozala Liloba.”

¹⁵¹ Alobaki: “Soki balingi komona oyo Liloba ezali...” Alobaki: “Sikawa, Mose, Namonanaki na yo kuna, na nzete ékopela-móto.” Alobaki: “Nakokita kopelisa móto na ngomba wana.” Alobaki: “Bakoyeba ete oyebaki solo. Nakomonana awa na—na—na lolenge ya móto yango moko. Nakomonana awa mpo na kotalisa bato, Nakotatola lotomo na yo.” Yango nde Ayebisaki Mose awa, maloba nyonso wana.

¹⁵² Bótala, Alobaki: “Sikawa Nako—Nakopesa yo nkembo liboso na bato.” Alobaki: “Sikawa, olobaki na bango ete Nakutanaki na yo kuna, na nzete epelaka móto; sikawa Nakokita, Móto yango moko, mpe Nakosala ete bato báyeba ete okosaki te mpo na likambo Yango.” Okoki kotalisa Yango polele ata na nzela na science, soki olingi. Bomoni? “Nakokita mpo báyeba yango.”

¹⁵³ Mpe ntango Abandaki konguluma, ntango Jehovah abandaki konguluma lokola nkake, bato balobaki: “Te! Te! Te! Tika ete Jehovah áloba te; toko—tokokufa.”

¹⁵⁴ Bomoni, Asengelaki kozipama, boye Nzambe Amizipaki kati na Mose, mpe Apesaki Mose Liloba. Mpe Mose akitaki mpe asakolaki Liloba na Nkolo, ná ezipelo na elongi na ye. Boye te? Jehovah azipamaki na lolenge ya mosakoli, mpo elingaki mpenza, na ntembe te. . . Mpe Nzambe alobaki ete Akoloba na bango lisusu ndenge wana te. Akoloba na bango bobele na

nzela na mosakoli. Yango nde nzela kaka moko oyo Akotikaláká koloba, kobanda wana. Yango nde nzela kaka moko oyo Atikálá koloba. Ezali solo. Na nzela mosusu te. Akósaka te.

¹⁵⁵ Bótala malamumu, kaka Mose moto azalaki na Liloba. Sikawa, ezalaki na e—etóngá te oyo ekitaki, ezalaki kaka na Bafalisayi to Basadukayi te, to, ezalaki li—lisanga to etúká moko boye te. Ezalaki nde Mose! Azalaka na moto moko. Akoki kozala na makanisi mibale to misato oyo ekeseni te. Azuaka moto moko. Mose azalaki na Liloba, bobele Mose. Ata Yoshua azalaki na Yango te. Moto mosusu te azalaki na Yango. Amen! Yoshua azalaki gé—général; Yoshua azalaki mokambi ya mampinga; Yoshua azalaki mondimi, Moklisto. Kasi Mose azalaki mosakoli! Liloba ekoki koya epai ya Yoshua te; Esengeli koya epai ya Mose. Ye azalaki mosakoli ya monene ya ntango. Bótala malamumu, Liloba etikálá koya epai ya Yoshua te, kino Mose akendeki. Te, misie. Nzambe asalaka na moto moko kaka na mbala moko. Nzambe azali moko. Bomoni? Boye, bobele Mose nde azalaki na Liloba, etóngá ya bato te.

¹⁵⁶ Bótala, Nzambe akebisaki bato nyonso ete bámeke kolanda Mose te, na kati ya ezipelo wana; bamekoli. Bomoni? Mwasi, mobali, nganzambe, ézala nani, mosanto boniboni, mobali boniboni, lokumu boniboni, boniboni bango bazalaki; Akebisaki bango: “Mose áya ye moko! Mpe soki moto, ata nyama, amamí yango, asengelaki kokufa na mbala moko.” Kokota liboso na ezipelo wana ata moke te. Ezipelo yango ezali mpo na moto moko. Nsango yango ezali moko. Bomoni? Na tempelo, bobele moto moko azalaki kokota kuna, mbala moko na mobu moko, azalaki kopakolama mpe kobongisama mpo na kokota; mpo na kobima ná Liloba te, kasi mpo na kopesa mbeka ya makila. Ata mpo na kokota kuna, liboso na Yango, kaka moto moko. Moto mosusu azalaki kokufa. Bomoni?

¹⁵⁷ Sikawa bazali kokufa na molimo. Oyo ezali ezipelo ya molimo. Bomoni? Oyo wana ezalaki ezipelo ya mokili. Oyo ezali ezipelo ya molimo. Bomoni? Bazali kaka kokoba kokota kuna na nsima, ata oyebisi bango. “Oh, nayebi! Nayebi yango, kasi ngai. . .”

Nalobaki: “Bókoba, ezali malamumu, ezali bobele koloba. . .” Booyebi lisusu, bolozu ya nsuka na Ezipito ezalaki liwa, liboso na esode. Bolozu ya nsuka na mokili ezali liwa ya molimo, liboso na esode. Nsima na yango, bakozikisama mpe bakozonga mputulú, mpe bayengebeni bakonyata mputulú na bango. Kasi likambo ya nsuka ezali liwa ya molimo, kobwaka Liloba.

¹⁵⁸ Sikawa bótala, Nzambe akebisaki bato nyonso ete bámeke kolanda Mose na kati ya ezipelo ya Móto te. Mose asengelaki kozipama, asengelaki kobima kuna. Mose akotaki kuna lokola Mose, akotaki na kati ya Likonzi na Móto yango; mpe ntango azalaki kobima, azalaki kozipama. Mpamba te, akotaki na kati

Kuna, libanda na mimesano na ye, mimesano ya bampaka. Asiláká *komona* Likonzi na Móto, kasi sikawa akoti na *kati* na Likonzi na Móto. Bomoni? Amen! Mpe abimi, azipami. Liloba na Nzambe kati na moto, ezipami! Tala ye oyoazali koya, oh! la la! nakoki komona yango. Akebisaki moto mosusu ámeke te, moto moko te akoki komekola Yango. Komeka na yo te. Bomoni? Ata nganganzambe to moto mosanto, ézala nani, cardinal, epískópo, to nini mosusu, soki ameki kokota na kati ya ezipelo yango, azalaki kokufa. Nzambe akebisaki bango. Tokomekola yango ata moke te.

¹⁵⁹ Liloba na Ye emonismaka na moto moko kaka. Ezalaka ntango nyonso bongo, mosakoli azalaki koya ná Liloba ya Nkolo, na eleko moko na moko, na ntango nyonso, na Makomi mobimba. Liloba eyaka epai ya moto moko kaka. Na bileko nyonso, ndenge moko, ata na bileko ya lingomba, kobanda na oyo ya liboso mpenza, kino na oyo ya nsuka. Bamosusu bazalaka na bisika na bango, ya solo, bótala, kasi bótikala mosika na Likonzi na Móto wana. Bomoni? Toyekoli likambo moko ya monene awa! Bomoni, moto nyonso alingi kozala Mose, mpe moto nyonso . . .

¹⁶⁰ Boyebi lisusu likambo Datana ná bamosusu balobaki kuna? Balobaki: “Tala, Mose, zela naino mwa moke! Ozali komema mokumba mobimba yo moko, omoni. Sikawa, mibali mosusu mpe bazali awa, oyo Nzambe abengi.”

¹⁶¹ Ezali ya solo. Bango, moko na moko, bazalaki kolanda malam, na ntango nyonso oyo bazalaki kolanda, kasi ntango moto moko amekaki komata mpo na kozua esika ya Nzambe oyo Ye apesaki Mose, oyo abongisamaká liboso mpe abulisamaki mpo na mosala yango, ntango amekaki kozua yango, móto ekitaki, mabelé efungwamaki mpe emelaki bango na mbala moko. Bomoni? Bomoni? Bókeba. Bomoni? Zalá kaka Moklisto malam, mosanto ya Nzambe, oyo andimaka Liloba. Bomoni? Zalá mosika na Likonzi wana. Oyo liteya monene mpenza!

¹⁶² Nzambe amonanáká liboso epai ya Mose, na nzete épelakamóto, Nzambe azipamaki na Likonzi na Móto. Sikawa bókoka na bokebi mpenza, mwa moke. Nzambe ayaki liboso epai ya Mose, Azipamaki. Nzambe azalaki kati na Likonzi na Móto, Abombami nsima na nzete moko, bomoni; lokola nsima na bamposo, bomoni, kuna, pembeni na ebóngá ya mawa, na etumbelo. Bomoni? Azipamaki. Azipamaka ntango nyonso. Mpe ntango Ayaki epai ya Mose, Azalaki kati na Likonzi na Móto, Azipamaki kati na Likonzi na Móto. Kasi awa, liboso na bato, Nzambe atalolaki ye na nzela na Likonzi na Móto yango moko. Bomoni? Mose alobaki . . .

¹⁶³ Sikawa bótala malam. Bozali kososola? Bozali kotika makanisi na bino mosika? Bokoki? Bokoki . . . “Ye oyo azali na matoi, áyoka.” Bomoni?

164 Ntango Nzambe amonanaki na Mose, ezalaki kati na Likonzi na Móto, ntango Abengaki ye na mosala na ye. Mpe Mose ayaki koyebisa bato likambo yango. Bakokaki kondima yango te, atako asalaki bikamwa mpe nyonso wana. Kasi, na mbala oyo, Ye amonanaki polele, na ndenge ya science, mpe atatulaki mosala ya Mose, ete ezalaki Nzambe moko oyo asololáká na ye, mpamba te Amonanaki na lolenge ya Likonzi na Móto mpe Apelisaki móto na ngomba. Eyaki epai ya Mose na nzete epelaka móto, kosolola na ye. Malamu.

165 Komonana ya liboso ya Nzambe, epai na Mose, kati na nzete ékopela-móto, ezipelo. Liboso na bato, Nzambe azipamaki lisusu mpe atatulaki Mose, na nzela na ezipelo, na komizipáká Ye moko ná Móto yango moko, Likonzi na Móto yango moko ekitaki. Banda—banda wana. . . Banda na bango, mpo báyoka bobele Liloba na Nzambe. Bososoli yango? Bobele Liloba, bayokaki Mongongo na Ye. Mpamba te, Mose azalaki, mpo na bango, Liloba na bomoi. Mose! Bomoni, Nzambe asiláká kotatola mpenza Liloba yango na nzela na Mose! Bomoni, Mose alobáki. . . Nzambe alobáki na Mose: “Kende kuna. Nakozala elongo ná yo. Azali. . . Eloko moko te ekotelema liboso na yo. NAZALI OYO NAZALI.”

166 Mose ayaki kuna mpe alobaki: “Ntango mosusu bokondima yango te, kasi Nzambe amonanaki na ngai kati na Likonzi na Móto mpe Ayebisaki ngai makambo oyo.”

167 “Oh, tozali na makambo ndenge na ndenge, ya boye, oyo ezali kosalema.” Falo alobaki: “Tala!” Mokengeli Falo alobaki: “Ee, kisolóka na yo ezali ya pete. Tala, ngai nazali na bato ya solóka awa, oyo bakoki kobongola nyoka na. . . lingenda—lingenda na nyoka. Boya awa, bato na solóka.” Bayaki wana mpe basalaki likambo yango moko.

168 Mose ayebaki. Eloko ata moko te etungisaki ye. Motángo ya bamekoli na bango, esalaki ata eloko moko te. Mose afandaki kaka kimia. Na mbala moko, banyoka yango etambolaki mwa moke, mpe, na mbala moko, nyoka ya Mose emelaki baoyo mosusu. Bomoni? Mpo na nini? Lokola bantóma, bakokaki kolimbola Yango te. Mose ayebaki te ndenge nini Nzambe akosala yango, kasi Akosala yango.

169 Bomikanisela, Alobaki ete Yambèle ná Yane bakoya lisusu na mikolo ya nsuka, bomoni, bamekoli. “Mpe bakopengwisa Baponami mpenza, soki ekokaki kosalema,” Matai 24:24. Bomoni? Makambo ya ndenge moko mpenza, bakosala bikamwa ya ndenge moko mpe nyonso wana. Bótala malamau Liloba wana! Bótala malamau Liloba wana! Moto alobi ete asali ekamwiseli, kasi azali kokoba kondima ete ba-Nzambe bazali misato, mpe makambo nyonso wana; bókende mosika na bato ya ndenge wana. Toyebi ete ezali—ezali lokuta, bomoni, ezalaka te. Bomoni? Liloba, Liloba nyonso, Liloba nyonso oyo ebimaka na monoko

na Nzambe! Na Genèse, Liloba moko kaka! Awa, elobami: “Kolongola to kobakisa liloba moko te.” Bomoni, Esengeli kozala Liloba moko wana. Bomoni?

¹⁷⁰ Bótala, bato bamonaki ete likambo moko eutaki kosalema. Mose autaki kozipama, lokola...Azalaki mosakoli, mpe Nzambe autaki kotatola Liloba na Ye, mpe akendeki kuna. Mpe amonaki bilembo mpe bikamwa. Na nsima, malamumu, bato yango bakabwanaki kati na bango, lingomba. Bomoni, *lingomba* elingi koloba “babengami libanda.” Bomoni? Nsima na bango kobengama libanda na mokili mpe kokóma libota, bomoni, na nsima Nzambe asalaki ete Ye moko áyebama, ete Ye nde azalaki Likonzi na Móto wana. Atatolaki nsango ya Mose. Bomoni? Azalaki Likonzi na Móto. Bakokaki kokanga Yango fotó, nabanzi, soki bazalaki na ba-appareil ya fotó, mpo nyonso epelaki Móto. Kasi ba—batatolaki ete, Nzambe atatolaki ete Nsango yango ezalaki solo. Nsango ebelemaki, makambo nyonso ebelemaki, balingaki sikawa kobanda esode. Azipaki mosakoli na Ye mpo na bato ya esode oyo.

¹⁷¹ Bókanisa naino, bato bamonaki ete likambo moko eutaki kokómela ye. Akesanaki sikawa na libota mobimba ya Yisraele. Akómaki ndenge mosusu, nsango na ye ekómaki ndenge mosusu, akesanaki na banganzambe, akesanaki na nyonso. Bomoni, akómaki moto ya ndenge mosusu. Bato bamonaki ete likambo moko eutaki kosalema. Nzambe Amizipaki kati na mosakoli na Ye, mpo na kolobela bango Maloba na Ye. Yango nde Autaki kosala. Mose akómaki Liloba ya bomoi wana mpo na bato, ezipamaki na Likonzi na Móto, kotalisáká oyo esengelaki kozipama nsima, na nsima ya bamposo ya gambala. Bomoni?

¹⁷² Liloba esengelaki liboso kouta na Mose. Bomoni? Mose moto azalaki na Liloba. Ekomamaki na Nzambe, moto moko te akokaki kolimbola Yango, Mose moto asengelaki liboso kolimbola Yango. Yango wana azipaki elongi na ye, mpo a... Bozali komona Yango? Bomoni?

Yango *Oyo*. Tokokaki kozua Yango, komema Yango, mpe nyonso mosusu, kuna, kasi Esengeli komonisama. Mpo na komonisa, Mose asengelaki kokóma Nzambe mpo na bato.

Bokoloba: “Ezali boléma.”

¹⁷³ Tala, Ayebisaki, Ye moko ayebisaki kutu Mose ete: “Yo okozala Nzambe, mpe Arona akozala mosakoli na yo!...?...” Bomoni? Na bongo, Ayaki kuna, bomoni, Asengelaki komizipa, mpo Nzambe azalaka ntango nyonso nsima na ezipelo. Oh! la la! Bozali komona Yango? Nzambe abombami na bato.

¹⁷⁴ Alobaki: “Tata, Natondi Yo, Obombi Yango na bato ya bwanya mpe ya mayele, mpe Omonisi Yango na bana mike, baoyo balingi koyekola.” Bomoni?

¹⁷⁵ Nzambe abombamaki nsima na ezipelo. Mose azipaki elongi na ye. Mose azalaki Liloba na bomoi oyo ezipamaki na

eleko wana. Bato bamonaki Likonzi na Móto yango, balobaki: “Sikawa tondimisami.” Bomoni? “Mose nde áloba.” Bomoni? “Nzambe áloba te, likama ete tókufa.” Mose akotaki na mbala moko na Likonzi na Móto yango. Bomoni?

¹⁷⁶ Bongo alobaki sikawa, Alobaki: “Sikawa Na—Nakoloba na bango lisusu boye te. Nakopesa bango mosakoli.” Bomoni? Mpe Asalaka ntango nyonso ndenge wana. Bomoni? Alobaki: “Sikawa, tika ete bákende kuna.” Kasi mosakoli yango asengeli kozala na Liloba oyo. Soki azipami na mimesano, Nzambe atikalá kotinda ye te. Soki azipami na Liloba, Nzambe akotatola Yango. Nzambe alimbolaka Liloba na Ye moko. Mose alobaki Yango; Nzambe alimbolaki Yango. Amen.

¹⁷⁷ Mose alobaki: “Nkolo alobi bongo!” Mpe Nkolo akokisaki oyo Alobaki. Yango ekomisaki Yango solo.

¹⁷⁸ Sikawa Alobaki: “Sikawa, Mose, osósoli. Bato basósoli sikawa. Omoni, Nasili kotalisa yo, Nasili kotatola yo.” Nzambe amizipaki Ye moko kati na mosakoli yango, mpo na koloba Liloba na Ye epai ya bato. Mose akómaki Nzambe na bomoi mpo na bango, Liloba na bomoi ya Nzambe emonisami polele. Yango wana elongi na ye ezipami. Bomoni?

¹⁷⁹ Mpe boyebi ete ezali ndenge moko mpo na Moklisto ya solosolo, ete azipami lelo, mpo na bazangi kondima? Bamonaka basi wana ná suki milai mpe nyonso wana, balobaka ete ezali. . . “Bótala basi ya lolenge ya kala wana.” Mpo na basi oyo bakangkaka nwaní, balobaka: “Ozali na piné ya kotoboka, piné ya reserve na motó.” Bomoni, Ezipámi na mobimba. Bazali bakúfi miso. “Oh,” balobaka, “ngai nazali na Diplome ya Philosophie, ya D. . .” Etali ngai oyo ozali na yango, oyebi naino Liloba te. Ya solo mpenza. “Oh, oyo wana, wana ezali eloko ya motuya te. Ngai. . .” Yekola liboso makambo ya mike.

¹⁸⁰ Bongo mpo na bato oyo balobaka ete bazipámi Liboso na Nzambe, kasi bateyaka mimesano ya lingomba? Oh, mawa mingi mpenza! Bazali kobakisa mpe kolongola, mpe nyonso wana, na kokotisáká makambo na bango moko ná makanisi na bango moko, kasi Liloba na Nzambe te, bomoni, ezali ezipelo ya ndenge nini? Bazali na ezipelo ya mangomba. Nzambe asíli kopasola ezipelo yango na mobimba!

¹⁸¹ Balobaki: “Basakoli bazalaka te. Na mikolo ya nsuka, bantóma ná basakoli bazalaka lisusu te. Lobiko na nzoto kouta na Nzambe ezalaka lisusu te. Bamóni bazalaka lisusu te. Malako 16 ekokisamaka lisusu te. Eleko ya bantóma esilá na yango.” Bazipaki Yango mosika na bato. Kasi Nzambe ayei, ná Molimo Mosanto na Ye ya Móto, mpe apasolaki yango kobanda na likoló kino na ns- . . . [Maloba oyo ezangi na bande—N.D.E.] Nzambe asili kopasola ezipeli.

¹⁸² Mose azalaki ezipelo, Liloba na bomoi ya Nzambe, ezipamaki nsima na mosuni na moto. Likonzi na Móto ezalaki

kati na Mose, na ntembe te, kotalisáká eloko oyo esengelaki kozipama na nsima, nsima ya bamposo, bomoni.

¹⁸³ Sikawa, yango, Liloba, Liloba, Liloba epesamaki, na nsima Ekomamaki, na nsima Etiamaki na nsima mpe Ezipami kino lelo, mpo Nzambe azalaki ntango nyonso kati na Liloba yango. Amen! Azalaka ntango nyonso Liloba. Azalaki kati na Liloba yango. Yango wana Liloba yango esengelaki kozipama.

¹⁸⁴ Oh, ndeko mobali, ndeko mwasi, bozali kososola Yango? Bótala! Bozali komona te? Ezipamaki kati na bileko oyo, kokokana na oyo Nzambe alobáká, mpe Ekofungwama na mikolo ya nsuka, Bilembo Nsambo yango ekofungwama, mpe mobimba na Yango ekomonana polele na miso ya bato, makambo oyo esalemaki na ntango nyonso oyo. Na ngonga ya Nsango ya mwanje na nsambo, mabombami nyonso ya Nzambe ekomonisama na nzela na Eliya yango, na ngonga oyo ya nsuka; ndenge Klisto atiami libanda na lingomba na Ye, Mwana na Nzambe; ndenge Amonisami lisusu lokola Mwana na moto; ndenge Lingomba esengeli kotiana na molongo, ná nyonso mpo na ntango ya nsuka, endimeli moko te, denomination moko te, bobele mpenza Liloba kobikáká kati na moto. “Nakozua moko, mpe Nakotika mosusu. Nakozua oyo, mpe Nakotika oyo wana.” Bomoni? Ezali bobele. . . Ezali na bikanganelo te, badenomination te, boombo to eloko mosusu te; motema nde ekangami ná Nzambe, mpe bobele na Ye. Bomoni?

¹⁸⁵ Bótala malamumu, ezipami kati na mosuni na moto. Mose ná Liloba yango, ezalaki kotalisa oyo esengelaki kotiana na nsima, nsima na mposo ya gambala. Mpo ete. . . Ndenge moko mpe Klisto azali Mose na biso. Klisto azali Mose na biso. Azalaki Nzambe azipami na mosuni na moto, azipami na bomoto, na mosuni. Ya solo. Mpe Azali ndenge moko lobi, lelo mpe libela. Azipamaki na bamposo ya gambala. Azipamaki. Na mbala oyo Azipamaki kati na Moto. Bomoni? Sikawa bótala malamumu, “ndenge moko lobi, lelo mpe libela,” Liloba oyo Alakaki mpo na eleko oyo. Azali Klisto kino lelo, Liloba lilakami mpo na eleko oyo, ezipami kati na mosuni na moto. Liloba ezali Nzambe.

¹⁸⁶ Epakolami ezali moto. Liloba oyo *Klisto* elingi koloba “oyo apakolami,” bomoni, “mopakolami.” Na bongo, Mose azalaki Klisto na mikolo na ye, azalaki mopakolami. Yilimia azalaki Klisto na mikolo na ye, ná eteni ya Liloba mpo na eleko wana.

¹⁸⁷ Kasi ntango Klisto ayaki, Ayaki lokola Mosikoli Mopakolami; mpe wana ezalaki na mbala moko Mose ná nyonso oyo ezalaki kati na Mose, mpe Liloba mobimba, ná Bonzambe mobimba kati na nzoto ezalaki kati na Ye. Yango wana ezipelo mobimba ya tempelo epasukaki, mpe ebonga ya mawa emonanaki polele mpenza, Azalaki Mopakolami.

¹⁸⁸ Bótala sikawa, ezipelo na mosuni na moto, Liloba lilakamaki mpo na eleko oyo esengeli mpe kozipama. Bótala malamumu.

Bandimi ya mangomba oyo balingaka masumu ná basumuki bakoki komona Yango te, mpo na ezipelo ya moto.

¹⁸⁹ Yango wana bakokaki komona Ye te. “Ee, Azali moto. Aúti wapi? Azali na kálati ya lingomba nini? Azali moto ya lingomba nini?” Nalingi kolobela yango na mpokwa: “Azali moto ya lingomba nini?” Bomoni? Na bongo, bomoni, sikawa: “Azali moto ya lingomba nini, ya—ya etóna nini? Atángaki kelasi nini? Epai wapi Atangaki kelasi na Ye? Ee, Moto oyo abótamaki, kokokana na mimesano, to kokokana na—na lisolo oyo babetaka na tina na Ye awa, Moto oyo abótamaki libanda na ekanganelo mosanto ya libala. Ee, Ye, na ntembe te, Azali ya zabolo. Bomoni, Azali—Azali ya zabolo. Abótamaki libanda na ekanganelo mosanto ya libala, mpe Yosefe abalaki mama na ye mpo báboma ye na mabanga te, mpo azalaki mwasi ya ekobo. Bongo Moto yango nde ayei mpo na koloba na biso, banganzambe, oyo tosengeli kosala?”

¹⁹⁰ Mpe Nzambe azalaki wana, komonisáká Liloba yango, kogángáká: “Nzambe na Ngai, mpo na nini Otiki Ngai?” Banzembo mpenza oyo bazalaki koyemba na tempelo, oyo Dawidi akomáká mpo na bango elekaki mibu mingi, ezalaki kolobela Klisto. “Mikuwa na Ngai nyonso mizali kotala Ngai. Batoboli maboko na Ngai mpe makolo na Ngai.” Mpe kuna, bazalaki wana, bazalaki koyemba yango, mpe Moto yango mpenza azalaki kobunda na liwa na ekulusu. Mpe ntango basilisaki mpe . . .

¹⁹¹ Ntango Akufaki, Nzambe ya Lola akitaki, ndenge Asaláká na Ngomba Sinai, ná Móto ya Bule, mpe azikisaki ezipelo ya tempelo yango kobanda na likoló kino na nsé, apasolaki yango. Bongo bakokaki kosala nini? Kotala kuna, na lininisa ya tempelo, na Kalvari, mpe Nzambe azalaki wana, polele liboso na bato, Mbeka.

¹⁹² Kasi bazomona Yango kaka te, kino lelo. Nzambe, na ntango oyo ya nsuka, apasoli mimesano yango nyonso, mpe Atalisi Liloba ya eleko oyo polele mpenza liboso na bato, kasi bazali kaka koyeba Yango te. Bayebi Yango te. Ezali—ezali mpenza petee. Bomoni, ezali mpenza petee mingi. Ezali mpenza mosika na makambo ya mokili.

¹⁹³ Mokolo mosusu wana nateyaki na liyangani moko, likoló na “Kozala libóma.” Moko na mikolo oyo nalingi kolobela yango, “Kozala libóma.” Bisó nyonso tozalaka liboma mpo na moto moko, boye—boye ngai nakozala yango mpo na Klisto. Polo alobaki ete “babengaki ye moto ya libóma.” Na ntembe te, osengeli kozala bongo. Bomoni, vis esengeli kozala mpo na kokangisa biloko makasi. Bomoni? Ya solo.

¹⁹⁴ Boye, bótala malamú ezipelo yango, mosuni na moto. Te, sikawa, bato-balingaka masumu bakokaki komona yango te. Basambeli oyo bakangámá na mimesano, bakokaki komona

yango te, mpo Azalaki moto. Mpo na nini? Mosuni na moto yango ezalaki kobomba Nzambe.

¹⁹⁵ Sikawa, soki Azalaki Likonzi na Móto monene oyo ekitaki, bomoni, soki Likonzi na Móto monene ekitaki mpe etalisaki bango oyo Ye azalaki, ete Azalaki Likonzi na Móto monene yango, bakokaki kondima yango; soki Jehovah azalaki zingazinga na yango.

Kasi bomoni oyo Asalaki, mpo Ákoka koleka pembeni na bato ya mayele wana, bato ya bwanya, Amimonisaki Ye moko kaka ndenge Alakaki na Mose, bomoni: “Nakoloba na bango na nzela ya Mosakoli.” Mpe Azalaki Mwana na moto, Mosakoli. Mpe bamosusu kati na bango basosolaki Yango, pene na moto moko na mokáma likoló na mokáma na mokili mobimba, bandimaki Yango; bamosusu bandimaki te. Kasi Azalaki yango, ata bongo.

¹⁹⁶ Kasi Nzambe na Nguya azalaki wana, polele liboso na bato nyonso, Ebóngá ya Mawa! Akufaki ntango bana na Ye moko bazalaki koloba. . . Bana na Ye moko bazalaki wana, bazalaki koloba: “Toboi Ye! Bolongola Ye!” Babwakelaki Ye nsói.

¹⁹⁷ Elílingí, kala mpenza, ntango Dawidi azalaki kobima na tempelo, mokonzi oyo aboyami. Azalaki kotambola na balabala, mpe mwa ebósono moko, oyo azalaki konguluma na nse, azaláká kolinga ye te, abengaki ye “mobange mokosi” to eloko ya ndenge wana, abwakelaki ye mpenza nsói na elongi. Mpe mobateli ya mokonzi abimisaki mopánga, alobaki: “Nátika motó ya mbwa wana na nzoto na ye; wana abwakeli mokonzi na ngai nsói?”

¹⁹⁸ Dawidi alobaki: “Tika ye, Nzambe moto atindi ye.” Ntango mosusu Dawidi ayebaki mpenza ete eloko oyo alobaki. Amataki likoló na ngomba, abwakaki miso na nsima ákoleláká.

¹⁹⁹ Mibu nkama mwambe nsima na yango, Mwana na Dawidi azalaki komata ngomba yango moko, kotaláká na mosika, koleláká likoló na Yelusaleme, Mokonzi oyo aboyami. Mpe babwakelaki Ye nsói na elongi.

²⁰⁰ Bozomona te? Ezali ndenge moko. Bozomona ndenge Liloba yango ezali koya, kokóba kino lelo? Eboyamaka ntango nyonso na bato mingi, bomoni, mpe Endimamaka na bato moke.

²⁰¹ Sikawa, bomoni, bakokaki kondima Yango te. Ba-Greki wana, bakokaki komona Ye te, Azalaki kati na tempelo na Ye ya moto. “Ee,” balobaki, “moto oyo, nkombo na ye Yesu; Auti na Nazarete.”

²⁰² Sikawa, na mikolo wana, bato bazalaki kaka na nkombo moko. Ndakisa, “Yoane, Jim,” bazalaki koloba, “Yoane ya Jeffersonville, Jim ya New Albany,” to eloko moko ya ndenge wana, bomoni.

²⁰³ Alobaki: “Oyo nde Yesu ya Nazaleté. Bato nyonso balobaka ete mama na Ye akúbaki zemi ya sodá moko.” Bomoni? Na bongo, wana mpenza nde oyo bazalaki kokanisa. Ya solo! Mpe

tóloba, sikawa, balobaki: “Oyo nde Yesu ya Nazarete.” Bomoni? “Azali Nani?” Bomoni, bazalaki kososola Yango te.

²⁰⁴ Kasi, ee, Liloba oyo mpo na eleko wana, ntango Azalaki koteya, Alobaki: “Bólukaluka na Makomi. Na Yango nde bokanisaka ete bozali na Bomoi na Seko, mpe Yango nde etatolaka Nani Ngai nazali. Soki bokoki kondimela Ngai te; bóbosana Ngai, lokola ezipelo, bóndimela Liloba oyo ezali kobima. Mibale ezali litatoli,” Alobaki, “Ngai nalobi mpe Tata alobi mpo na Ngai.” Amen. Ezali solo.

²⁰⁵ Ngai nalobelaka Liloba ya eleko oyo, mpe Tata atitolaka Yango. Sikawa, yango ezali litatoli mpo na bino? Ezali bongo, bomoni. Lolenge wana nde esengeli kokokisama.

²⁰⁶ Bótala na Bakolinti ya Mibale sikawa, mo . . . na Bakolinti ya Mibale, mokapo ya 3, molongo ya 6, na tempelo ya kala, Nzambe azalaki kofanda nsima na bamposo ya kala, mosika na Bayuda. Ntango ezipelo ya kala epasukaki, ata bongo, Bayuda . . . babomamaki miso na Nani Ye azalaki, mpe na Nani Ye azali naino lelo. Na bongo, Pantekote emonisaki Nani Nzambe ya solo mpe ya bomoi azalaki, ntango Nzambe akataki ezipelo wana na biteni mibale, kobanda na likoló. Mpo na nini esalemaki bongo na ezipelo yango? Mpo na nini esalemaki bongo?

²⁰⁷ Mpo na nini Nsango ya boye eyei lelo, mpo na kosala oyo Yango esali? Eyaki mpo na nini? Mpo na nini?

²⁰⁸ Moto moko alingaki kobenga ngai, mokolo moko awa, kala mingi te, alingaki kowelana ná ngai na ntina na—na eleko ya lingomba, ete “Nzambe azalaki kati na lingomba na Ye mosanto,” ná makambo ya ndenge wana. Mpe nayaki komona ete ezalaki mwasi motei moko, mpe natikaki likambo yango. Bomoni, soki ezalaki mobali, elingaki kozala malam mpenza, elingaki kozala ndenge mosusu. Kasi, na bongo, kasi ntina nini kokende mosika kuna, na ekólo mosusu, na ntango oyo nasengeli kotika liyangani moko awa, mpo na kosala bongo, bomoni? Boye, natikaki bango bongo. Soki mokufi miso azokamba bakufi miso, bango—bango nyonso bakokweya na libulu.

²⁰⁹ Boye, boye, sikawa, na eleko oyo, ezipelo ya kala, ya denomination mpe mimesano, esili kopasuka, longwa na Liloba na Nzambe, ezali mpo Ékoka komonisama polele! Bomoni likambo nini nalingi koloba? Mimesano elobaka: “Makambo nyonso wana esilá koleka.” Bótika Yango ékota mwa moke. “Makambo yango esilá koleka.” Kasi, na eleko oyo ya nsuka, ezipelo ya mimesano yango esili kopasuka, mpe Likonzi na Mító yango oyo awa. Bomoni? Tala Ye oyo, azotalisáká Liloba mpo na mokolo oyo. Ezipelo esili kopasuka.

Sikawa, mokili, bazali kaka kondima Yango te. Ata ndenge nini, bazomona Yango te. Bazomona Yango te. Etindamaki mpo na bango te.

210 Bómikanisela, Mwana na Nzambe amonisamaki na Sodoma te; batindami mibale nde bamonisamaki. Ezali solo.

211 Kasi, oyo, Nzambe Ye moko, kati na mosuni na moto, amonisamaki epai ya Abraham, Moponami. Mpe bótala malamú oyo Asalaki mpo na komimonisa Ye moko. Sikawa, Abraham ayebaki, ntango Asósolisaki oyo ezalaki na makanisi ya Sara, nsima na Ye, alobaki, abengaki Ye “Elohim! Mosali na Yo. . .”

212 Bótala sikawa, boye mpo ékoka komonisama polele. Liloba ezalaki na ezipelo likoló na Yango mibu nyonso oyo, mpo na bato: “Ekoki kosalema te.”

213 Bozali komikanisela liteya oyo nateyaká na ntongo ya mokolo oyo nalongwaká awa, mbala ya liboso, na ntina na Goliate ná Dawidi? Nalobaki: “Botala motie ntembe yango kuna, azalaki koloba ete ‘ntango ya bikamwa esilá koleka.’”

Bótala ba-bande yango, ndenge elandanaki, bótala moko moko, ndenge ezali kokóma polele-polele koleka moko nsima na mosusu; soki ozali na matoi ya koyoka, bomoni, miso ya komona.

Nini? Nalobaki: “Tala lisanga monene ya bakambi ya mangomba ezali kuna, na eleko ya science oyo, bazoloba ete ekoki kosalema te.” Kasi ngai nalobaki: “Nzambe. . .” Kati na Pole yango, liboso bátikala kokanga Yango fotó, ata mbala moko; batikálá kokanga Yango fotó te, na ntango wana. Esalemaki kuna na ebale; batikálá kokanga Yango fotó te. Bomoni? Nalobaki: “Ayebisaki ngai ete ekosalema; Akobenga mpe ekotambola na bikólo nyonso.”

214 Ata Molakisi Davis alobaki: “Yo moto otángá bobele na eteyelo ya liboso, osúka na kelasi ya nsambo, okobondela mpo na bakonzi ná bankúmú, mpe okobandisa kolamuka moko oyo ekokende na bikólo nyonso?”

Nalobaki: “Yango nde oyo Ye alobaki.”

215 Mpe esili kosalema. Bomoni? Bomoni, esili kosalema. Yango nde likambo, ezali ete, Azali na bosenga ya ndimbola moko te. Asili kokokisa yango. Bomoni, Asili kokokisa yango, emilimbolelaka yango moko, bomoni, kobengáká Baponami na Ye, bomoni, uta—uta na bisika ndenge na ndenge. Sikawa esili komonisama polele.

216 Nalobaki ete Dawidi azalaki wana, mwa mwana moke ya nzoto mike, ná mokongo egúmbámá, na bilingóngo na loboko na ye. Mpe, ee, Saulo, mokonzi ya lisanga ya batei, atalaki ye mpe alobaki: “Ee, yo, osali ata ngalasisi moko te!” Alobaki: “Tika nátála soki nakoki kopesa yo Diplome ya Philosophie to eloko moko bongo.” Alatisaki ye bibundeli yango, yango. . . Amonaki ete elongobanaki te na moto na Nzambe.

217 Alobaki: “Bólongola ngai eloko yango.” Alobaki: “Nayebi makambo yango ata moke te.” Alobaki: “Bótika ngai nákende na ndenge oyo ngai nayebi, na oyo nabundisaki na nkosi na yango,

oyo nabundisaki ngombolo ná yango.” Azalaki lokola moto ya zamba. Alobaki: “Botika ngai nákende boye.”

218 Mpe mobange Goliata oyo alobaki: “Botindi nde mbwa mpo ábunda na ngai?” Alobaki: “Nakotobola yo na nsonge ya likonga na ngai mpe nakotómbola ebembe na yo na likoló mpo bandeke bália yango.”

219 Dawidi alobaki: “Oyei kokutana na ngai lokola Mofilistia, ná ebundeli mpe likonga, ngai nakokutana na yo na Nkombo na Nkolo Nzambe ya Yisraele.” Bótala mosakoli, Dawidi, alobaki: “Lelo nakokata motó na yo likoló na mapeka na yo.” Amen! Oh! la la! Ayebaki oyo ye azalaki na yango, Nani oyo ye andimelaki, mpe andimisamaki na motema mobimba ete Ye azalaki na makoki ya kobatela oyo etiami na maboko na Ye. Bomoni? Boye, ata bongo, ekokisamaki.

220 Elobamaka ete: “Mikolo ya bikamwa esíli koleka,” bitutú esílí kobukana! Jehovah azali naino komonana polele mpenza, kotalisáká Liloba na Ye, Ye oyo azipolami. Ezali solo. Bótala.

221 Lingomba ya Mabota mpe esili kobomama miso na ezipelo yango, nsima na yango kopasuka mpe kotalisa Nzambe polele, ezipelo ya mangomba. Ndenge nini? Na kozipáká Liloba lisusu na kati na moto. Yango mpenza nde eloko oyo Yisraele ezungaki komonaki. Soki ézalaka Mwanje to eloko moko bongo, Yisraele elingaki kondima Yango. Kasi lokola ekokaki kozala Mwanje te, esengelaki kozala moto. Amen!

Nzambe akoki kobuka Liloba na Ye te. Na mikolo ya nsuka, esengeli lisusu kozala likambo yango moko. Bomoni? Eloko nini ebomaki miso ya Yisraele? Moto wana. “Ozali Moto, ozomikómisáká Yo moko Nzambe.” Yango nde ntina oyo babomaki Ye, mpe, lelo, mpo Nzango eyei na nzela na moto, kasi na nzela na Banje te. Bomoni? Nzambe akoki kobongola lolenge na Ye te, kobongola Liloba na Ye te. Alobaki Abongwanaka te. Bomoni? Bótala, elakamaki! Mpe lelo oyo bato ya Mabota babomami miso ndenge Yisraele ebomamaki miso, mpo na (nini?) ezipelo. Nzambe azipami na kati na moto, ebomaki miso ya Yisraele.

Bótala, ebomaka ntango nyonso miso ya moto moko. Moko, Ekoboma ye miso; mosusu, Ekomonisa ye Solo. Ekokanga miso ya bamoko, mpe Ekofungola miso ya bamosusu.

222 Bótala, Yesu atelemaki mpe alobaki: “Ee, nkombo na yo ezali—ezali—ezali Simona, mpe nkombo ya tata na yo ezalaki Yona.”

Alobaki: “Nkolo Nzambe!” Bomoni? Filipino . . .

Alobaki: “Ndenge nini Oyebaki ngai?”

Alobaki: “Tala Moyisraele, oyo bokosi ezali kati na ye te!”

Mpe alobaki: “Rábi, ntango nini Oyebaki ngai?”

223 Alobaki: “Liboso Filipino ábenga yo, ntango ozalaki na nsé ya nzete, Namonaki yo.”

224 Alobaki: “Rábi, Ozali Mwana na Nzambe. Ozali Mokonzi ya Yisraele.”

225 Ee, bato mosusu bazalaki wana, balobaki: “Azali Bezezebula.” Bomoni? Nini Yango esalaki? Efungolaki miso ya moko, Ebomaki miso ya mosusu. Ba-nganganzambe balobaki nini? “Tala, Moto yango azali Bezezebula!”

226 Elenge mwasi wana alobaki: “Nayebi ete Masiya akoya, Ye oyo abengami Mopakolami. Omoni, Mopakolami akoya. Tozalaki na basakoli te. . . Osengeli kozala mosakoli. Kasi Mopakolami akoya. Tozali kozela Ye. Oyo ezali ntango ya nsuka mpo na Mabota. . . to mpo na Bayuda.” Alobaki: “Oyo ezali ntango ya nsuka.” Bomoni, Basamalia ná Bayuda bazalaki kozela Masiya. Bomoni? Alobaki: “Oyo ezali ntango oyo Asengeli komonana. Toyebi ete ntango Akoya, Akosala makambo oyo. Akoyebisa biso makambo oyo.”

Yesu alobaki: “Ngai nazali Ye.”

Miso na ye efungwamaki, banganganzambe babomamaki miso.

227 Yango nde eloko oyo Nsango-malamu esalaka ntango nyonso. Efungolaka miso ya bamoko, emonisaka Bosolo na bamoko, na ntango oyo Ebomaka miso na bamosusu; ezalaka na ndimbola mibale. Bamoko bakoki kozua Mwana yango, kotala Yango na miso mpenza, mpe kokufa miso; bamosusu bakoki kozua Yango mpe kobima elongo ná Yango, yango nde bokeseni.

228 Ndenge esalemaki na bileko nyonso, Bonzambe ezipamaki kati na mosuni na moto. Bótala malamumu, Asalaki bongo. Basakoli bazalaki Bonzambe oyo ezipami. Bazalaki Liloba na Nzambe (boye te?) oyo ezipami na kati na mosuni na moto. Boye, bakebaki mpe na Mose na biso te, bomoni, Yesu.

229 Bótala, oyo ezipamaki nsima ya bamposo ya gambala na tempelo ya kala, ezalaki Liloba, ezalaki Liloba emonisami polele na bitando ya mabanga.

230 Sikawa, nakomeka kosilisa na miníti pene na ntuku mibale sikawa, soki nakokoka, mpo tósilisa na ngonga ya zomi na moko na ndambo. Bótala, soki botali malamumu, nalekisi mwa nkasa awa, bomoni, mpo na koboya ko. . . mpo nákata te. . . mpo náyeisa yango molai koleka te. Nayebi ete bozali koyoka molunge mpe bolembi.

231 Na nsima ya tempelo ya kala, na kati ya ezipelo, eloko nini ezalaki kuna na nsima? Jehovah azalaki nini? Eloko nini ebombamaki kuna na nsima? Ezipelo ezalaki kobomba eloko nini? Oh, aleluya! Ezipelo ezalaki kobomba nini? Ezalaki kobomba Liloba. Ezipelo, bamposo ya gambala ya kala, ebombamaki, ezalaki kobomba Liloba na miso na bango, ya

mosuni. Mapa ya kolakisa mpe ezalaki kuna na nsima. Nkembo ya Shekinah mpe ezalaki kuna na nsima. Kasi nyonso Wana ebombamaki na miso na bango. Nyonso Wana ebombamaki. Nkembo nyonso ya Nzambe ezalaki mpenza na nsima ya mposo ya gambala ya kala wana, ezali solo, nyonso wana ebombamaki na miso ya mosuni.

²³² Ezali mpe bongo lelo. Ebengamaka “etonga ya batúntuki, bilandálanda,” kasi bayebi te eloko nini ebombami kuna na nsima. Yango nde eloko oyo bayebi te. Bomoni?

²³³ Na bongo ntango Nzambe, na mawa, apasolaki ezipelo mpo bango bámona, bazalaki ya kokangama mingi mpenza na mimesano na bango. . . ezalaki naino ya kobombama mpo na bango, atá kino lelo oyo.

²³⁴ Ndenge moko sikawa! Nkembo, Nguya ya Molimo Mosanto, Nkembo ya Shekinah, oyo ekitaka likoló na mondimi, nalingi koloba mondimi ya solosolo sikawa, oyo ebotaka misala ya Nzambe mpe ekotisaka kondima kati na ye, mpo na kondima Liloba na Nzambe, nyonso wana ebombami na miso na bango. Balobaka: “Makambo wana esílá koleka.” Bomoni, bazali naino kobika nsima na ezipelo.

Bozali lisusu nsima na ezipelo wana te, Bana mike, Nzambe asili komitalisa polele mpenza liboso na bino.

²³⁵ Mokolo mosusu, Ndeko Fred Sothmann, Ndeko Tom Simpson. . . nayebe te soki atikali kokóma awa to te. Tozalaki ebele kuna na losambo moko ya ba-Batiste, mpe motei alobaki likambo moko ya malamú mpenza. Biso nyonso tolobaki: “Amen!” Bato nyonso na losambo basembolaki kíngo mpe batalaki na nsima. Bomoni? Bomoni? Tozuaki eteni moko ya lipa oyo eutaki nsima na Shekinah, kuna, boyebi, mpe tosepelaki mpenza ndenge toliaki yango. Tolobaki, na elobeli mosusu: “Matondi, Nkolo!” Bomoni? Mpe, nsima na yango, bato yango bazipamaki mpenza miso na lolenge ete basekaki likambo yango. Bayebaki te oyo nyonso likambo Yango ezalaki. Bomoni? Bazali naino ya kozipama. Boye, bamoko bazali na kati mpe bamosusu libanda. Na bongo. . . Kasi Nzambe azali kotalisama polele mpenza liboso na biso, abombami. Ndenge moko sikawa!

²³⁶ Bongo, ntango Nzambe, na mawa na Ye, apasolaki ezipelo, Atalisamaki polele mpenza. Kasi, bakangamaki mpenza na mimesano na bango, na lolenge ete Azalaki kaka ya kobombama mpo na bango.

Ndenge moko sikawa! Nkembo nyonso wana, oyo ebómbámi, ebómbámi mpo na biso kati na Klisto, Liloba, Oyo azali Tempelo na biso.

²³⁷ Oh, sikawa, nakosengela kotimola likambo yango mwa moke. Bolimbisa ngai, ndenge nazali komemama na ntongo oyo, kasi, oh, na—nazalaki na mposa ya koteya yango banda kala, ngai. . . ezali mpenza kotoka kati na ngai. Bomoni?

238 Bótala, Nkembo nyonso oyo ezali kati na Nzambe ezali kati na Liloba. Mapamboli nyonso oyo ezali kati na Nzambe ezali kati na Liloba. Ebombami, epai na mozangi-kondima, na nzela na mimesano. Bomoni nini nalingi koloba? Kasi Ezali nyonso kati na Klisto. Nyonso oyo Nzambe azalaki, *Amisopaki*, “kenos,” mpe ekotaki kati na Klisto; mpe biso, kati na Klisto, tozali nsima na ezipelo.

239 “Ee, nazali kati na Klisto,” olobaka. Na nsima ondimaka ete ba-Nzambe bazali misato? Obatisaka na nkombo ya “Tata, Mwana mpe Molimo Mosanto”? Ondimaka mimesano nyonso wana, mpe makambo ya bampaka nyonso oyo ondimaka? Te, ozali naino nsima na ezipelo. Omoni? Kota kati na ezipelo. Ye, Klisto, azali Liloba.

240 “Ndenge nini? Nandimaka lobiko na nzoto kouta na Nzambe te. Nandimaka bikamwa mpe makambo ya ndenge wana te.”

241 Ee, omoni, ozali—ozali na kati, na kati ya ezipelo te. Oyebi eloko moko te na ntina na Yango. Omoni? Klisto azali Liloba! Mpe ntango tozali kati na Liloba, tozali kati na Klisto. Bongo ndenge nini nakoki kozala kati na Klisto, kowanganáká Klisto? Ezalaki Ye moto alobaki: “Liloba ata moko te ekobakisama to ekolongolama.” Ndenge nini okokí kolongola to kobakisa, kasi? Bomoni, ezali kolakisa yo ezipelo nini ezali kobómba yo. Bomoni?

242 Bisó kati na Ye! Na bongo biso, lokola tozali kati na Ye, tozali kaka ya kozipama liboso ya basambeli mpe balakisi minene ya mokili. Bomoni, Nkembo na biso, oyo tozali na yango mpe kosepela na yango, tozali kaka ya kozipama epai na bato ya libanda. Bakanisaka ete biso tozali lisusu “libómá, bolémá.” Bomoni? Bomoni? Ya solo. Kasi biso baoyo tozali awa na kati, kati na Klisto, tobatisámi kati na Ye (Bakolinti ya Liboso 12), kati na Ye, tozali kosangana ná Nkembo yango. Bomoni? Kasi na libanda te; bozali naino kobwaka miso na kati, koboyáká Yango. Bomoni?

243 Boye, sikawa tobengami kokota kati na Ye, kosangana na nyonso oyo Ye azali. Tobengami kokota kati na Ye, oyo ebombami mpo na bazangi kondima, na nzela na ezipelo ya mosuni na moto. Bomoni? Bayebi Nkembo yango, batángaka na ntina na Yango, Ezali awa na kati ya Liloba, “Nkembo na Nzambe” ná makambo ya ndenge wana, ezali kaka maloba, mpo na bango. Mpo na biso, ezali komonisama polele! Bomoni? Ezali lisusu maloba te; ezali likambo ya solosoló! Amen!

244 Nzambe alobaki: “Pole ézala,” wana ezalaki liloba. Kasi sikawa pole ezali. Ezali lisusu liloba te; ekómi pole. Bomoni eloko nini nalingi koloba?

245 Sikawa ezali kaka Liloba likomami te, mpo na biso, ezali likambo solo. Tozali kati na Ye. Sikawa tokómi kosepela. Sikawa tozali kotala Ye. Sikawa tozomona Ye, Liloba, komitalisáká

polele Ye moko. Ebombami, kuna libanda, mpamba te (mpo na nini?) Ezipami kati na mosuni na moto. Bomoni?

²⁴⁶ Oh, balobaka: “Etonga ya bato wana, bakendá kelasi wapi? Ba—bayekola kelasi nini? Esika nini, babimeli wa—wapi? Ba—ba—bazali bato ya etonga nini?” Bomoni? Ah! Bomoni, bazososola Yango te.

²⁴⁷ Moto moko alobaki na moto mosusu, mokolo mosusu wana, alobaki: “Osengeli kozala moto ya denomination moko mpo na kozala Moklisto.”

²⁴⁸ Alobaki: “Nazali Moklisto; nazali mondimi ya moko na yango te.” Ah. Alobaki: “Nzambe alongolaki ngai cancer yango,” alobaki, “sikawa okanisi nini mpo na yango?” Ezalaki monganga moko. Alobaki: “Lakisa ngai ba-denomination oyo basalaka yango.” Bomoni? Malamu. Bomoni? Ezali naino ya kozipama.

²⁴⁹ Tozali na kati ya Klisto. Sikawa, lokola na eleko wana, bandimi ya solo nyonso bazali komona Ye, Liloba ya elaka mpo na eleko oyo, ezali komonisama polele. Ezali likambo monene, soki bokoki kososola yango. Bomoni? Bomoni? Bandimi nyonso ya solo, oyo bazali kati na Liloba, bazali komona Nzambe polele. Ezipelo esili kopasuka, mpe Nzambe azali komonana polele liboso na bino, komonisama polele. Bomoni? Nzambe, amonisami, polele.

²⁵⁰ Mpo na kosala yango, ezipelo ya mimesano ya kala, ya denomination na biso, esengeli kopasuka lisusu. Mpo na komona mpenza oyo Yango ezali, bosengeli kobima na kati na makambo wana. Bomoni? Bokosala yango ata moke te; bakokoba kobenda ezipelo yango liboso na bino, mbala nyonso: “Oh, Ezali na ntina moko te.” Kasi Yango oyo ekomámi, mpe Yango oyo emonisami polele, bomoni. Bomoni?

²⁵¹ Sikawa, bongo soki moto aboyi na ye komona mói, alobi: “Oh, kuna, nayebi ete Nzambe alobaki: ‘Pole ézala,’ kasi eloko ya ndenge wana ezalaka te. Nakiti na ngai na eteni ya nse ya ndako. Na—naboyi na ngai komona yango”? Moto yango azali libómá. Eloko moko ezali kotambola malamau te ná ye.

²⁵² Eloko moko ezali kotambola malamau te ná mobali to mwasi oyo akoki komona elaka ya Nzambe mpe, amoni Yango denomination ekitisi ezipelo. Bomoni, bazipami!

²⁵³ Mpo na kosala yango, bizipelo ya mimesano ya denomination na biso esengeli kobukama, na Molimo ya Móto mpe Mopánga ya Nzambe, oyo ezali Liloba na Ye. Ntango nyonso, Liloba na Ye ezali Mopánga na Ye. Bomoni? Azuaki Mopánga na Ye mokolo wana, ezalaki mpenza kopela Móto, mpe Apasolaki ezipelo wana, kobanda na likoló kino na nsé. Azali kosala ndenge moko ná Mopánga yango moko lelo! Ezali te “bindimeli na ngai, buku na ngai ya bindimeli, ka—katekísimo na ngai.” Kasi Mopánga ya Nkolo, bomoni, epasoli ezipelo kino na nsé, mpe bozomona

Nzambe polele, emonisami polele kati na Liloba na Ye. Ezali mpenza likambo ya nkembo mpo na kotala! Bomoni? Malamu. Molimo Mosanto mpe Mító ya Nzambe, Mopánga na Ye, epasoli yango. Liloba epasoli ezipelo ya denomination.

²⁵⁴ Ee, soki olobaki kaka “Liloba,” kasi Liloba yango esali te? Ntina nini kozala na Mopánga awa, mpe koloba: “Ekoki kopasola te”? Koloba: “Ah,” mpe yango ekopasola te?

²⁵⁵ Kasi soki otii Mopánga ya Nzambe wana kuna na likoló, mpe tala yango kopasola, soki e—esimbami na loboko oyo ebongisámá mpe etindámá mpo na kosala bongo. Bomoni, epasoli mpe efungoli yango, mpe tala Ye wana. Wana, etalisi mpenza Nzambe polele, Jehovah monene. Yango nde Liloba na Ye oyo emonisami polele, eteni oyo elakamaki na mokolo yango. Bososoli Yango? Bomoni? Ntango Mopánga, elaka ya lelo, makambo oyo esengeli kosalema na mokolo oyo, mpe Nzambe azui Mopánga na Ye, apasoli ezipelo ya denomination mpe afungoli yango, azali komitalisa mpe kolakisa ete azali wana, ete, azali Likonzi na Mító yango moko kino lelo. Bótala, yango nde Liloba oyo emonisami polele mpo na bilaka ya lelo.

²⁵⁶ Tozali komona Yango lokola Petelo, ntango alobaki: “Nkolo, tokokende lisusu epai na nani, nsima na komona likambo Oyo?” Tokokende wapi? Tokoki kokota na lingomba nini, na ntango oyo tosili kobotama kati na Yango? Bomoni? Eloko nini bokoki . . . Bokoki kokota na denomination nini, nsima na koyeba ba-Bosolo oyo, bomoni, ntango bango (moko na moko) bazali kowangana Yango? Moko na moko na bango! Nayebi ata moko te oyo ekoki koloba to kosala likambo moko mpo na Yango. Ya solo. Ezali ya solo.

²⁵⁷ Ntango nabandaki kosala mibembo oyo, awa, mangomba ntuku minei na mibale basungaki mpo na kosalisa mayangani na esika moko; ntango nakómaki, nazuaki ata moko te. Moko na moko na bango balobaki: “Andimaka kobatelama ya Seko.” Yango etiaki ba-légaliste pembeni. Bamoko balobaki: “Abatisaka na Nkombo na Yesu.” Yango etiaki bamosusu nyonso pembeni, bomoni. Boye, moko na bango alobaki: “Andimaka momboto na nyoka. Nyoka ezalaka na momboto te!” Yango etiaki . . .

²⁵⁸ Biblia elobi: “Nakotia koyinana kati na Momboto ya mwasi mpe momboto ya nyoka.” Bomoni? Bomoni yango?

²⁵⁹ Yango, e—ezipelo esili kolongolama likoló na Liloba. Bomoni? Ezali solo. Ezali komonisama na bana mike. Esili—esili kolongolama. Bazali komona Yango. Mpe ekosalema ndenge elobamaki ntango moko . . . Ezali solo. Bongo, ekosalema ndenge elobamaki ntango moko, ete: “Ntango bomoni,” ntango ezipelo yango ekolongolama likoló na Liloba, ntango mimesano ekolongolama likoló na Liloba, ndenge Yesu alobaki ntango moko: “Ntango bomoni Ngai, bomoni Tata.” Bomoni? Nzambe

ná Liloba na Ye bazali moko. Sikawa bososoli? Ntango Liloba emonisami polele, Ezali nini? Bomoni?

²⁶⁰ Yesu alobaki: “Bólukaluka kati na Makomi, bobanzi ete bozali na Bo-. . .Bondimelaka Nzambe, bóndimela mpe Ngai. Soki Nasali misala ya Tata na Ngai te, boye bóndimela Ngai te. Kasi soki Nasali mpenza misala yango, Ngai ná Tata na Ngai tozali Moko. Ntango bomoni Ngai, bosili komona Tata.”

²⁶¹ Mpe ntango bomoni Liloba komonisama polele, bomoni Tata Nzambe, mpamba te Liloba ezali Tata. Liloba ezali Nzambe. Mpe Liloba, oyo emnisami polele, ezali Nzambe Ye moko kozuáká Liloba na Ye moko mpe komonisáká Yango polele katikati na bandimi. Eloko moko te ekoki koyeisa Yango na bomoi, libanda na bandimi, kaka bandimi. Ezali te . . . Ekozala te . . .

²⁶² Okoki kozua blé mpe kolona yango na—na—na mabelé ya lolenge mosusu, ekokóla te. Kasi, nde, esengeli kozala na bipolí moko na kati ya mabelé yango mpo na kolóna blé. Kasi soki ezali te—soki kuna . . . soki bipolí yango kati na mabelé ezali te—ezali te, soki blé yango epesameli bomoi na bipolí yango, ekokóla te. Boye, etali te epai wapi Liloba ekwei, soki Ekwei na motema moko ya lolenge malamau te . . .

²⁶³ Yesu moto alobaki bongo. “Eteni moko ekweyaki pembeni na nzela, na mabelé ya mabanga, mpe ba-ndeke ya likoló eyaki kolia yango.” Na nsima, Alobaki: “Eteni mosusu ekweyaki kati na ba-nzube ná ba-nséndé, ba-nzube ekólaki mpe efinaki yango,” mimesano, ba-denomination, mitungisi ya mokili efinaki Yango. Kasi Alobaki: “Eteni mosusu ekendeki kino na mabelé malamau mpe ebotaki mbala mokámá,” Alobaki, “yango nde Bokonzi na Nzambe.”

Ezali ndenge moko, bomoni, bamosusu bakondima ata moke te.

²⁶⁴ Bamosusu bakondima mpo na ntango moke, lokola bayekoli. Balandaki Ye, mingi kati na bango, bayekoli ntuku nsambo balandaki Ye mibu mingi, mpo báyeba; pene na mobu moko na ndambo, to mibu mibale; bobele mpo na koyeba, kino ntango bamonaki eloko moko kati na Ye, eloko . . . ndakisa, lolenge moko oyo Azalaki na yango, nguya moko ya kosala makambo yango, to ndakisa, nkísi moko, ya moto na soloka moko boye, oyo Akokaki kosala mpo na kosala makambo yango, oyo ekokaki kopesa Ye makoki ya koyeba oyo ezalaki na mitema ya bato mpe oyo bazalaki kokanisa. Mpe sukasuka bamonaki ete Alobaki ete Ye “autaki na Likoló,” ete Ye “Ye moko azalaki Liloba.” Mpe ntango bamonaki bongo, wana elekelaki bango. Balobaki: “Moto moko te akoki kososola likambo Oyo.” Mpe batikaki Ye. Oyo wana ezali oyo ekweyaki kati na banzube.

²⁶⁵ Ezongisi biso na likambo yango moko, ete biyanganelo nyonso, ezalaka na bandimi-ya-maloba, bazangi kondima mpe bandimi. Ezalaka bongo na biyanganelo nyonso. Bokomona

bango ntango nyonso. Bamosusu basalaka lokola bazali bandimi, yango nde lolenge ya mabe koleka. Na nsima, ezalaka na baoyo bazali bazangi kondima mpenza; ye akotungisa yo te, akokende na ye mpe aningisi motó. Kasi baoyo basalaka lokola bandimí, balobaka bazali bandimi, lolenge wana nde, lolenge wana nde bosengeli kokeba na bango, ezali bandimi-ya-maloba wana. Na nsima, ezali na bandimi ya solosolo. Bomoni lolenge misato yango wana?

²⁶⁶ Bazangi kondima bazalaki wana. Kaka ntango Alobaki: “Bólia mosuni ya Mwana na moto,” oh, tala, ekokaki!

²⁶⁷ Bamosusu bazalaki bandimi-ya-maloba. Batikalaki kino, ndenge Yudasi asalaki, kino na nsuka mpenza.

²⁶⁸ Kasi, bandimi ya solosolo, bango bakokaki kolimbola Yango te, kasi bandimaki Yango, ata bongo. Bakóbaki kino nsuka.

²⁶⁹ Soki ezipelo, mimesano ya bazangi kondima, elongolami, bomoni Nzambe. Ntango ezipelo ya mimesano elongolami, bokoki komona ete Nzambe azali Nzambe ya Liloba na Ye kino lelo. Azali kokóba kobatela Liloba na Ye. Azali—Azali Nzambe, Mokóló ya Liloba na Ye.

Oyo abombami nsima na bizipelo ya mposo, mpo na bamosusu. Iyo, ezali solo. Mpo na baoyo bakoki koleka nsima na ezipelo te, Azali naino nsima na bizipelo ya mposo.

²⁷⁰ Bótala. Na bongo, biso, na bongo tokómi eteni na Ye, wana bozali ezipelo oyo ezipi Ye. Bozali eteni na Ye, na ntango nyonso oyo Klisto azali kati na bino, ndenge Klisto azalaki eteni ya Nzambe. Lokola Nzambe azalaki kati na Ye, yango esalaki Ye Nzambe. Mpe wana Klisto azali kati na yo, elikia ya Nkembo, okómi eteni ya Klisto. “Ye oyo akondimela Ngai, misala oyo Nazali kosala, akosala yango mpe lokola.” Bomoni? Okómi eteni ya Klisto, na ntango nyonso oyo Klisto abombami kati na yo. Na bongo, ezipami mpo na mozangi-kondima, kasi yo oyebi ete Azali kati na yo. Ozali tempelo ya Klisto oyo azali nsima na ezipelo, mposo. Na bongo biso, mpo n- . . . Na nsima, mpo na ezipelo oyo, lisusu ezipelo na mosuni na moto, ezali kobomba Nzambe (Liloba) na mozangi-kondima.

²⁷¹ Ndenge ekomami, bomoni: “Ekomami, bozali mikanda mikomami,” Biblia elobaki. Sikawa, *mokanda* ezali nini? Ezali “liloba likomami,” Mpe bozali oyo “ekomami.” Na elobeli mosusu, bokotángá Yango boye: “Bino,” Elobaki, “bozali mikanda mikomami,” to “bozali Liloba oyo esili kokomama, emonisami polele,” eloko moko te ekoki kobakisama na Yango. Okoki koloba te: “Nazali mokanda mokomami,” kasi ozali kobika bomoi mosusu, oyo ekeseni na *Oyo* esilá kokomama, mpo eloko moko te ekoki kobakisama to kolongolama.

²⁷² Ndenge Docteur Lee Vayle azali kokoma buku malamumu oyo, nalingi ete bómona yango, nsima na mwa ntango. Ndeko Vayle azali awa, azali awa esika moko. Namonaki ye na libanda.

Nandimi te ete akokaki kokota. Kasi azokoma buku moko kuna, mpe—mpe ezali mpenza kitoko mingi, na ntina na Eleko ya Laodikia. Mpe nalingi ete bino. . . Ekobima kala mingi te lokola buku. Boye, tozali sikawa kotánga yango mbala ya nsuka. Tozalaki kokoma, mpe tozalaki kosolola na ntina na Yango, kuna, bomoni, na ntina na. . .

²⁷³ Bato nyonso bayaka ntango nyonso epai na ngai, balobaka: “Ndeko Branham, nkake nsambo wana, mongongo oyo engulumaki lokola nkake, mpe Alobaki: ‘Kokoma Yango te, omoni, kasi kanga Yango,’” balobaka, “ekozala nkake nsambo oyo ekomonisama na mikolo ya nsuka, omoni, nkake nsambo oyo ekosala ete tóyeba?” Sikawa, ezali mpenza koyokana malamumu, boye te? Bomoni? Kasi bókeba na oyo bolobelaka ntango bolobaka bongo.

Alobaki: “Komeka kokoma Yango te.” Bomoni? Nkake nsambo oyo ezali koyokisa mingongo na yango, bomoni, mpe Alobaki: “Kokoma Yango te, omoni, kasi Esengeli kokangama na elembo, na kati ya Buku, kino na mikolo ya nsuka.”

²⁷⁴ Sikawa, moto moko alobaki, bato mingi balobaki na ngai, mpe bato na likindo balobaki: “Ndeko Branham, soki Nkolo Nzambe. . .” Balobaki: “Soki—soki. . . Ná makambo osilá kobikela, oyo Nkolo asilá kopesa yo mpo na libota na Ye,” nazali koloba yango na komikitisa, balobaki, “okoki kozala na makoki ya kokoma bi—Biblia yo moko, Liloba na yo, soki Nzambe asili komonlisa polele.”

²⁷⁵ Nalobaki: “Ekoki na yango kozala solo.” Bomoni, azalaki koluka kokanga ngai na motámbo. Bomoni? Nalobaki: “Kasi, bomoni, nakoki kosala yango te.”

Alobaki: “Mpo na nini te? Ozali na nyonso oyo esengeli.”

²⁷⁶ Nalobaki: “Kasi, tala, liloba moko te ekoki kobakisama to kolongolama.” Bomoni?

²⁷⁷ Mpe alobaki: “Ee, na bongo, nkake nsambo yango, omoni,” alobaki, “nkake nsambo oyo ekonguluma, ekozala Emoniseli moko, oyo ekopesama na moto moko, boye te?”

²⁷⁸ Nalobaki: “Te, misie, ekozala kobakisa eloko moko na Yango to kolongola Eloko Moko na Yango.”

²⁷⁹ Nyonso wana esili komonisama na kati Kuna, mpe Bilembo Nsambo nde efungolaki emoniseli na oyo Yango ezalaki. Nde oyo yango ezalaki. Bomoni, ezali ntango nyonso kati na Liloba. Bomoni, bokoki kobima libanda na Liloba yango te. Ekotika Liloba te. Mpe Molimo ya Nzambe ekotika Liloba yango ata moke te. Ekokangama na Liloba; Ekoboma miso ya bamoko, mpe Ekofungola miso ya bamosusu. Ekosala bongo ntango nyonso.

²⁸⁰ “Bozali mikanda mikomami, mitángami na bato nyonso.” To, bozali. . . Nalimboli Yango, nabaloli yango boye, bomoni, bóbalola Yango boye: “Bozali mikanda oyo esili kokomama,”

mpo bokoki kobakisa eloko moko te na Yango, “oyo etángámi na bato nyonso; Liloba na Nzambe emonisami polele,” na elobeli mosusu.

Mpe Petelo ná Yoane, mpo na kolakisa yango, ntango bakendeki kuna, bato bamonaki ete bazalaki bayinga mpe batángá te, bakótá kelasi te, kasi basósólaki ete bazaláká elongo na Yesu. Bomoni? Bazalaki bayínga mpe batángá te, kasi bazalaki mikanda mikomami, bomoni, oyo etángamaki ete bazaláká elongo ná Yesu. Mpamba te, Yesu azalaki komimonisa Ye moko polele na nzela na bango, Klisto azipamaki kati na mosuni na bango; amonisami polele, ayeisami na bomoi.

²⁸¹ Ndenge Azalaki kati na Mose. Ntango Liloba ezalaki kati na Mose, azalaki Nzambe kati na nzoto. Ntango Ezalaki kati na Yesu, Ezalaki Nzambe kati na nzoto. Bomoni? Eloko kaka moko oyo Asalaki, ezalaki kobongola ebombelo na Ye, Liloba na Ye te, ezalela na Ye te. Azali ndenge moko lobi, lelo mpe libela. Abongolaki kaka lolenge na Ye. Abongwanaki longwa na Nowa kino na Mose; Abongwanaki longwa na Mose kino na Dawidi; longwa na Dawidi, Yosefe; bongo na bongo kino ntango Ayaki na litondi ya Bonzambe kati na nzoto. Bomoni?

²⁸² Azali bobele Nzambe yango moko! Amen. Amen. Nabanzi ete ekoti. Bomoni? Ezali Nzambe yango moko, kasi Alati kaka ezipelo mosusu. Bomoni, Alati ezipelo mosusu.

²⁸³ Asalaki yango na ba-réformateur, alataki ezipelo, alataki ezipelo. Kino, sukasuka, Elekaki na eleko ya Luther, na eleko mosusu, bongo sukasuka, Emonani na Mobimba. Liboso mpenza Éya, mosakoli moko ayei lisusu. Oyo yango ezali kosala, ezali kotalisa elilingi ya Liloba oyo ekoya, kotalisáká awa, komonisáká oyo esalemaki, oyo etikalaki, ete Lingomba ekozala kozanga. . . ézanga kososola te. Na nsima, ntango oyo ekolimwa moke-moke, na bongo, ndenge Yoane alobaki: “Ngai nasengeli kokita, Ye asengeli komata,” na bongo nyonso-kati-na-nyonso ekoti kati na Ye. Amonisami polele na mobimba, na nzela na Luther, Wesley, mpe na eleko ya ba-Pantekotiste, mpe bongo na bongo, bongo na bongo, Amonisami polele na mobimba, bomoni, kolandana, bobele komonisama polele mpenza, Nzambe kozipoláká: Bótala Ye (Sikawa, bótala.) kokokisama na bilaka na Ye mpo na mokolo *oyo*, lokola *bango* bazuaki.

²⁸⁴ Sikawa Mose azalaki Liloba na mokolo wana, mpamba te Liloba epesamaki epai na ye, mpo na mokolo wana; Mose. Yosefe azalaki Liloba na mikolo na ye, kotalisáká Klisto mpenza. Bomoni, moko na moko na bango azalaki Liloba.

²⁸⁵ Mpe ntango Yesu ayaki, Azalaki Liloba na litondi na Yango, mpamba te mwango mobimba ya lisiko ezalaki kati na Ye. Mwango mobimba ya lisiko ezalaki kati na Mose te, ezalaki kati na Yosefe te, ezalaki kati na Eliya te. Bomoni, bazalaki kaka eteni ya Liloba, kolakisa Yango mosapi. Bomoni? Sikawa bótala,

bóbatela likanisi na bino; bótala Yango oyo, ndenge nalobaka. Bomoni, mwango mobimba ezalaki kati na bango te. Bazalaki kolakisa Yango mosapi.

²⁸⁶ Yango wana, nsima na Ye, Litondi, tokoki kolakisa eloko mosusu mosapi te. Mosapi ekotalisama na nsima, epai na Ye, Liloba. *Oyo* nde Emoniseli mobimba; eloko moko te ekoki kobakisama to kolongolama na Yango. *Kuna* nde Emoniseli mobimba. Nyonso wana ezalaki elilingi na Ye akoya; kasi ntango Ayaki, Azalaki Oyo abongi be. Baebele 1: “Nzambe, mbala mingi, asololaki na batatá na nzela na basakoli,” Nzambe alobaki na nzela na bizipelo, basakoli, “kasi na mikolo oyo na nsuka, na nzela na Mwana na Ye, Yesu Klisto.” Yango mpenza. Azipolamaki kuna na Kalvari, Mwana na Nzambe, azipolamaki.

²⁸⁷ Bótala malamú, “ayeisami na bomoi.” Mpe, lelo, ntango Liloba emonisami polele na bambeki ya bato, bizipelo, ezali mpenza Liloba oyo ekokisamaki na eleko wana, oyo ezongi na Nzambe. Lokola tobatisami kati na Ye, kokokana na Bakolinti ya Liboso 12, tokokanisami na Ye. Amen.

²⁸⁸ Nalobaki miníti ntuku misato, kasi nakoki kobakisa mwa moke? [Losambo balobi: “Amen.”—Mok.] Bomoni? Bótala, nakoki kozanga kokotisa yango awa te. Bótala, kokokanisama ná Ye!

²⁸⁹ Sikawa bótala. Bana-mboka ya Amerika boni bazali awa? Bótombola maboko. Malamú, soki ozali mwana-mboka ya Amerika, boye okokanisami na ekólo oyo. Nyonso oyo ekólo oyo ezali, osengeli kozala yango. Boye te? Ozali nkembo na yango nyonso mpe ozali nsoni na yango nyonso. Okokanisami ná yango. Ozali Americain, boye okokanisami na Amerika. Aleluya!

²⁹⁰ Nazalaki elongo na George Washington ntango akatisaki ebale ya Delaware. Nakokanisami na ye. Ya solo. Nazalaki elongo ná Abraham Lincoln ntango apesaki Lisikúlu na Gettysburg. Nazalaki wana. Nazalaki elongo ná basodá na esanga ya Guam, bino bilenge mibali, ntango botómbolaki bendele wana. Nazalaki wana. Nazali Americain; nakokanisami ná yango. Amen. Sikawa, lokola Americain, nsoni na yango nyonso na eleko ya Revolution, nayokaka nsoni yango, mpo nazali Americain. Ya solo.

²⁹¹ Mpe, lokola Moklisto, nakokanisami na Ye. Amen! Nazalaki elongo ná Nowa ntango akotaki na masuwa. Nazalaki elongo ná Mose ntango abimaki na Ezipito. Amen! Nazalaki elongo na Eliya na Ngomba Kalemele. Iyo, misie! Nkembo na Nzambe! Nazalaki elongo ná ye ntango asalaki bongo. Nazalaki mpenza elongo ná Ye, namikokanisaki na liwa na Ye, kuna na Kalvari, ntango nakufaki na makambo ya mokili, na ngai moko mpe na mimesano nyonso. Nakokanisamaki na Ye. Nakokanisamaki na Ye na ntongo ya mokolo ya Pásika, ntango Asekwaki longwa na bakufi. Nakokanisamaki na Ye Mokolo

ya Pantekote, ntango Molimo Mosanto ekitaki lokola mopepe makasi. Nakokanisamaki na Ye. Nyonso oyo Ye azalaki, ngai mpe nazali yango, nyonso oyo ngai nazali, Ye mpe azalaki yango; amen, wana tokufi kati na Ye, tokokanisami na Ye. Oyo Ye azali, ngai nazali yango. Amen!

²⁹² Oyo ekólo oyo ezali, ngai nazali yango. Nazali na litundú ya kozala yango. Nabelemi koyoka nsoni na yango. Nabelemi koyoka nsoni ya kozala Americain. Ya solo. Mpe nabelemi koyoka nsoni mbala mibale mpo na Yesu Klisto! Nyonso oyo Ye akokaki kozala, ngai mpe nazali yango. Nasepelaka kokokanisama na Ye.

²⁹³ Bantóma yango, ntango bazongaki, bakanisaki... batiolamaki, mpe bafingamaki na ndenge nyonso, bamonaki ete ezalaki lokumu monene komema nsoni ya Nkombo na Ye.

²⁹⁴ Nazali na esengo lelo kozala moko na bango, lokola nakokanisami na Liloba, oyo ezali Klisto. Nakokanisami na Ye! Lokola tobatisami kati na Ye, tokokanisami; tokokanisami na lolenge na Ye, tokokanisami na Liloba na Ye, oyo ezali Ye. Soki nazali kati na Klisto, nazali Liloba na Ye; mpo Ye azali Liloba, mpe oyo Ye azali, ngai nazali yango. Amen! Bososoli Yango? Malamu.

²⁹⁵ Liloba oyo emonisami polele, to emonisami na Emoniseli yango kuna na kati, na bongo, ekómisi ngai nani? Soki Ye azali Nkembo ya Shekinah, ngai mpe nazali eteni na Yango. Amen! Oh! Amen! Ya solo. Liloba Yango moko emonisami, emimonisi Yango moko.

Bókanisa naino! Mabombami ya Nzambe esili komonisama na biso na mokolo oyo, na nzela na Motindami yango moko ya Likoló oyo atalisamaki na bango na mikolo wana; bótala, Likonzi na Móto moko oyo etindaki Mose; Likonzi na Móto moko oyo ezalaki likoló na Mose, oyo ekomaki Biblia; Likonzi na Móto moko oyo Polo akutanaki na yango na nzela ya Damaseke.

²⁹⁶ Mpe Polo akomaki Kondimana ya Sika. Bómikanisela, Matai, Malako, Luka mpe Yoane, bakomaki kaka oyo bango bamonaki; kasi Polo azalaki na Emoniseli. Atalisaki Yango, mpo akutanaki na Likonzi na Móto, ye moko. Mpe bokanisa naino, yango moko...

²⁹⁷ Kuna, Yosefe, bango nyonso bakomaki makambo oyo esalemaki, moko na moko akomaki, na mokolo wana. Kasi ntango Mose akotaki na mosala, azalaki na Emoniseli. Akutanaki na Likonzi na Móto, mpe Emonisamaki na Mose, nini esalamaki na Genese. Akomaki buku minei ya liboso ya Biblia, Mose. Boye te? Mpamba te akutanaki na Nzambe na lolenge ya Likonzi na Móto, azipamaki kati na Likonzi na Móto yango.

²⁹⁸ Ntango Polo akutanaki na Ye na nzela... Bayekoli bakomáki kaka makambo oyo bamonaki Ye kosala, kasi Mose azalaki na Emoniseli; akendeke na Ezipito, asalaki mibu misato mpe

ayekolaki, mpe amonaki ete Nzambe ya Kondimana na Kala ezalaki Yesu na oyo ya Sika, Emoniseli! “Nazangaki kotosa emononeli ya Likoló te.” Ezali solo. Ya solo!

²⁹⁹ Mpe bokanisa Yango! Likonzi na Móto moko oyo ekitaki likoló na bato oyo bakomaki Biblia, ezali Likonzi na Móto yango moko, awa, lelo, oyo ezali kolimbola Biblia. Amen! Totondi Ye mingi mpenza mpo na yango! Yango moko! Oyo nde libondisi! Oyo nde kokokanisama! Natondi na esengo ya kokokanisama na yango, nayebi te násala nini! Malamu nákokanisama na Yango, koleka kozala Batiste, Metodiste, Presbiterien, Luthérien, mpe nyonso oyo etikali. Kokokanisama na Liloba yango, esika Nkembo ya Shekinah mpe Emoniseli ezali!

³⁰⁰ Likonzi na Móto ezali komonana polele katikati na biso, ezali kotalisa ete Nsango oyo ezali solo, ndenge Asalaki na Ngomba ya Sinai. Bómikanisela, liboso nsango ya solo épesama, Mose ateyaki mpe akambaki bango libanda na Ezipito; kasi kuna, liboso mibeko ya solosolo ékomama (ete Bilembo éteyama), Nzambe akitaki liboso na bato mpe Atalisaki polele ete Ye nde atindaki Mose, (boye te?) na Likonzi na Móto, oyo Mose alobaki ete amonaki Yango na nzete moko mpe Esololaki na ye.

³⁰¹ Oh, na ntango oyo ya nsuka, tozali komona Likonzi na Móto yango moko katikati na biso, koloba Liloba yango moko; kaka yango te, kasi kolimbola Yango na komonisáká Yango, mpe kotalisa Yango polele, ete Ezali Solo.

Boye, bato bazali na nzela moko te ya kozanga kondima, kaka soki balingi na bango kosala na nko. Mpe, na bongo: “Ye oyo akosala lisumu na nko, nsima na kozua boyebi ya Solo, mbeka mosusu mpo na lisumu ezali te.”

³⁰² Bótala malamau, Likonzi na Móto moko oyo etindamaki na Mose mpe na Polo, oyo ekomaki Biblia, sikawa etindami mpo na komonisa Yango. Ngolu na Nzambe, Nzambe oyo abongwanaka te, azali kokokisa bilaka ya Matai 28: “Tala, Nazali na bino elongo mikolo nyonso”; Kokokisáká Santu Yoane 14:12: “Misala mizali Ngai kosala, bokosala yango mpe lokola”; Kokokisáká Santu Luka 17:28-29: “Na mikolo na nsuka, Mwana na moto akomonisama,” bomoni, bomoni; Malaki 4: “Tala, Nakotindela bino Eliya mosakoli, akozongisa Kondima ya bato na Liloba ya ebandeli.” Bomoni? Ndenge . . . Bomoni? Oh, la la!

³⁰³ Akufaki mpo na komimonisa Ye moko epai na biso. Sikawa tika ete tókufa na biso moko, mpo na komonisa Ye na bamosusu. Tókufa na mimesano mpe nyonso wana, mpo na komonisa Ye na moto mosusu. Bókufa na ba-denomination mpo na komonisa Ye na bato mosusu.

³⁰⁴ Bótala malamau, tempelo ya kala ezalaki na Nkembo ya Shekinah kati na yango, mpe Pole ya Shekinah likoló ya Liloba. Liloba ezali Momboto; Epesaka lipa ya kolakisa bobele na bandimi. Makila mpe ezalaki likoló na boyokani; mpe Makila

ezali mai, mai oyo epesaka bomoi na mbuma, lisangu, momboto, oyo ezali Liloba.

³⁰⁵ Ndenge Yesu alobaki: “Ndenge Mose anétolaki nyoka ya motáko,” na nsima Alobaki lisusu, “Nzambe alingaki mokili mingi na motindo ete Apesaki Mwana-na-likinda na Ye; ete moto oyo akondimela Ye ábebisama te.” Mose abetaki libanga na biliki, mpo na kobikisa bato oyo bazalaki kokufa, to mpo na kobimisa mai. Nzambe abetaki Yesu, mpo na kobimisa Molimo kati na Ye, mpo na bato oyo bazalaki kokufa. Makila ebimaki kati na Ye, elingi koloba “Mai ya kosukulama na Liloba.” Mpe Mai epesaka Bomoi na Momboto. Mpe epesaki Nkembo ya Shekinah; engengaki likoló na Liloba, oyo epesaki lipa ya kolakisa. Mpe lipa ya kolakisa ezalaki bobele mpo na bato oyo baponami. Ah-ha. Boye te?

³⁰⁶ Sikawa, kokota kati na ezipelo, koleka na nzela ya ezipelo, kino Liboso na Ye, esika Liloba ezali (endimeli te), Liloba; kuna na kati, komona Nkembo ya Shekinah, Shekinah, Nguya, Molimo Mosanto kongenga likoló na Liloba, kokokisa elaka, yango nde elakisaka ete ozali nsima na ezipelo. Amen!

Nasíli koleka bizipelo oyo epasuká, epai
Nkembo ezungaka te, (Hm!)

Aleluya, Aleluya;
Nazali kobika Liboso na Mokonzi.

Nasíli koleka bizipelo oyo epasuká, epai
Nkembo ezungaka te,
Nazali kobika Liboso na Mokonzi.

³⁰⁷ Mposo ya gambala ya kala, ba-denomination, esili kopasuka. Nasíli kokatisa yango, kino na Nkembo ya Shekinah, mpe nazali komona Liloba. Nazali komona Likonzi na Móto kotámbola. Nazali komona Liloba komonisama polele. Oyo Ye alobaki ete Akosala na mikolo oyo ya nsuka, nazali komona yango kokóla. Nazali komona bana kolia Lipa oyo ya Shekinah, oyo euti na kokomela ya Liloba yango, baoyo bandimi Yango. Amen! Ngonga malamumu nini oyo tozali kobika kati na yango! Bomoni, Shekinah ezalaki likoló na Liloba; mpe Lipa ezalaki na nsé na yango. Mpe ezalaki na Makila, emwangisamaki, ezali kopesa Yango mai. Molimo epesaka Bomoi na Liloba. Pe. . .

Bato boni basili kotánga, basili koyóka bande ya *Kosambisama?* Iyo. Mingi kati na bino basili koyoka yango. Bomoni kuna, esengeli. . .

Liloba yango esengeli kokóla. Mpo na kokóla, Esengeli kozala na lolenge malamumu ya mabelé. Bomoni? Soki Nzambe apesi elaka, mpe ekómi na motema wana, ekoki kokweia te.

³⁰⁸ Nowa azelaki mibu mokáma na ntuku mibale. Abraham azelaki mwana mibu ntuku mibale na mitano. Nzambe alobaki bongo, mpe ekataki likambo. Bomoni? Ezali nini? Liloba ezalaki wana, ezalaki komwangisama mai na nzela na

kondima, kondima Yango, epesaki mbano. Epesaki mwana-mobali; epesaki mvula; epesaki mpela; epesaki mongondo oyo akúmbaki zemi.

³⁰⁹ Mosakoli alobáká: “Mongondo akokúmba zemi.” Na ntembe te, bilenge basi nyonso bakendeki kobongisa bilamba na bango ya ba-bebé. Ee, mosakoli yango, Yisaya, azalaki mosakoli oyo akokanisamaki, atitolamaki na Nzambe. Mpe Nkolo alobáki: “Mongondo akokúmba zemi. Nakopesa bango elembo ya kokamwa, elembo monene; mongondo akokúmba zemi.”

³¹⁰ Kuna, bato nyonso wana, bandimi yango, bazalaki mpenza lokola bino nyonso. Ntango bayokaki mosakoli yango koloba bongo, bana-basi nyonso. . . Mobali nyonso alobaki: “Ekozala mwana na ngai ya mwasi. Iyo misie.” Bango nyonso bakendeki kosomba ba-sapáto ya ba-bebé, ná ba-couche, ná nyonso wana, bamilengelaki, mpamba te bayebaki ete ye nde akobóta mwana yango. Ekeke yango elekaki, mpe bamilobelaki: “Mosakoli yango oyo akokanisámí, atitolámí na Nzambe, ndenge nini akokaki koloba likambo ya lokuta? Esengeli kozala bongo!”

³¹¹ Esalemaki nsima na mibu nkama mwambe, kasi abotaki mwana yango. “Likoló mpe mabele ekoleka, kasi Liloba na Ngai ekoleka te.”

³¹² “Mpe ekosalema, na mikolo ya nsuka,” Nzambe alobi. Bomoni, biso oyo, Pole li—likoló na Liloba. Ndenge pole ya moi ebóngolaka momboto longwa na nkembo kino na nkembo, biso mpe tokómaki—tozali kokóma malembe-malembe lokola Ye, wana tozali kobika Liboso na Ye; lokola Ye, tozali kokokana na elilingi na Ye oyo epambolami, wana tozali kotambola elongo na Ye.

³¹³ Bótala ndenge moi esalaka. Soki oloni momboto, likambo nini esalemaka? Momboto yango epolaka. Bomoi ezalaka kati na momboto. Bomoi ebimaka mpe ebimisaka litíti. Sikawa, ekokanaka na oyo ya ebandeli te.

Oyo wana Luther. Ezalaki litíti. Malamu.

Litíti ekólaki mpe, mbala moko, ebimisaki feléle. Bomoni, ezalaki kolamuka ya Wesley; ezalaki lokola oyo mosusu te.

Na nsima, kolamuka ya ba-Pantekotiste eyaki, bomoni, ebimisaki libatisi ya Molimo Mosanto. Malamu.

Likambo nini esalemaki? Mandéfu ebimaki likoló na mposo ya masangu. Ebandi komonana mabe. Eloko *oyo*, eloko *wana*, ekokani na Liloba te. Ekokani na mobimba na Yango te. Ekokani na Mbuma ya ebandeli te, oyo elónamaki.

³¹⁴ Kasi Nzambe azali kaka wana mpo na kokomisa yango—yango ndenge moko. Bótala, ezali kosala nini? Sukasuka, ekozonga na lolenge ya Momboto ya ebandeli. Ayaki na lolenge ya Martin Luther; Ayaki na lolenge ya John Wesley; Ayaki na lolenge ya Pantekote; Asengeli komimonisa lisusu

lokola Momboto yango moko, oyo elónamaki, Mwana na moto. Amimonisaki Ye moko lokola Mwana na Nzambe, na eleko ya litíti mpe bongo na bongo, kasi na eleko oyo ya nsuka, Asengeli komimonisa Ye moko lisusu lokola Mwana na moto. Bososoli yango? Malamu, lokola na ebandeli, kopesama lolenge!

³¹⁵ Mpe eloko nini ebimaka nsima na litíti? Ekobaka kokóla, ntango nyonso. Litíti moke yango ekólaka, kasi ekómi naino lokola mbuma ya ebandeli te. Nsango ya Luther mpe te; te, ba—ba—nsango mosusu eyaki na nsima, Finney, Sankey, Knox, Calvin, mpe bongo na bongo, ata moko na yango te. Ezalaki na yango nsango kasi, likambo ezalaki ete, bazuaki Emoniseli mobimba na Yango te, mpo ntango ekokaki naino te. Okoki kotia sǒngé na masangu te, soki ntango na yango ekoki naino te. Bomoni? Na nsima, sukasuka, Momboto ya ebandeli, oyo ekundamaki na mabelé, ekozonga lisusu.

³¹⁶ Bomoni, Nzambe alandaka mpenza bokeli. Bomoni, Abótamaki mwana-mpate, yango wana Abotamaki na elielo ya bibwele. Bana-mpate babotamaka na mbeto te. Bomoni, *Akambamaki* kino na Kalvari. Mwana-mpate, bampate bakambamaka. Ya solo. Bantaba nde bakambaka bango na esika ya kobomama, boyebi yango, na ebomelo. Ntaba nde ekambaka bango, kasi bango basengeli kokambama. Ah! Ya solo. Boye, Akambamaki kino na ebomelo, bomoni, mpo Azalaki Mwana-mpate.

³¹⁷ Makambo nyonso na bokeli etalisaki Ye. Yango wana Abotamaki na sánza ya misato to ya minei, na sánza ya zomi na mibale te; Akokaki te, na eleko yango ya mobú, neige emataka kino na metre motoba. Azalaki nzambe-moi te, kasi Azalaki Mwana na Nzambe. Bomoni? Nzambe-moi ya ba—Roma, mokolo mwa ntuku mibale na mitano na sánza ya zomi na mibale, ntango moi elekaka na bisika na yango, kuna, bazalaki kokende na masano ya cirque ya Roma, mpe bazalaki kobenga yango fėti ya mbotama ya nzambe-moi, mpe bakómisaki yango fėti ya Mwana na Nzambe. Te, te. Azalaki Mwana na Nzambe. Fėti ya mbotama na Ye ezalaki elongo na bokelamu. Ya solo.

Sikawa, bótala lisusu sikawa, wana tozali kokoba, totikali na mwa ntango moke.

³¹⁸ Sikawa, mpo na kobonga be. Nsima na litíti kosalema; nsima na felele kosalema; nsima na mbuma kosalema likoló na mokókólí; na nsima, esengeli kokóma na kobonga be, kozonga lisusu na mbuma mpenza.

Mpe, bomikanisela, mbuma esengeli kozua bomoi. Bomoni? Soki te, ekozala na bomoi te. Bomoni? Eloko moko te, libanda na ba—nsango yango, ekokóma na Bomoi. Esengeli kozua bomoi mpo na Yango. Kasi, bómikanisela, Bomoi moko oyo ezalaki kati na litíti nde ezali kati na mbuma. Ezali kaka kokomela yango moko

lisusu, bomoni. Amimonisaki Ye moko, (nini?) Mwana na moto, mbuma oyo ekundamaki na mabelé. Bososoli Nsango?

Ba-Greki balobaki na Ye: “Tolingi komona Yesu.”

319 Alobaki: “Soki mbuma ya lisangu ekwei na mabelé te.” Bomoni? Malamu.

320 Sikawa, ndenge nini Ye moko Amimonisaki na nsima? Na lolenge mosusu; litíti, felele, mpe bongo na bongo, nkasa nyonso mpe nyonso wana. Na nsima, Ye moko Amimonisaki, (nini?) Molimo yango moko, kasi na lolenge mosusu. Bomoni? Kasi etápe ya nsuka ya lisangu yango ezali nini? Ezongi na lolenge ya mbuma ya ebandeli. Boye te?

321 Mpe lotomo na Ye eleki na nzela ya ba-reforme, mpe ezongi lisusu Liloba ya ebandeli. Liloba eyaka na mosakoli. Mpe Alakaki yango, na Malaki 4: “Mpo na kozongisa Kondima ya bato na mbuma ya ebandeli.” Oyo ekundamaki na mabelé, yango oyo, ndenge moko. Mbuma esili koleka na nyonso wana, kino awa. Eyaki lokola Mwana na Nzambe, sikawa Emimonisi awa lokola Mwana na moto, na nsima Emimonisi Yango moko lokola Mwana na Dawidi, na Ngwende. Bomoni, Bana misato yango, ezali mpenza bongo. Oh! la la! ezongi lokola oyo ya ebandeli!

322 Sikawa, ezongi na lotomo ebongi be ya Ye moko; moto moko te, denomination moko te, ndenge basalaki na bileko wana kuna, bomoni; kasi Ye moko amonisami polele, amimonisi Ye moko polele kokokana na elaka, kosala ete Santu Luka 17:28, Malaki 4, mpe bongo na bongo, Baebele 13:8, ezali mpenza bongo. Na ntango yango, ekozala ntango nini? Ntango Momboto mokonzi ya Abraham ezali kozela Mwana na elaka. Mpe bilíngi nyonso esengeli kokokisama. Mpe Nzambe Ye moko amonanaki na lolenge ya moto, epai ya momboto ya nzoto ya Abraham, liboso na kobebisama, mpe Yesu alobaki ete ekosalema ndenge moko mpo na Momboto mokonzi oyo, liboso Mwana na elaka áya lisusu.

323 Bótala ezipelo ya kala, oyo ezalaki kobómbe Nkembo. Bamposo ya gambala ya kala, ezalaki kitoko te mpo na kosepela na yango; nzoto na Ye mpe te. Yango wana bato balobaki: “Mwa Moto moko, ná mokongo egumbámá boye?” Azalaki ntango mosusu na mibu ntuku misato, kasi na suki ya mpembe, ná mandefu ya mpembe, Azalaki ata kitoko na kotala te. Biblia elobaki: “Azalaki na kitoko te ete tósepela na Ye.” Azalaki lokola Mokonzi te, mposo ya gambala ya kala, kasi, oh, eloko oyo ezalaki na kati!

324 Mpe etóngá moke ya “batúntuki” oyo bafandi elongo na ndako ya molunge boye, babengaka bango bongo, bazali na kitoko te mpo na kosepelisa bato, kasi oyo ezali na kati! Nandimisami ete ezipami na mitema mingi, bomoni. Bomoni? Malamu.

325 Na libanda Ezalaki eloko moko te, kasi nyonso ezalaki na kati. Soki okoti na kati na Yango, nde okomona Yango. Bakotaka Kuna ndenge nini; na mbote ya loboko, mpo na kokóta? Te. Babótamaka kati na Yango. Kokufa, kolongola mposo ya gambala ya kala, bomoni, ngai na yo ya kala, mpo na kokóta na oyo ya sika. Bomoni? Kosundola mposo ya gambala ya kala.

326 Pole ya Shekinah . . . Bóyoka, batei! Batei, nalingi ete bóyoka Likambo oyo. Na ntango okoki na kati. . . Sikawa nakokómisa yango pètè mpenza, mpo bóndimisama ete bosósoli Yango. Na ntango okokti na kati ya ezipelo, na nsé ya Nkembo ya Shekinah, Pole ya Shekinah ezuaka Liloba na Nzambe te mpo na komonisa Yesu lokola “moto na solóka,” te, ndenge ba-denomination bazali kosala lelo, “télépathie, batúntuki, Belezébúla.” Nkembo ya Shekinah emonisaka Ye bongo te.

327 Kasi Nkembo ya Shekinah esalaka ete Momboto oyo elakamaki mpo na ngonga wana, ya Liloba, ékomela, kotalisa Ye ete azali Lísí ya Lobwakú kino lelo. Ebotaka Momboto yango, Lísí ya Lobwakú, Lipa ya Bomoi, Alifa mpe Omega, ndenge moko lobi, lelo mpe libela. Azali eteni ya bandimi. Nkembo ya Shekinah emonisaka, na mondimi, ete Azali ndenge moko lobi, lelo mpe libela.

328 Ezali te: “Mikolo, Asilá koleka, mpe Akúfáki mpe likambo nyonso esilá na yango.” Boye moninga, soki ondimaka bongo, soki ondimaka bongo, okútáná naino na Nkembo ya Shekinah te. Ndenge nini Nkembo ya Shekinah ekoki komonisa Ye kati na bato misato? Bomoni? Ndenge nini Nkembo ya Shekinah ekoki komonisa Ye na kobatisáká bato na nkombo ya “Tata, Mwana mpe Molimo Mosanto,” na ntango oyo ata moto moko te, na Biblia, abátisámá bongo? Ndenge nini Nkembo ya Shekinah ekoki kosukisa Ye kaka na ntóma moko, ntango oyo Azali ndenge moko lobi, lelo mpe libela? Bomoni?

329 Nkembo ya Shekinah emonisaki Ye polele. Ememaka Liloba ya elaka, sémba liboso na bino. Yango wana Asengelaki kozipa elongi ya Mose, mpamba te kati na Ye Liloba ezalaki. Azipaki Yesu, lokola mwa Moto moko ya komikitisa, mpo bákoka komona Jehovah te. Mpe Amizipi lelo, kati na bambeki ya mokili, ná Shekinah. Libanda ezali lokola etóngá ya batúntuki, bamposo ya gambala ya kala, kasi kati ebombi Nkembo ya Shekinah.

Ezali kosala ete Lipa ya kolakisa, oyo tozali kosepela na yango ékomela, mpe tókende na ekólo mobimba na motuka, na ntáká ya ba-kilometre nkama na nkama, bomoni. Ezali Bilei ya bandimi. Ezali bobele mpo na mondimi. Bómikanisela, Lipa ya kolakisa ezalaki kaka mpo na mondimi, bomoni, Momboto-Lipa ya kolakisa. Bótala. Esalaka nini? Nkembo ya Shekinah yango, likoló na Lipa ya kolakisa, ezalaki kobatela Yango na kobeba.

330 Bómikanisela, mána oyo ezalaki kouta na Likoló, ezalaki kobatelama kati na Nkembo ya Shekinah, longwa na ekeke moko

kino na mosusu. Na libanda, bankusú ezalaki kokota kati na yango, na butu moko, ezalaki kopola. Boye te?

³³¹ Libanda na Nkembo ya Shekinah, “Ntango ya bikamwa esílá koleka. Bomoni, nyonso wana ezali bilandálanda.” Kasi na kati . . .

³³² Bótala, bauti komona ba-mbuma ya felele ya tournesol na kati ya ebómbelo moko ya mbuma na Ezipito, oyo etiamaki kuna na ntango ya Yosefe, eleki pene na mibu nkoto minei. Yosefe moto atiaki yango na kati ya ebombelo yango. Balonaki yango. Etóyaki. Mpo na nini? Ezalaki na bomoi.

³³³ Nkembo ya Shekinah yango ezali nini lelo? Kokóta na ngámbo mosusu ya ezipelo, mpo na komona Nzambe oyo atelembi liboso na bino azali Nani, mpo na komona Nzambe oyo atelembi awa, liboso na biso, li—Likonzi na Móto, azali Nani. Azipami kati na mosuni na moto. Kasi Shekinah ezali kosala nini, ezalaki kosala nini? Momboto-Lipa ya kolakisa, Liloba oyo tosengeli kobika na yango lelo, na nzela ya bilaka oyo, Nkembo ya Shekinah ezali kosala ete Lipa ya kolakisa ékomela, ete Ékokisama, ékómisa Yango Lipa mpo na mondimi; oyo ezalaki na kati ya nkasa ya Biblia, mobú nsima na mobú, Liloba mpo na eleko oyo.

³³⁴ Mpo na ba-denomination, Ezali libanga ya libaku. Mpo na ba-denomination, bazali kobeta libaku likoló na Yango. Na mibu nyonso wana, Luther, Wesley, Martin Luther, mpe bango nyonso, Sankey, Finney, John Smith, Knox, bango nyonso babetaki libaku likoló na Yango.

³³⁵ Kasi nini esengeli kosalema na mikolo ya nsuka? “*Komonisa*” elingi koloba nini? “*Kotalisa!*” Malaki 4 asengeli kosala nini? Kobóngola bato longwa na libanga ya libaku wana, kobuka mimesano, mpe komonisa Lipa yango na nzela na Nkembo ya Shekinah. Bótala Yango kokomela mpe kotalisa mpenza oyo Elobaki ete Ekosala, oh, la la, Lipa ya kolakisa mpo na mokolo oyo. Mpo na ba-denomination, libanga ya libaku, “etóna ya bilandálanda.” Kasi mpo na biso baoyo tondimi!

³³⁶ Kasi sikawa, ndenge Emoniseli 10 elakaki: “Mabombami nyonso ya Nzambe, oyo ebombamaki na kati ya nkasa na mibu nyonso wana, ekokomela, ekotalisama na eleko ya Nsango ya mwanje na nsambo.” Boye te?

Alobaki nini, eleki mobu moko na sanza motoba, elingi kokokisa mibu mibale sikawa? “Kende na Tucson; okozala na nordi ya Tucson, lokito ya makasi,” mpe oyo ekosalema ezali ete, “Bilembo ekofungwama,” Bilembo nde emonisi makambo oyo. Nazongaki, kaka ndenge Alobaki.

Ezali nini? Elakisi ete Ekoki kozala moto te. Epesi mpenza malambe, sémba mpenza na ndenge ya kokoka, mbala nyonso. Ezali nini? Ezali loboko ya Nzambe, bomoni, liboso na biso. Kasi lokola ezali na kati ya etóna moke, ezipami na mosuni na moto,

ezipami mpo na bato ya libanda. Abombami na miso ya bato ya libanda. Azali komimonisa Ye moko na bana mike, baoyo balingi koyekola. Bomoni? Ya solo.

³³⁷ Nyonso, bomoni, masese nyonso na Biblia, bilíngi nyonso na Biblia, ezali komonisama polele awa liboso na biso. Nzambe yango moko, na Likonzi na Móto, oyo akomaki Biblia, na Kondimana ya Kala mpe ya Sika, Azali mpenza awa komonisáká Yango polele, kolakisa mpenza oyo yango ezalaki, kolimbola yango mpenza, mpe kotatola ete yango nde mpenza ndimbola.

³³⁸ “Biso tozali na ndimbola!” Na bongo, tómona yango kosálema. Bomoni, yango mpenza, tómona yango komonisama polele.

³³⁹ Komonisa polele! Yesu alobaki: “Soki Nasali misala ya Tata na Ngai te, bóndimela Ngai te.” Bomoni, esengeli kotalisama polele.

³⁴⁰ Kasi sikawa—sikawa, kotalisama polele lokola Yesu te, bazíngaki e—elamba na motó na Ye mpe babetaki Ye na motó, balobaki: “Soki Ozali Mosakoli, yebisa biso nani abeti Yo.” “Mpe soki Ozali Mwana na Nzambe, bongola mápa oyo.” Bomoni, oyo wana ezali zaboló. “Soki Ozali Mwana na Nzambe, kitá na ekul- . . .”

³⁴¹ Nalingi koloba, Emoniseli oyo Asengeli kopesa, wana nde oyo Yango ezali. Kasi sikawa, lokola Emoniseli 10 esili komonisama, mabombami ya Nzambe emonisami polele, eyebani, ndenge Buku ya Bilembo Nsambo elakáki.

Sikawa, tika ete kondima na bino kati na Ye Oyo azali Liloba . . . Mpamba te, na Emoniseli 10, elobami . . .

³⁴² To, kútu, na Emoniseli 19. Nakomáki yango awa, Emoniseli 10, mpo tózua yango; kasi ezali 10 te, ezali 19. Ntango Akoya, Akobéngama “Liloba na Nzambe,” Koyaká likoló na mpunda ya mpembe, mpe balandi ya Likoló bakozala nsima na Ye.

³⁴³ Bóbúka ezipelo ya mayele ya kelasi ya denomination! Bóbúka ezipelo ya mimesano ya denomination! Bóbúka bizipelo oyo ezali kobómbe Ye na miso na bino! Bóbúka bizipelo yango ya lolendo, bino basi. Bozali—bozali bana-basi ya Mokonzi; bósala kokana na yango, bóbika kokokana na yango. Bóbuka bizipelo nyonso, ata Molakisi ya Philosophie mpe ya Droit alobi nini. Soki ekesani na Biblia, bóbuka mpe bóleka ezipelo yango!

Mpamba te, biso tosíli kokatisa ezipelo oyo epasukaki. Tozali na ngámbo mosusu sikawa, na ngámbo mosusu. Mpe bokomona, soki bosali yango mpenza, soki bobuki mimesano ya kala ná nyonso wana, mpe boyei epai na Ye, bokomona Ye ateleme, Molongi na Nguya, Liloba ya elaka mpo na eleko oyo, amonisami polele. Bokomona Nzambe na Nguya azipolami, bokomona Ye katikati na biso awa, azipolami, Nzambe na Nguya, alongami na mimesano te.

344 Bamekaki kobómba Ye kuna na nsima; basalaki yango, na mibu ebele, kasi ntango ya elaka ekómaki pene. Nzambe atelemisaki Mose moko, na ntango moko, mpe akangolaki bana na makambo wana. Mpe, kino lelo, Azali . . . Akoki kolongama te. “Likoló ná nse ekoleka, kasi Liloba na Ngai ekoleka te.” Azali ndenge moko lobi, lelo mpe libela.

345 Balobaka: “Ekoki kosalema te.” Kasi esalemaki. Na nsima, ntango esalemaki, balobaki: “Ezali ya zabolo.”

346 Kasi yango ebongolaka Liloba na Nzambe ata moke te. Ezali “Nzambe” kino lelo, mpo na mondimi, “Molongi na Nguya; ndenge moko lobi, lelo mpe libela,” na ezaleli na Ye, na Liloba na Ye, Baebele 13:8.

347 Nazosilisa, na koloba boye, mpo etikali miníti mitano liboso na midi, nakoloba kaka likambo oyo. Naticali na nkasa pene na zomi to zomi na mibale. Nakolobela yango mokolo mosusu, ntango mosusu na mpokwa.

348 Bóyoka, boyoka likambo oyo. Mokolo moko, bazalaki koteka biloko, mpe bazalaki na violon moko ya kala. Bosilá koyóká yango mbala mingi. Violon moko ya kala; mpe motéki atunaki: “Bokopesa ngai ntalo boni mpo na yango?” Ntango mosusu nakoloba yango mpenza ndenge esalemaki te, kokokana na poeme yango. Eleki mibu ebele, ebele mpenza, kasi eyeli ngai na makanisi. Bazuaki violon yango, mpe ezalaki mpenza kitoko te; ezalaki na bosoto, mpe nyonso wana. Azalaki ata kokoka kosómbisa yango na moto moko te. Sukasuka, nakanisi ete balingaki kosomba yango na dollar moko, to eloko moko ya ndenge wana.

349 Mpe moto moko azalaki wana, oyo amonaki ete esengelaki kotekama na ntalo wana te, na bongo apusanaki mpe azuaki yango. Asimbaki yango na maboko, azuaki ebételi, apakolaki yango nkisi oyo colophane mpe abetaki loyembo moko. Mpe, ntango abetaki loyembo yango, bango nyonso babandaki kolela. Bayóká naino mizíki ya ndenge wana te na bomoi na bango.

Bongo motéki atunaki: “Bokopesa ngai ntalo boni?”

350 “Nkóto mibale!” “Nkóto mitano!” “Nkóto zomi!” Bomoni? Ezalaki nini? Loboko ya nganga-mayele emonisaki eloko nini ezipamaki kati na nzenze wana ya kala.

351 Ndenge moko sikawa! Buku oyo ya kala, Enuná, Esekáma, etumbáma na moto, etiolámá. Kasi ntango ekoki, oyo badenomination bazali koteka biloko, Likita ya Mangomba ya Mokili mobimba. Bazali koteka Yango lokola eloko oyo etali moto moko te. Zando moko ya badenomination ezali koya.

352 Kasi, bomikanisela, eloko moko ezali na kati ya Buku yango ya kala, oyo elakaki ete loboko moko, oyo ebongisámá liboso mpe eponámá, ekoya mokolo moko, ekozua Yango mpe ekosala ete Liloba ya Buku oyo, na nzela na motema oyo ebongisámá liboso,

mpo na kosala mosala oyo esalema mpo na Yango, émonisa bilaka oyo ezali na kati na Yango. Ekoki komonana, oh, lokola mwa etónge moko ya batúntuki, to eloko moko ya ndenge wana; kasi esengeli kaka na loboko ya Nganga-mayeke, Liloba likoló na Yango, mpo na komonisa Liloba yango, mpe ekokóma koleka motúntuki. Ekómi bongo mpo na moko na moko na biso, boye te, baninga? Ezali etónge ya bilandá-landa te. Etalaka loboko ya Nani oyo asímbe ebételo.

Tóbondela.

³⁵³ Tata na biso na Likoló, na nzela na kondima, lelo, namoni Nganga-mayeke ya Buku ya kala, oyo basundolaki mpo na kozua mimesano. Basundolaki Yango mpo na kozua ba-denomination. Bamekaki kotéka Yango bongo. Sikawa bazali koteka Yango mpo na kozua li—Likita ya Mokili mobimba ya bato, ya mangomba, ba-communiste, ba-athée. Koteka na mangondo ezali kokóba, Nkolo.

³⁵⁴ E Nzambe, béléma! Na ntembe te, Okosala yango. Tindela biso mosakoli yango, Nkolo, oyo azui ebetelo yango, oyo azui Liloba oyo mpe atalisi polele ete Yesu Klisto azali ndenge moko lobi, lelo mpe libela. Bato mingi, Nkolo, bakoteka bomoi na bango, bakobwaka mimesano na bango ya kala, bakopasola bizipelo. Bazali na mposa na Yango, Nkolo. Bakopesa nyonso, nyonso, kaka mpo bápesa bango Yesu.

³⁵⁵ Nkolo, nakanisi ete Otalisi bango Yango polele sikawa. Bauti bipai na bipai. Babebisi misolo na bango. Basálaka nyonso, mpo báluka kokóma na mayangani, mpo na kosala nyonso bakoki kosala, mpo basili kozua Mayaka yango ya motuya monene. Makambo mosusu ezali mpenza na motuya te. Pambola bango, Tata.

³⁵⁶ Likoló na eteyelo oyo, na ntongo oyo, Nkolo, miswále ezali awa. Ntango mosusu bamosusu basengeli kokende lelo, liboso na liyangani ya kobondela mpo na babeli na mpokwa. E Nzambe ya Seko, kitisa miso na nse. Nayebi ete Ozali awa, Ozipami. Mpe nazali kotinda bizipelo ya mike oyo, Nkolo, oyo ebengami “miswále,” “bilamba” ya mike ná “basapato” ya mike, ya babebé. Nazali kotinda yango lokola bilembo ya ezipelo ya moke, ete Liloba na Yo euti koteyama likoló na yango na ntongo oyo, mpe, lokola mondimi, natieli yango maboko na ngai, nzoto na ngai, mpo na kotalisa ete ngai nandimi Yango. Mpe, na nzela na kondima, moto moko na moko na ndako oyo andimi ndenge moko, Nkolo. Tika ete babeli bábika.

³⁵⁷ Okoki kosimba li—Liloba awa, Nkolo, ndenge mobeti-violon asimbacki violon yango, sala mpe bongo, Nkolo. Sala ete ébeta loyembo esengeli, wana loboko ya Nganga-mayeke esimbi ebételo, na bongo tokomona Ye atelembi liboso na bato nyonso.

³⁵⁸ Likanisi oyo eyelaki bato wana mokolo wana, ntango baboyaki kopesa motuya, ntango bapesaki motuya moko te mpo

na violon yango ya kala. Balingaki yango te. Baboyaki kozala na yango na bandako na bango. Kasi ntango moto oyo ayebaki kobeta yango azuaki yango, na ntango wana nde batekaki nyonso bazalaki na yango, mpo básomba yango. Bakómaki koswana mpe kobunda mpo na yango. Na ntango yango, ntango esilaki koleka.

³⁵⁹ Ekosalema mpe bongo mokolo moko, ntango Kelelo ya Nkolo ekoyula, ntango ekozala lisusu te. Baoyo bazalaki kotalama na nsonge ya miso mpe kotiolama, oyo bazalaki wana, liboso na ezipelo ya kofungwama mpe bamonaki Liloba na Nzambe komonisama polele (*bamosusu* bakogánga mpo na kozua Yango, kasi, ndenge Olobaki: “Na ntango yango, ntango ekosila koleka”), bakotaki na Féti ya Libala; kasi *bango* batikalaki libanda, epai kolela, kokimela mpe kolia mino ekozala.

³⁶⁰ Sungá moto nyonso ete ándima, na ntango oyo, Tata; buka bizipelo nyonso ya moyími, bizipelo nyonso ya kozanga kondima, mpo bámona Molongi na Nguya azipolami liboso na bandimi. Mpamba te: “Tala, Nazali elongo na bino ntango nyonso, kino na nsuka ya mokili. Etikali moke bamokili bakomona Ngai lisusu te, kasi bino bokomona Ngai.” Mimonisa katikati na biso, Nkolo, ndenge Osalaka. Tikala bongo, kino tokomónana mpenza liboso na Yo, ntango *en morphe* ekosila kobongwana, mpe Okokóma lisusu Mwana na moto, mpe Mwana na Dawidi. Kokisa yango, Nkolo, na Nkombo na Yesu Klisto.

Wana togúmbi mitó, biso nyonso tózala na lolenge ya kobondela.

³⁶¹ Nazali komituna lelo soki bato bazali awa oyo...na kati to libanda. Makoki ya kobenga bato awa na etumbelo ezali te, mpo esika ezali te. Kasi nazali komituna, na bosembo nyonso, bondimi ete oyo ezali Solo? Bondimi ete, na ntango oyo tozali kobika na yango, ná mobulu nyonso oyo, mpe na eleko ya science ndenge ezalaki na ntango ya Nowa, na ntango ya Mose, na ntango ya Klisto, bondimi ete Nzambe, Tata na nkembo mpo na biso nyonso oyo tobótami kati na Ye, bondimi ete Azali elongo na biso lelo oyo?

³⁶² Likonzi na Móto oyo ezali komonana na miso mpe etalisamaki polele na science, eleki mibu mingi, ntango nazalaki mwana moke, esololaki na ngai kuna mpe elobaki na ngai ete nakofanda mpenza awa, mpe makambo oyo elingaki kosalema. Nayebisaki bino yango, na nsima Yango...Mokolo moko, kuna na ebale, liboso lotomo oyo ébanda, na kolamuka ya liboso, Amonanaki na likoló, Amitalisaki mpe Apesaki etinda. Na mibu nyonso oyo, nabómbaki yango na motema na ngai, nazipaki Klisto, Likonzi na Móto yango moko ezali kolimbola Liloba, ndenge elakamaki. Tokómi na ntango ya nsuka, etikali kaka Boyei ya Nkolo. Mpe soki omoni ete ozali libanda na ezipelo yango, kozala na libanda ezali kufa, na nzela na kondima, na

ntongo oyo, olingi koloba: “Na lisungi na Nzambe. Na lisungi na Yo, Nkolo, nalingi koleka na ezipelo yango. Nalingi kokóta na esika oyo Yo ozali, mpo námona Liloba na Nzambe na mobimba”?

³⁶³ Koluka kozala Mose te. Koluka kozala Alona te. Te. Zalá kaka oyo yo ozali, kasi zalá Moklisto.

³⁶⁴ Wana bogumbi mitó, okolinga kotómbola loboko epai na Nzambe, mpe koloba: “Nkolo Nzambe, sungá ngai ete nákota na kati ya ezipelo”? Nzambe ápambola yo. Nzambe ápambola yo. Ezali, bótala maboko!

³⁶⁵ Na libanda kuna, bómikanisela, ntango mosusu ngai natikali komona loboko na yo te. Ezali—ezali mpenza na ntina te ete ngai námona yango, ata bongo; Nzambe nde. Ezali kaka, mpo na ngai, ezali kaka mpo námona ete mo—Momboto ekweaki na esika moko, mpe, kasi Nzambe nde amonaka motema mpenza.

³⁶⁶ Soki bamosusu bazali, oyo batómbolaki maboko te, oyo balingi kotómbola yango sikawa, bótombola maboko mpo tókánisa bino na libondeli. Bótómbola maboko. Nzambe ápambola bino. Ezali malamumu. Nzambe ápambola bino.

³⁶⁷ Tata, tobondeli lelo, Nkolo, mpo na baoyo baleki naino na ngámbo mosusu ya ezipelo yango te. Bazali libanda kuna, lokola Yisraele; bazali kotala. Bazali kondima, kasi naino bakoti Awa te, mpo na komona Pole monene ya Shekinah, na molimo mpe na nzoto, mpo liso mekaniki ya appareil ya fotó ezali kokóba kokanga yango fotó; eleki bobele mpóso mibale, bakangaki Yango lisusu fotó. Ozali komimonisa Yo moko, Nkolo, Nzambe na Nguya azipolami mpo na mondimi; Azipami naino mpo na mozangi-kondima, kasi azipolami mpo na mondimi.

Tika ete bákota na kati, lelo, Nkolo, bámona kongenga monene mpe Nkembo na Ye. Tika ete mitema na bango ébongwana liboso tóya lisusu na losambo oyo na mpokwa. Tika ete bango nyonso bátondisama na Molimo na Yo, na Bozali na Yo. Tika ete Nganga-mayeke ázua kondima oyo bazali na yango, Ásimba-simba yango na Liloba; tika ete loyembo ébeta lisusu: “Obongisámá, liboso na kozalisama ya mokili, mpo na kondima Likambo oyo. Ndimá, mwana na Ngai, mpe bikisama.”

³⁶⁸ Tata Nzambe, topesi bango na maboko na Yo sikawa, koyeba ete eloko mosusu ezali te, oyo tokoki kosala. Nyonso ezali sikawa na maboko na Yo, Tata. Napesi Yo bango. Na Nkombo na Yesu Klisto, Mwana na Yo. Amen.

Nalingi Ye, na . . .
Mpo . . . lingaki ngai liboso
Mpe Asombi lobiko na ngai
Likoló na Kalvari.

³⁶⁹ Bolingi Ye?

Malamu, malamumu, Yesu mpo na ngai,

Mopesi toli, Mokonzi na Kimia, Nzambe na
Nguya;

Abikisi ngai, Abateli ngai na lisumu mpe na
nsoni,

Mosikoli na ngai azali malamumu, nkembo na
Nkombo na Ye!

Nabungaki, Asili kozua ngai, kokweisama
esili,

Yesu apesaka bonsomi mpe lobiko na
mobimba;

Abikisi ngai, Abateli ngai na lisumu mpe na
nsoni,

Mosikoli na ngai azali malamumu, nkembo na
Nkombo na Ye!

Oh, malamumu, malamumu, Yesu mpo na ngai,
Mopesi toli, Mokonzi na Kimia, Nzambe na
Nguya;

Oh, Abikisi ngai, Abateli ngai na lisumu mpe
na nsoni,

Mosikoli na ngai azali malamumu, nkembo na
Nkombo na Ye!

³⁷⁰ Bato boni bazali komona Ye ateleme, Molongi na Nguya,
Liloba ekómi nzoto, ezipolami liboso na biso; Alífa mpe Oméga;
Ye oyo Azalaki, Azali mpe Akoya; Mosisá mpe Mwana na
Dawidi; Azalaki Mwana na moto, Mwana na Nzambe, Mwana
na moto, mpe Akozala Mwana na Dawidi? Bondimi Yango na
motema mobimba? Amizipolaka Ye moko na eleko moko na
moko, komitalisaka na mondimi, komizipakáká Ye moko na
mosuni a moto mpo na mozangi-kondima. Abombami nsima na
ezipelo. Tika ete Nzambe ápasola bizipelo nyonso, mpo tómona
Ye ndenge Azali!

Yesu abuki minyololo nyonso,

Yesu abuki minyololo nyonso,

Oh, Yesu abuki minyololo nyonso,

Ntango Apesi yo bonsomi!

Na ngámbo mususu ya Yaladene,

Na zámhá kitoko ya Edene,

Epai Nzete na Bomoi ebote felele,

Kuna nde kimia ezali mpo na ngai.

Yesu abuki . . .

Olingi kokatisa Yaladene sikawa, boye te? Tolekisi ntango
molai na biliki, boye te? Tókende na ngámbo ya bilaka!

Yesu abuki minyololo nyonso,

Yesu abuki minyololo nyonso,

Oh, ntango Apesi yo bonsomi!

³⁷¹ Tótombola maboko sikawa.

Nakokumisa Ye ntango nyonso mpenza,
 Nakokumisa Ye ntango nyonso mpenza,
 Nakokumisa Ye ntango nyonso mpenza,
 Mpo Apesi ngai bonsomi!

³⁷² Amen! Esali ete bómiyoka malamú, boye te? Oh, malamú mpenza! Na bongo, Azali mpenza malamú, boye te? Tópesana mbote ya loboko sikawa, wana tozali koloba:

Yesu abuki minyololo nyonso,
 Yesu abuki minyololo nyonso,
 Oh, Yesu abuki minyololo nyonso, (Nzambe ápambola yo, ndeko.)
 Oh, mpe Apesi yo bonsomi!
 Nakokumisa Ye ntango nyonso mpenza,
 (Nzambe na Nguya!)
 Na...

“Ndenge moko lobi, lelo mpe libela,” Abongoli bobele lolenge na Ye.

...kumisa Ye,
 Nakokumisa Ye ntango nyonso mpenza,
 Mpo Ye (alongoli bindimeli nyonso na kati na ngai) Apesi ngai... (mpo nándima Liloba na Ye).

³⁷³ Oh, bozali koyoka ndenge Violon ya Nganga-maye, ndenge ebetelo ezali koleka na Liloba oyo, boye te? Azali ndenge moko lobi, lelo!

Nakokumisa Ye ntango nyonso mpenza,
 Nakokumisa Ye ntango nyonso mpenza,
 Na...(Ye, Liloba!)...kokumisa Ye ntango nyonso mpenza, (Asali nini?)
 Mpo (nsima ya ridó) Apesi ngai bonsomi!

³⁷⁴ Nzambe ákumama! Nalingi Ye. Bolingaka Ye, boye te? Oyo ezali lokola na Likoló, boye te? Nasepelaka na misala wana ya Liloba, bomoni, Molimo Mosanto na lolenge ya bopolo mpe ya komikitisa. Na—nasepelaka na Yango mpenza. Oh, bókanisa naino!

Na ngámbo mususu ya Yaladene, (Nakómi pene na yango sikawa.)
 Na kitoko... (oyo Ekufaka te!) ya Edene,...
 (Nakomona nini kuna?)
 Epai Nzete ya... (oyo ezalaki na elanga ya Edene) eboto felele,
 Kuna nde kimia ezali mpo na ngai.

³⁷⁵ Bolingi kokende kuna? Ye moto abukaka minyololo nyonso.
 Yesu abuki (mimesano nyonso) minyololo nyonso,

Yesu abuki minyololo nyonso (ba-
denomination nyonso, bindimeli nyonso),
... abuki minyololo nyonso,
Mpe Apesi yo bonsomi!

³⁷⁶ Nzambe ákumama! Nalingaka Ye mingi. Kokamwa te ndenge Yisaya alobaki: “Azali Mopesi toli, Mokonzi na Kimia, Nzambe na Nguya, Tata na Seko, Malamu mingi!”

Malamu, malamu, Yesu mpo na ngai,
Mopesi toli, Mokonzi na Kimia, Nzambe na
Nguya;
Oh, Abikisi ngai, Abateli ngai na lisumu mpe
na nsoni,
Mosikoli na ngai azali malamu, nkembo na
Nkombo na Ye!

³⁷⁷ Oh! la la! Eningisi motema na ngai. Azali mpenza malamumu! Bóyoka, Oyo ezalaka na nsuka te. Yango, nayaki kati na likambo Oyo, eleki mibu ntuku misato na misato, nazalaki komiyoka boye. Mpe soki Aumeli, mokolo moko nakokanga miso, nakokende mpe kaka ndenge moko. Amen!

Malamu, malamu, Yesu mpo na ngai,
Mopesi toli, Mokonzi na Kimia, Nzambe na
Nguya ezali Ye;
Abikisi ngai, Abateli ngai na lisumu mpe na
nsoni,
Mosikoli na ngai azali malamu, nkembo na
Nkombo na Ye!

³⁷⁸ Nakoki kotikalala awa moi mobimba, kati na Yango. Polo alobaki: “Soki nakoyemba, nakoyemba na Molimo.” Iyo. “Soki nakoteya, nakoteya na Molimo. Soki nakotambola, nakotambola na Molimo. Soki nakoloba, nakoloba na Molimo.” Tika ete nyonso ésalema na Liloba mpe na Molimo. Iyo, misie. Amen! Nyonso wana ezali Solo ya Nzambe.

³⁷⁹ Nazali komona Ye, Nzambe na Nguya, azipolami. Nazali komona Ye kolongola bindimeli ná ba-denomination; kolongola nte—ntembe, manaka ya kelasi, mpe nyonso wana; kopusana, kotelema wana. Bokanisi ete bindimeli ekoki kolonga Ye? Bokanisi ete ba-denomination ekoki kolonga Ye? Bokanisi ete Likita ya Mokili mobimba ekoki kolonga Ye? Ye alongaki nyonso, abukaki minyololo nyonso, apasolaki mpe afungolaki ewélo; abukaki elembo, akotaki na Esika eleki búle; amizipoli epai na biso, azali Liloba, ndenge moko lobi, lelo mpe libela. Amen. Nalingi Ye.

³⁸⁰ Sikawa, kino tókutana na mpokwa ya lelo, tolingi kosala likambo moko, ezali:

Mema Nkombo na Yesu,
Mwana na mawa mpe bolozí;
Ekopesa yo esengo mpe libondisi,

Oh, mema Yango bisika nyonso okokende.
 Nkombo kitoko, O ya boboto!
 Elikia ya mokili mpe esengo ya Lola;
 Nkombo kitoko, (Iyo, nasili kozua yango.) O ya
 boboto!
 Elikia ya mokili pe... (...?....)


³⁸¹ Soki Satana ameki kosénginia yo, ete ozali kotala eloko oyo esengeli te, lakisa ye Liloba, ndenge Yesu asalaki. Bomoni? Bomoni? Amen!

Tokogumbamela Nkombo na Yesu,
 Tokofukama na makolo na Ye,
 Na Lola, tokolatisa Ye motóle ya Mokonzi na
 bakonzi,
 Ntango mobembo na biso ekosila.
 Nkombo kitoko, (Nkombo kitoko!)...
 Elikia ya mokili mpe esengo ya Lola;
 Nkombo kitoko, O ya boboto!
 Elikia ya mokili mpe esengo ya Lola.

³⁸² Billy akozala awa, pene na ngonga ya motoba, akokabola bakálati ya mabondeli mpo na baoyo bakolinga koleka na molongo ya mabondeli. Nabanzi ete ekozala malamú mingi ete tósala yango. Tolingaki kosala yango te, kasi, lokola bato bazali mingi, ezali malamú mingi ete tósala yango, bomoni.

³⁸³ Sikawa bómikanisela Ye! Bókanisaka Ye ntango nyonso, na mitema na bino. Bisika nyonso bokokende, bomoni, bókanisaka Yesu.

Mema Nkombo na Yesu (Sikawa bóyoka.)
 elongo na yo,
 Lokola nguba liboso na motambo nyonso; (Nini
 ekosalema?)
 Wana masenginia ekozanga yo, (osengeli kosala
 nini?)
 Loba bobele Nkombo Mosanto wana na
 libondeli.
 Nkombo kitoko, (Nkombo kitoko!) O ya
 boboto!
 Elikia ya mokili mpe esengo ya Lola;
 Nkombo kitoko, O ya boboto!
 Elikia ya mokili mpe esengo ya Lola.

³⁸⁴ Sikawa tógumba mitó. Nakosenga na mokengeli soki akoki koya mpo na kosilisa liyangani. Ndeko Neville, Nzambe ápambola yo, Ndeko Neville. 

64-0614M Kozipolama Ya Nzambe
Branham Tabernacle
Jeffersonville, Indiana U.S.A.

LINGALA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyikanisama te, kotiamana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, koméla:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org